

近代中國史料叢刊續編第八十二輯
沈雲龍 主編

吉林外

記
薩英額著

卷一—卷六

文藻出版社
有限公司
印行

吉林外記

光緒庚子年
廣雅書局刊

近代中國史料叢刊續編 第八十二輯

目錄

吉林外記 卷一—卷六……………薩英額著

吉林外記 卷七—卷十……………薩英額著

增吳根臣著：寧古塔記略

履園叢話（上）……………錢詠著

履園叢話（下）……………錢詠著

辛亥殉難記……………吳慶坻修·金梁補

隆裕皇太后大事記……………富察敦崇纂

甲子清室密謀復辟文證……………佚名輯

滿洲國記實……………李念慈著

宣統皇帝秘聞……………潘際坳著

五二三蒙難二十週年紀念文集……………五二三紀念文集編輯委員會編

羅大愚先生紀念集……………羅大愚先生紀念集編輯委員會編

吉林外記序

天下府州縣莫不有志

盛京有通志黑龍江有志又有記吉林爲我

朝發祥根本之地並無記載豈非闕典謫居吉林人員內不乏名家何難濡筆第人地兩生不知風土人情山川地名又多係

國語以漢文字音求解鮮不亥亥此富崧巖大憲之所以不委諸

外員而命

薩英額

作記也憲諭諄諄責成甚切不便固辭有負

大憲問政觀俗作人雅化之意於是退食之暇搜羅採訪集腋成裘雖文采不足觀而事必徵實言皆有據並攷志內所載略其所詳詳其所略其成數篇分別條類呈正惟是吉林通省舊城遺跡甚多未及遍攷不免挂漏而大憲之莅吉林四任建義

學調劑驛站官莊請書籍梟盜魁

嘉慶二十四年緝獲盜首劉德王五二犯刑司援引擬遣

大憲駁飭照響馬強盜得贖例具

奏梟示西門外盜劫之風遂息設雙城堡屯田墾伯都訥閑

荒備移京旗開旗人萬年之生計種種善政不可枚舉自愧學

淺不能詳述統俟後之君子吉林堂主事

薩英額謹識

盛京通志列吉林將軍所屬形勢圖瞭如指掌亦既詳且明矣此

圖僅繪

長白山望祭山記瑞也繪松花江及邊柵記關津也繪四鎮四協

記官也一統河暨邊外之長春廳附焉記台站記墩里也且補

通志所無展卷之餘益著同軌之盛焉

吉林外記目錄

卷一

御製詩歌

卷二

疆域形勝

山川

城池

卷三

滿洲蒙古漢軍

建置沿革

驛站

船艦橋樑

卷四

職官

兵額

卷五

俸餉倉儲

事宜

卷六

學校

學額

儒林文苑

大七十一
小五

祠記

卷七

田賦

物產

公署

人物

卷八

時令

風俗

貞節

雜記

卷九

古蹟

卷十

雙城堡

伯都訥屯田

吉林外記刊誤

卷一

第二葉九行

賦詩二首

四字連上行詳
攷為文另行誤

第四葉十六行

乾隆四十三年

六字宜注
題下以歸

畫

第五葉六行

索倫人以捕貂為恆業

脫索

倫二字

歲有貢貂額

貂字衍

十三行

小注惟以供御

脫御字

卷二

第二葉十一行

以後吉林烏拉書吉林布

特哈烏拉書烏拉從漢語

省文也

此二十三字是輯者發例之詞元鈔

本另行依一格連刻誤

第三葉八行

巴彥富也言林木茂盛也

脫言林木茂

盛也六字

第五葉十三行

查渾界二十里

脫十字

第六葉十行

南至莫楞山

脫至字

第七葉三行

蓋金之故城

脫之字

十五行

山海經

脫經字

第八葉二十行

長白山者

脫山字

第十一葉十三行

尼什哈山

脫尼字

第十三葉十五行

耕客山脫山字

十七行

兀朮山脫山字

第十四葉一行

噶哈嶺蒲泊五字衍

十八行

深不可測脫深字

第十五葉八行

地理志脫志字

十六行

東北入於海脫北字

第十七葉十二行

城內連上行爲文提行誤

第十八葉十四行

城內連上行爲文提行誤十六行城南二里許

云云同

十九行

猶有存之者之字衍

卷三

第一葉十五行

以此傳家者者字衍

第五葉八行
九行

十八年添設佐領八員驍

騎校八員十四字均衍文

十行

驍騎校十員脫十員二字

十四行

添設滿洲協領八員脫設字

第六葉十二行

添設二字衍

第七葉四行

編三姓新滿洲脫編三姓三字

添設佐領四員脫添設二字

五行

設立瑋春協領脫設立二字

編庫爾喀氣脫編字

添設佐領三員脫添設二字

大一百七十八
小九十七

六行

設三姓筆帖式二員脫設字

六十年改驛站監督作為

七品由無品級筆帖式補

放者作為八品此二十六字下乃接

雍正三年云云今刻皆脫去

十三行

副協領一員脫副字

一七行

協領一員脫員字

編打牲人脫編字

添設佐領六員脫添設二字

十八行

添設二字

十九行

編八姓打牲人等編字等字皆脫

与木小已可矣

三

第八葉十九行

添設佐領十員

脫添設
二字

副都統一員分爲二城

脫分

爲二城
四字

第十六葉二行

小注在城大東門外

脫東
字

卷五

第七葉十三行

支給存贖存糧數

上存
字衍

第十八葉四行

將餘贖參票

脫將
字

卷六

第四葉六行

當明季時

脫當
字

第五葉十四行

推究治道

脫究
字

第七葉二十行

存貯印庫目錄

六字連上
行爲文易

大一百七十六
小八十六

行誤

第八葉二行

八旗滿洲氏族

誤作世族
脫滿洲氏

三
字

第十四葉十一行

御書靈著幽歧匾額

八字應細
書與後文

將軍公署一例
下文十五行同

卷七

第一葉十一行

則地各九萬三千三百六

十三畝每畝徵銀二分米

四升四合下

此二十五
字皆衍文

不足額數

脫數
字

第四葉十一行

第八葉三行

小注看庫巡更

脫庫
字

第十一葉九行

小注看倉巡更

脫更字

第十六葉十二行

小注美其名曰

脫日字

十三行

小注生於榆者生於榛者

生於樟者

脫三字於字

十七行

小注惜採摘逾夜

惜字衍

第十九葉五行

小注有細細孔

重一細字

第二十葉一行

小注用以染阜

用以二字誤作滋

第二十一葉三行

小注巴圖魯

三字衍六行同

十四行

小注吉林正黃旗

脫吉林二字

第二十二葉十一行

小注巴圖魯

三字衍

卷八

第二葉一行

反在節後脫節字

第十葉十二行

登依勒哲站脫哲字

第十二葉四行

黃果木松木字

十一行

三道溝脫三字

第十三葉七行

並有作車上棚上字

十三行

調集省垣脫集字

第十四葉十三行

此三項允宜並重而其中

又以強壯便捷挽強有准

者為最斷不可沾染時俗

工於式樣架勢重字至工於二十六

字全脫

卷九

第一葉九行

敕撰

元碑 敕字僅空一格不應拍寫十二行

十五行同

第二葉七行

其兆

連上行為文提行誤

第三葉八行

諸君勉之往無不利

二句誤倒

十一行

天有顯道厥類惟彰

二句誤倒

二十行

潤色祖業

四字元碑作一句

第四葉一行

惟時聖明

四字元碑作一句誤倒

第五葉十四行

小注南接納嚕

脫接字

二十行

小注吉林烏拉四字國語

今以古雞林作證從漢字

六一百八十八
小八十八

卷十

音也

按雞林本非吉林薩氏此條蓋引盛京通志

志之文而駁之故自吉林烏拉提行其文曰吉林烏拉國語也從漢語

稱吉林已訛今又以漢語雞林州作證以訛傳

訛矣元文如此此刻既連上為文而又改易其

詞大失薩氏之本意矣

第三葉十四行

未能辦辨別

辨字

十五行

雙城子一帶

脫帶

第四葉十四行

儘數糊當年糊口

上糊字衍

第七葉八行

國帑

二字係內語不應抬寫諭旨

第十三葉十八行

預於道光二年

脫於字

第十四葉八行

以省運費脫以字

第十七葉九行

製給棉衣棉褲脫棉字

第十九葉十二行

將願赴雙城堡閑散脫赴字

十九行

全獲其地利地字

第二十一葉八行

亦難免保免字

十一行

飲飯飲字

第二十三葉四行

難保不無滋生事端無事

十四行

秋成收穫脫成字

第二十四葉一行

實屬數核計屬字

十行

五六兩年脫年字

第二十九葉三行

識滿漢文字脫字

大一百七十二
小一百五十二

五行

亦識滿漢文字
脫文

与木小已引奥

七

大十五
小八

吉林外記卷一

御製詩歌

御製松花江放船歌

康熙二十一年

松花江江水清夜來
雨過春濤生浪水
疊錦繡縠明綵帆
隨風輕簫韶小奏
中流鳴蒼巖翠壁
兩岸橫浮雲耀日
何乘流直下蛟龍驚
連檣接艦屯江城
貔貅健甲皆銳精
旌水翻朱纓我來問
俗非觀兵松花江
江水清浩浩瀚瀚衝
雲霞萬里開澄泓

經葉赫廢城

斷壘生初草空城尙
野花翠華今日幸
谷口動鳴笳
入烏拉境

蒼山岌巖路縣延野燒荒原起夕煙幾點寒鴉宿枯樹半灣流
水傍行旃

松花江網魚最多頒賜從臣

松花江水深千尺捩舵移舟網親擲漚洄水急浪花翻一手提
網任所適須臾收處激頽波兩岸奔趨人絡繹小魚沉網大魚
躍紫鬣銀鱗萬千百更有巨尾壓船頭載以牛車輪欲折水寒
冰結味益佳遠笑江南誇魴鱖徧令頒賜扈從臣幕下傳薪遞
烹炙天下才俊散四方網羅咸使登巖廊爾等觸物思比託捕
魚勿謂情之常

駐蹕烏拉之船廠憶壬戌春夏巡行此地每五日一奏請

聖祖母太皇太后安今不可得矣書志悵慕

曾問

慈甯草奏箋夜張銀燭大江邊重來往事俄追憶轉眼光陰十七年

烏拉山隩閒古木灌莽澤漉偏野卽黃龍府之地也今人未暇詳攷

賦詩二首

層岡翳蒼亂高低駿馬迎風不住嘶磧裏草深行潦闊遲回應惜錦障泥

路轉山環雜古柯覆茅苫舍傍坡陀疆隅湮沒遼金界虎穴鷹巢處處多

行圍所經輝發葉赫哈達諸屯皆我

祖宗之所聞并遺跡存焉賦詩二首

鐵馬金戈百戰時戎衣辛苦首開基
榻邊鼾睡聲先定始布中原一著棋

垣墉遺跡尙山坳略地平城闕土茅盪
絛塵沙真不易仰思遺烈駐雲旂

御製詩

乾隆十九年

七月五日東巡自避暑山莊啟蹕之作

避暑居停逮曉秋朝來清蹕啟龍旂
遠人宴賚鴻儀備炎月棲遲馬足休
怡悟茲來卽向往因思欲進每資畱
山田是處蔥華黍未敢先期道有收

上

大二百七十七
小十

陵誠蘊十年餘
晴日金風行色舒
山館南看障猶近
吉林東指路還紆
每懷侯度咨休助
常喜

慈寧奉起居
七萃率能知大義
寧因跋涉忽咨予

賜吉林將軍傅森

數處開牙盡有名
大東坐鎮翼陪京
將軍底事無勦勦
累洽重熙值太平

入伊屯邊門

部落行將遍吉林
望不遙迎人山色
近礙路漲痕消村
墅經楓葉邊牆進
柳條初來原故土
所遇匪新招瞻就
心何切勤勞意豈
驕省方逢大吉寶
穡報豐饒

賜吉林將軍及官員兵丁宴

三才少言才一

三

黃幔青山隔日晴沛豐懽宴浹羣情恩頒軍士皆鳥藻席預嘉

賓適鹿鳴時蒙古王公扈駕者亦令人宴卻喜多人能舊舞國朝喜起舞乃舊俗宴樂每用之俗

所謂嘛克新者也翻嫌小部鎮新聲本來此地無租賦底用當筵鱸減

征

駐蹕吉林將軍署復得詩三首

霏微夜雨曉來輕啟蹕油雲倏忽生幾點秋霖剛過陣滿空隔

日大開晴地靈信是庶祥兆人意都增悅豫情

天作高山景仰近應款切切繼

先誠

星漢南來直北流國語松阿里烏拉松阿里者即天河也漢語因名松花江紫迴漉沆衛神

州城臨鏡水滄煙上地接屏山綠樹頭輻輳關市中日往來

大三百三十四
小六半

舸艦織清秋設教圖入丹青畫應擬宣城謝氏樓

皇祖當年駐棨衙迎變父老尙能誇詎無灑掃因將敬所喜樸澆總

不奢木柱煙筒猶故俗紙窗日影正新嘉益中更有仙家草五
葉朱旒茁四楹

駐蹕庫勒訥窩集口占

窩集夫何許遙瞻已不凡真堪稱樹海乍可悟華嚴紫翠紛開
峒龍蔥鎖巖恰如望瀛渤未飲早知鹹

乾隆四十三年

人葭

深山邃谷中葭枝滋茁歲產旣饒世人往往珍爲上藥益神皋
鍾毓厥草效靈亦王氣悠長之一徵耳

奧壤靈區產神草三極五葉邁常倫即今上黨成凡品自昔天

公薦異珍

昔陶弘景稱人獲上黨者佳今惟遼陽吉林寧古塔諸山中所產者神效上黨之獲直同凡卉矣

氣

補那分邪與正

人獲固能扶羸濟弱然余謂其助正氣即助邪火而人多思藉以資補每受其害而不悟亦足

矣嗟口含可別偽和真文殊曰能活能殺冷笑迷而不悟人

貂

烏拉諸山林中多有之人以捕貂為恆業歲有貢貂額第其等

以行賞冬時供御用裘冠王公大臣亦服之以昭章采

東瀛物產富難詳美毳尤稱貂鼠良喜食松皮和栗實色惟重

黑乃輕黃

貂以豐厚純黑者為上黃又次之毛澤潤而香則以喜食松栗之實故也

蝨談被困蘇季

子狗盜獻嗤齊孟嘗狐白那堪相比擬名裘黼黻佐朝章

貂裘可作

常服三品以上大臣及京堂翰詹官皆得用之若為端罩惟以供餘則皇子諸王亦得用為朝祭之服

東珠

東珠出混同江

者亦如菽類王

出蚌陰精稱自

浦交州獨產分

之珠軒以四月

以所得之珠納

松子

松子諸山皆產

尺枝幹既茂故

窩集林中各種

瞻湧幾重

松子生松塔中其形下豐上銳層鱗鱗砌望之

鮮切

蚌含形磊落三稜五粒味甘濃僂佻曾遺堯弗受小矣子房學步蹤

法喇 挖牀也

似榻無足似車無輪冬日御之亦有施瓊幄及麕鹿皮圍者以馬牛騾挽行冰雪中穩捷便利

服牛乘馬取諸隨制器殊方未可移似榻似車行以便曰冰曰雪用皆宜孤篷雖遜風帆疾峻坂無愁銜楸危太液挖牀龍鳳飾椎輪大輅此堪思

拉哈

坊牆所綴麻也

築土甃坯爲牆壁以橫木約尺許爲一檔綴麻草下垂緣之以

施坊墁經久不倒亦國初樸素故俗也

層層坯上砌爲牆綴以漚麻色帶黃婦織男耕斯室處幼孳壯
作舊風蓐底稱鑿道顏家闔漫喻操嘻坊者王故俗公劉傳芮
鞠九重此況慎毋忘

霞綳

椽燈也

以蓬梗爲幹搏穀糠和膏塗之燃以代燭用資其亮開國勤儉
之風卽此可見

搏糠塗梗傳之膏繼日相資夜作勞土障葛燈應憶樸駝頭鳳
腦漫誇豪未知勤讀鄰鑿壁且佐服田宵索綯此日舊官試燃
者稱先何異土風操

周斐

樺皮房也

樺皮厚盈寸許取以爲室覆可代瓦甬作牆壁戶牖卽以山中
所產之木用之費不勞而工省滿洲舊風無殊周之陶復陶穴
也

野處穴居傳易傳去聲樺皮爲室鮮前聞風何而入雨何漏梅異

其梁蘭異芬占吉簷頭鵲常報防寒牆角鼠還熏稱名則古惟
淳樸卻匪斐然周尙文

賜吉林將軍福康安 乾隆四十二年

從征能奮武 福康安以侍郎命征剿金川奮勇著績錄其
功授嘉勇男世爵列紫光閣前五十功臣 貳部

亦通文知可棟梁任因教節鉞分迎鑾仍扈蹕鑿悃匪嘉勤汝

父家聲在 福康安爲故大學士
忠勇公傳恆之子 勉之尊所聞

賜吉林將軍慶桂 乾隆四十八年

連疆因覲謁屢蹕日趨隨雖未父書讀

慶桂乃尹繼善之子繼善詞臣出身慶桂由父

蔭得

官 猶存世德規俾之習政事

曾在軍機處行走

已可鎮邊陲夫子訓

孟武其言汝尙思

慶桂多病且尙有生母故訓之

賜吉林將軍秀林

嘉慶十年

皇清發祥始福地接與京境擅山川異人皆弧矢精抒忠盡汝

職務本副予誠訓練咸英銳舊章慎勿更

賜吉林將軍松栝

嘉慶二十三年

天造邦家肇吉林實故鄉白山發祥遠黑水溯源長守土依前

則詰戎率舊章頑民勤教化務令順綱常

仿通志首列

天章所以尊

聖訓而昭敬謹也

薩吉夫主政以所編吉林外記見示載尙書富松巖師惠政
多因題其後
馬瑞辰 元伯

挹婁陳蹟久難尋安樂今傳治世音都會盡浴新鴨水醕風直

湖古雞林金城

雙城堡爲金時故城

獨纂農桑要

王毓香太守新編雙城堡屯田記略三屯乃松

巖師

玉塞三瞻聚戟臨

松巖師三任吉林將軍

賴有文人能載筆桑陰記

遍又棠陰

元伯安徽桐城人進士出身初任至工部郎中因公獲罪遣

戍瀋陽城委書院山長生徒中式二名著有成效將軍富俊

奏

賞主事銜升工部副郎又獲咎遣戍黑龍江捐贖回籍見此記前篇

大三百一十八
小九十六

故有此作

吉林外記卷一

六十七
五

吉林外記卷二

疆域形勝

山川

城池

疆域形勝

吉林烏拉在京師東北二千三百里我

朝發祥之始爲滿洲虞獵之地順治十五年因防俄羅斯造戰船於此名曰船廠後置省會移駐將軍改名吉林烏拉寧古塔伯都訥三姓阿勒楚喀打牲烏拉各城隸焉國語吉林治也烏拉江也以軍民住居沿江之一帶也康熙二十四年間

諭旨內謂幾林烏喇舊志又謂吉臨烏喇曰幾與吉臨與林漢字音

同也今通稱吉林從漢語之譌省文也然於國語不相屬焉其境南至訥秦窩集七百三十里至

長白山一千三百里東至都嶺河盛古塔界四百里西至威遠堡盛京界五百七十里北至法特哈門黃山嘴子伯都訥界一百九十五里遠迎

長白近繞松花扼三省之要衝爲兩京之屏障是吉林烏拉之形勝也

布特哈烏拉舊爲那拉氏布占泰貝勒之國

太祖討平之授其子孫官職編戶萬家舊城臨江康熙二十四年改築於舊城之東防水患也

聖祖巡幸駐蹕謂黃龍府卽其地賦詩有疆隅湮沒遼金界虎穴鷹

巢處處多之句布特哈譯言虞獵也烏拉江也故有打牲烏拉之稱打牲漢語也烏拉國語也連讀之則以烏拉爲地名於國語亦不相屬焉通志亦作打牲烏拉城在今省城北七十里南至三家村四十里北至康家屯六十八里東至團山子二十三里西至恩丕口二十四里皆與省城連界峰呈東嶺屏列一方水漾松花帶環三面是布特哈烏拉之形勝也以後吉林烏拉書吉林布特哈烏拉書烏拉從漢語省文也

伊通河以河得名河源出額黑峰北出邊外入混同江舊志作易屯河而於河出邊之處又曰一統門易屯一統皆伊通之訛音也在省城西二百九十里東連省會西達開原兩省通衢一水環繞是伊通河之形勝也

額穆赫索囉舊窩集部地也以額穆和湖得名索囉國語賚也
太祖命貝勒巴雅喇率兵征東海取鄂摩和索囉屯寨即此額穆赫
也音同字異今漢語直稱為額穆索矣在省城東三百六十里
山備三方水環一帶是額穆赫索囉之形勝也

巴彥鄂佛囉邊門舊名法特哈以山得名山在法特哈江西高
十餘步周數十步形如象蹄山根下有蹄爪之痕

聖祖巡幸駐蹕指門外黃山嘴子改名巴彥鄂佛囉門在省城東北
一百八十里門外至黃山嘴子十五里伯都訥界國語法特哈
蹄也巴彥窩也鄂佛囉山嘴也

伊通門即易屯邊門又稱一統門在省城西北一百九十里門
外長春廳界

大曆百七十七
小五

黑爾蘇邊門卽克勒蘇門黑爾蘇

長白山西北河名稱克勒蘇者漢語還音之訛舊志亦作黑爾蘇
在省城西北四百六十七里門外蒙古界

布爾圖庫邊門舊名布爾圖庫蘇巴爾漢又名半拉山門布爾
圖庫未詳或稱蒙古語完全之義蘇巴爾漢國語塔也以門之
東南塔山爲名乾隆年間奉部文裁蘇巴爾漢四字惟稱布爾
蘇庫舊志稱布兒得庫蘇巴爾漢門在省城西北四百六十里
門外蒙古界

以上四門自法特哈東亮子山至布爾圖庫西威遠堡門圍長
六百二十二里邊柵高四尺五寸邊壕寬深各一丈

聖世遐邇晏康貢琛萬國邊門之設誌疆域也

長春廳蒙古郭爾羅斯地也郭爾羅斯公恭額拉佈坦私招內地民人張立緒等開地嘉慶四年奉

旨派將軍秀林會同盟長拉旺前往查辦將軍秀林等以事閱多年已開地二十六萬餘畝居民二千餘戶未便驅逐

奏請設立通判巡檢彈壓歸吉林將軍管轄在省城西北二百八十里南至伊通邊門十五里省城界東至穆什河一百九十里西至巴延吉魯克山四十里北至吉家窩鋪一百七十二里皆蒙古界枕山帶河遠鎮沙漠是長春廳之形勝也

寧古塔國語數之六也 開國方略

六祖各築城分居稱寧古塔貝勒因以爲名又稱以塔爲者附會也城在今省城東南五百九十里南至土門江朝鮮界六百里東

至海三千餘里西至都嶺河吉林界二百五十里北至混同江
蒙古界六百里南瞻

長白北繞龍江允邊城之雄區壯金湯之

帝里是寧古塔之形勝也

琿春以河得名與朝鮮清源府僅隔一江晝則樵採相望夜則
更鼓可聞

太祖時已有此地八旗世族通譜謂爲舒穆魯氏滿洲喜爾泰所居
之地喜爾泰大學士舒赫德曾祖也地在省城東南一千二百
里南至海一百一十里北至佛思恆山一百二十里寧古塔界
東至海二百八十里西至土門江二十里朝鮮界左環滄海右
帶門江外控高麗內屏重鎮是琿春之形勝也

伯都訥蒙古謂鶉日布都訥今通稱伯都訥者轉布爲伯也舊志作伯都納

國初錫伯所居之地錫伯蒙古別族也或稱有蒙古台吉薩顏岔一戶居住此地今伯都訥蒙古佐領卽其遺屬也城在今省城西北五百四十里南至松花江郭爾羅斯查渾界二里西至同東至蘭陵河阿勒楚喀界一百三十里北至松花江郭爾羅斯八圖界七十里江帶三方田沃萬頃是伯都訥之形勝也

三姓又名依蘭哈拉國語依蘭三哈拉姓也乃努葉勒葛依克勒湖西哩三姓赫哲也赫哲俗稱黑津指黑水爲名也通志稱黑眞

聖祖時三姓赫哲貢貂皮編三姓族長爲三世管佐領因以名城城

在省城東北一千三百里南至阿穆爾河勒山古塔界二百八十六里北至布雅密河古木訥城黑龍江界四十里東至海四千八百里西至占哈達阿勒楚喀界二百八十里雙江帶環兩山屏障是三姓之形勝也

阿勒楚喀以水得名宋史女貞國居按出虎水之上通志金始祖居布爾噶水之涯至獻祖定居於阿勒楚喀水之側舊作按出虎此爲女貞舊地無疑按清字音按與阿似近出字與楚字同虎字首與喀字首同本處人習於國語轉音之訛也俗稱阿什河亦按出虎之訛音也舊志作阿爾楚喀城在省城東北四百六十里南莫楞山一百二十里伯都訥界北至松花江七十里蒙古界東至馬彥河二百里三姓界西至蘭陵河一百二十

里伯都訥界松花北繞蘭陵東注是阿勒楚喀之形勝也

拉林舊志稱蘭陵以河得名清字拉與蘭林與陵音母同而轉音不同今通稱拉林轉音之訛也地在省城東北四百里南至拉林河二十里伯都訥界北至松花江一百八十里黑龍江界東至阿勒楚喀河五十里阿勒楚喀界西至拉林河五十里伯都訥界山環東北水繞西南是拉林之形勝也

雙城堡舊名雙城子拉林多歡站西北二十里有土城基二相去甚近城基周圍皆不及一里自城基北叢草迷離間有居民迤邐百餘里統而名之曰雙城子蓋金故城而莫攷其詳也舊屬拉林協領管界嘉慶二十年將軍富俊軫念旗丁生計親詣履勘以斯地坦平沃衍可以移駐京旗間散二三千戶

大五百一十一
小五

奏定先撥本省間散開種後移駐京旗設立中左右三屯每屯八旗各旗各分兩翼居中者爲中屯東爲左屯西爲右屯計人授畝有古井田遺風設協領等官督耕並資彈壓地在省東北四百九十里東西距一百三十里南北距七十里四面仍皆是拉林界阿勒楚喀在其東伯都訥在其西實省北之大屏障蘭陵西繞松花東注南河北江前襟後帶是雙城堡之形勝也

山川

長白山山海作不咸山唐書作太白山明一統志云在故會寧府南六十里橫亘千里高二百里其巔有潭周圍八十里舊志云在永吉州東南一千三百餘里按故會寧府在寧古塔西南六十里湖爾哈河之南今其內外城遺址俱在永吉州卽今吉林

靈古塔在吉林東南五百四十餘里

長白山庵在會靈府西南六百餘里康熙十六年內大臣武木訥等六月三日由吉林烏喇啟行十六日至山麓則舊志所云在永吉州東南一千三百餘里者是而明一統志所云在故會靈府南六十里者非然康熙二十三年駐防協領勒出等周圍相山形勢廣袤縱亘與明一統志所云無異則其所云在會靈府南六十里者或因金大定十二年卽山北建廟冊爲興國靈應王有司致祭如今之望祭山人人稱爲小白山遂指其建廟處而言歟或山之北延袤盤曲爲岡爲陵指其支裔而言歟山之靈異惟目睹爲真因錄方渭仁

長白山記於左

長白山記

遂安方象瑛渭仁著

康熙十有六年四月望

上以長白山發祥要地

特命內大臣覺羅武木訥一等待衛兼

御前侍衛費耀色一等待衛塞護理等於大暑前馳驛往五月四日

啟行十四日至

盛京二十三日至烏喇宣

諭鎮守將軍等召村莊獵戶皆無知

長白者都統尼雅漠族祖載穆布魯世採獵以老退閒自言祖居額赫訥陰聞其父嘗云獵鹿

長白山負以歸四日可抵家以此度之

長白山距訥陰當不遠因問訥陰路幾何獵戶噶喇大額黑等曰
陸路行十日水路乘小舟二十日乃命獵人噶喇前導各持三
月糧又慮食盡馬乏不能歸也期將軍巴海載米一舟候於訥
陰於是噶喇大額黑等由舟覺羅率固山大薩布素由陸六月
三日啟行經文德赫恩河阿虎山庫納訥林雅爾薩河渾陀河
法布爾趾河那丹鄂佛羅地方輝發江拉法河水敦林巴克塔
河納爾渾河敦敦山卓龍窩河凡數十處抵訥陰而噶喇大等
亦至蓋自江逆瀋由瓦努湖河至佛多和河復順流來會纔七
日耳十一日發訥陰一望林莽迷不得路薩布素率旗甲二百
人伐木開道十二日悉眾行是日薩布素遣顧素等先後馳報
前進約百數十里登一山升樹而望遙見遠峯白光片片殆長

白山也因雷鳴喇大額黑督采珠蚌十四日與薩布素等會密
樹茂林揣摩開路十六日黎明聞鶴鳴六七聲雲霧迷漫不復
見山乃從鶴鳴處覓徑得鹿蹊循之以進則山麓矣始至一處
樹木環密中頗坦而圓有草無木前臨水林盡處有白樺木宛
如栽植香木叢生黃花爛熳隨移駐林中然雲霧漫漫無所見
也眾惶惑虔誦

綸音禮甫畢雲披霧捲歷歷可觀莫不歡呼稱異遂攀躋而上有勝
地平敞如臺遙望山形長闊近視頗圓所見白光皆冰雪也山
高約百里五峯環繞憑水而立頂有池約三四十里無草木碧
水澄清波紋蕩漾繞池諸峯望之搖搖若墜觀者駭焉南一峯
稍低宛然如門池水不流山間則處處有水左流爲松阿里烏

喇河右流爲大小訥陰河膽眺之頃峯頭游鹿羣皆駭逸惟七鹿忽墜落眾喜曰神賜也蓋登山適七人時正乏食拜而受之回首望山倏復雲霧遂於十八日南回至前登山高望處一氣杳冥並不見有山光矣二十一日至訥陰河合流處二十五日至恰庫河則訥陰東流合處也二十九日由恰庫河歷色克騰圖白黑噶爾漢噶大渾薩滿薩克錫法克錫松阿里多渾大江險絕處凡九七月二日次烏喇十二日抵寧古塔遍閱會寧諸府八月二十一日還京具疏聞

上以發祥之地奇蹟甚多山靈宜加封號下內閣禮部議封爲

長白山之神歲時享祀如五嶽焉夫封山之典肇始唐虞然報祀嶽瀆非有關於鍾祥之自也志稱長白山橫亘千里高二百里

巔有潭周八十里南注爲鴨綠北流爲混同

國家隆興所自然至今無知其處者

睿慮周祥穆然念

祖宗所由出專官訪求備歷險異卒光大典以答神庥其享天心而致靈貺宜哉謹摭原疏綴葺爲記用志於萬世無疆之盛云

記內烏喇卽吉林烏拉也

望祭山卽溫德赫恩山志稱溫德恒山在城西南九里高一百五十步週五里每歲春秋於山上望祭

長白山之神雍正十一年建望祭殿於此國語溫德赫恩板也

什哈山卽龍潭山國語小魚曰尼什哈山之東北有小河出小魚因以名山山在城東十二里高三百步周十里四面陡壁西

北有車道盤旋而上至其巔林木尤勝南行百餘步路旁有一池石砌相傳謂鯽魚池也北有龍潭周五十餘步水色碧而黑無論水旱無長無落周圍山高樹密遮蓋水面望之寂然遊人以繩繫石投之數十丈未得其底相傳

國初時潭中有鐵鎖繫於井木之上撼之則山樹動搖後立廟會男女觀者旅旅褻瀆一夜大風暴雨雷電交作井木斷折鐵鎖亦失所在潭之西南有二石穴外狹而內闊伏而入之可以容身無敢深入者探之黑暗有風又東南林內有樺樹一株高九丈餘徑二尺上下標直枝葉剪齊乾隆十九年

高宗純皇帝東巡封爲神樹春秋祭祀與龍潭同日

一拉木山卽東團山在松花江之東距城八里國語依蘭數之

三也依與一蘭與拉音同一拉木者轉音之訛也曰東團山者所以別於西也西團山亦距城八里兩峯相對有左右拱峙之勢焉

北山在城外演武亭北高三百餘步層巒環抱廟宇翬飛俗以廟名其山曰玉皇閣迤東名元天嶺岡巒起伏東西綿亘四十餘里實城北一大屏障也

塞齊窩集穆魯在城東二百九十里俗稱張廣財嶺國語塞齊開闢也窩集密林也穆魯山梁也昔有民人張廣財在此開設旅店行者遂以名嶺嘉慶二十年將軍富俊巡寧古塔城十月初五日住宿山店初六日於山嶺頂席地叩祝

萬壽

禮成後改名嵩嶺自嶺西至嶺東八十里叢林密樹南接英額

嶺北通三姓諸山東西石路崎嶇僅容一車東出密林至額穆
赫索囉四十八里

長白望祭尼什哈一拉木北山嵩嶺之外山之著名通志者有拉

發峯倚努山額敦山娘爾馬峯珠魯木克善峯紅石礮子山歪

頭礮子山分水嶺喀巴嶺康山刪嶺湖淪嶺撤木禪山俊團山

巴彥博多料山阿脊草峯佛爾門山聖音吉林峯佛思恆山飛

得力山南勒克山北勒克山在伊通邊門西南元嘉博多克山阿虎峯何屯

朔山額黑峯薩克薩哈山博多克山墩臺山色黑力山八巖喀

喇山科七客山哈蘇蘭山衣蘭木哈連山寮蘭山烏綠梨山黑

嘴山吉林峯盞蘭峯壽山長嶺子古城山半截塔山白石山衣

車峯昂阿西峯德爾肯山阿脊草何托峯昂邦何托峯扎克丹

峯勒幅山鈕黑嶺查庫蘭山香嶺八巖山木當阿煙台山哈兒

飛爐山蒙古谷今稱絲花街納兒渾山富兒哈山大央阿嶺大央阿

山牙奇山五里山羅衫山台山博爾科山鄧噶喇山耕客尼馬

呼山納爾渾山愛新山大奇木魯山年馬州山敦珠虎山烏爾

監峯貴勒赫峯牙克薩山威遠堡山嘉色山兀朮屯齊嶺雅呼

達山珠魯木哈連峯虎駐嶺阿兒灘額墨爾山今稱大孤山珠魯喀

爾必庫伊通河之左右兩邱也虎坤堆黑兒蘇山噶哈嶺蒲泊山驢子峯

色黑勒峯法西蘭峯羅羅峯馬鞍山噶哈嶺蒲泊額黑烏郎吉

山博屯山臘壺塔山北勒克山布兒圖庫蘇巴兒漢山今稱半拉山

西兒灘鄂佛囉山金珠鄂佛羅山商監峯法特哈鄂佛囉山今稱

山獸蹄伊漢山法兒馬峯色黑力山墨枝山加松阿山箴籬山烏

兒渾山通墾山英愛山蘇大路山輝賀洛峯窩黑脊峯希喀塔
山壺蘭峯布臘山查哈喇峯壁郎吉山峩兒滾爾山庫勒克山
蘭陵山荒山哈爾哈山索多和山西里門山和爾托科山錦往
峯團山牛山伐士蘭峯撒爾達山弗河庫山皆在境內拒省城
近者數里遠者數千里大半皆國語音譯多訛僅就通志之所
載取而錄之以俟後之攷正

松花江近城由西南繞東北流一名粟末水或作速末魏書勿
吉國有大水闊三里餘名速末水唐書靺鞨依粟末水以居水
源於太白山至北注沱漏河是也一名鴨子河一名混同江遼
史聖宗太平四年詔改鴨子河曰混同江金史太祖收國元年
親征黃龍府次混同江無舟金主使一騎前導乘赭白馬徑涉

曰視吾鞭所指而行諸軍隨之水及馬腹後使人視其渡處不可測大定二十五年冊混同江之神爲興國應聖公立廟致祭其文曰江源出於

長白是也一名宋瓦江卽松花之變音明一統志混同江在開原北一千五百里源出

長白山舊名粟末水俗呼宋瓦江北流經金故京會寧府下達五國城頭東入於海是也國語松花江名松阿哩烏喇天河名松阿哩故漢語名曰天江乾隆十九年

東巡賜天江鎖鑰額懸將軍署四十三年

東巡詠盛京土產詩十二首內松花玉出混同口長白分源天漢江是也此歷代稱名之異也地理謂上京路有混同江宋瓦江鴨

子河是岐而三之也一統志既謂混同江在開原城北一千五百里俗呼宋瓦江又曰松花江在開原北一千里是岐而二之也金史帝紀謂混同江亦名黑龍江是又指下流兩江交會處言之也按松花江發源於

長白山北至吉林折而東又北出法特哈邊門至伯都訥受嫩江又東北至三姓北受黑龍江南受烏蘇哩江又東入於海其原委如此

寧古塔西南百里有一大湖名曰鏡泊本處人呼爲必爾特恩卽今阿布湖也源出

長白山羣流湊集至此遂成巨浸廣五六里袤七十里許湖之西南曰虎兒哈河東流入湖之處有一崖曰呼庫圖崖呼庫圖未

詳湖水東注飛瀑躡空奔浪雷吼聲聞數十里謂之響水又名發庫國語魚梁也三四月間日出時水光日色紅綠相映霞彩繽紛崖下奇花異草未易名狀今攷本處人言湖水東流自湖東北口出湖之處有一崖陡壁凌空水勢懸流飛過數十丈行人經過崖下滴水不沾名曰弔水樓

城池

吉林城東西北三面築土爲牆共一千四百五十一丈基寬五尺頂寬二尺五寸高一丈南面倚江無牆西一門東二門偏北曰大東門偏南曰小東門北二門偏西曰大北門偏東曰巴爾虎門康熙十二年兵力修建乾隆七年改爲官修

城內五街由將軍公署通大東門曰河南街通小東門曰糧米

行街通大北門曰北街通西門曰西街大西街每街由吉林廳挑放鄉地各一專管呈報軍民命盜事件街道俱用木板鋪墊按左右翼適中地界均有各旗堆撥輪派官兵防守稽察鋪商惟北街西街最盛

舊城

尼什哈城在城東十二里龍潭山上週圍二里南一門北二門一拉木城在城東南八里一拉木山上週圍一里許東北各一門東西南三門有外城週圍二里許南一門相傳係當年瞭望處常登其巔四望極遠中不平坦又無屋基說近是

葉赫城在城西四百九十五里舊爲葉赫貝勒所居方四里東西各一門西北有葉赫山城有葉赫商監府城

輝發城在城南二百七十里吉林峯之上方二百步西一門附近
有輝發峯下有輝發河城

吉林所屬之伊通額穆赫索囉長春廳等處無城

烏拉城築土爲牆週圍八里基寬三尺高八尺東西南北各一
門康熙四十二年建

城內無市廛惟西門外有向西及南北街市商賈輻輳

寧古塔城四圍土坯砌成內外細泥坊飾方五百八十五丈基
寬二尺頂寬一尺八寸高六尺五寸東西南各一門北無城門
康熙五年兵力修建乾隆四十二年改爲官修

城內無市廛居民鋪商俱在東西南門外惟東門外尤爲叢集
居民俱在南門半里許沿江一帶

蓋古塔所屬之琿春無城

伯都訥城四圍土坯砌牆兩面細泥圻飾方一千三百五十丈
基寬三尺五寸頂寬二尺五寸高八尺東西南北各一門康熙
三十二年兵力修建乾隆三十九年改爲官修

城內鋪商均在南街北街無市東卽星散西尤蕭疎

伯都訥所屬之孤榆樹無城

三姓城四圍築土爲牆方一千二十六丈基寬五尺頂寬二尺
五寸高七尺東西南北各一門康熙五十四年兵力修建乾隆
十七年改爲官修

城內無街市惟西門外街市甚盛

阿勒楚哈城四圍板牆方七百四十五丈乾隆四十八年改爲

土牆基寬三尺頂寬一尺六寸高七尺東西南北各一門雍正七年兵力修建乾隆三十五年改爲官修

城內無街市惟西門外商賈輻輳街道俱係石板鋪墊近亦傾圮不便行旅

城南二里許有金顯祖建都故城俗稱白城有謂爲五國城者誤方四十里高丈餘城壕深六尺許東西南北各一門內有小城及宮殿舊址該處居民嘗挖得金玉銅磁諸器及古銅錢現在猶有存之者該處仕宦住宅腳石及鋪街石板凡有雕花文者俱由此城攜去今過此地滿城稼穡一望荒涼城西門外二里許有土崗一座高丈餘相傳爲當時點將台云

雙城堡城基方

丈城壕挖竣尙未修城

阿勒楚喀所屬之拉林無城

吉林外記卷二

大二百二十二
小五

吉林外記卷三

滿洲蒙古漢軍

建置沿革

驛站

船艦

橋梁

滿洲蒙古漢軍

吉林本滿洲故里蒙古漢軍錯屯而居亦皆習爲國語近數十年流民漸多屯居者已漸習爲漢語然滿洲聚族而處者猶能無忘舊俗至各屬城內商賈雲集漢人十居八九居官者四品以下率皆移居近城三二十里內侵晨赴署辦事申酉閒仍復

回屯其四品以上職任較繁者不得不移居城內子孫遂多習漢語惟賴讀書仕宦之家防閑子弟無使入莊獄之間娶婦擇屯中女不解漢語者以此傳家者庶能返濱還樸不改鄉音耳滿洲有佛伊徹之分國語舊曰佛新曰伊徹

國朝定鼎以前編入旗者爲佛滿洲佛滿洲內有貝國恩布特哈之分貝國恩國語戶也布特哈虞獵也

國初協領佐領由京補放子孫遺居立戶於此謂之貝國恩舊在白山一帶虞獵爲生者謂之布特哈伊徹滿洲內又有庫雅喇之分庫雅喇非一部一姓有卽以庫雅喇爲姓者有庫雅喇人而別姓者其居多在寧古塔以東定鼎後入旗伊徹滿洲居三姓烏蘇哩東西入旗又在庫雅喇以後庫雅喇與伊徹滿洲實截

然兩項其世襲佐領亦各有分晰故各項伊徹滿洲世襲佐領曰伊徹滿洲佐領庫雅喇世襲佐領曰庫雅喇佐領佛滿洲之異於伊徹滿洲者先世隨同

太祖

太宗撥亂反正立有戰功總之佛與伊徹庫雅喇皆滿洲也其編入八旗鑲黃正白鑲白正藍爲左翼正黃正紅鑲紅鑲藍爲右翼左右翼國語曰達斯歡噶喇哲伯勒噶喇

佛滿洲同族在京者有世襲佐領吉林惟正黃旗有一世襲佐領色佈青額係布特哈佛滿洲人查檔其始祖岱山於康熙十三年率族眾投進寧古塔

恩賞世襲佐領然則佛伊徹滿洲之分不待定鼎入旗而國初之先

已早有分別矣。庫雅喇伊徹滿洲率族眾來投者，遂編其穆昆達爲世襲佐領，阿喇哈穆昆達爲世襲驍騎校，率所屬來投者，遂編其嘎山達爲世襲佐領，法拉哈達爲世襲驍騎校。自雍正年間，將世襲驍騎校裁爲公缺，猶有嘎山達、法拉哈達、世襲佐領者，穆昆達、漢語族長也。阿喇哈漢語副也，嘎山達鄉長也。法喇哈達里長也。故伊徹滿洲佐領下同姓者居多，不似佛滿洲佐領下姓氏繁多也。陳蒙古俱編入滿洲八旗，各佐領下均有二、三戶，六、七戶不等。新蒙古亦有世襲佐領，陳漢軍編入滿洲鑲黃、正白兩旗，另立漢軍佐領二。

蒙古亦有新陳之分，錫伯、瓜勒察乃兩大部。

太祖癸巳蒙古科爾沁暨葉赫等九國犯我，此二部卽在其內。至天

命四年蒙古科爾沁之嫩烏拉以南凡語言相同之國俱征服而統定錫伯瓜勒察早編入蒙古旗矣天命七年八年及天聰三年喀勒喀諸部貝勒台吉等屢率所屬來歸天聰九年察哈爾林丹漢死其屬紛紛來歸遣將率兵往收之舉國內附是年各處蒙古俱歸降其居故土者爲藩服其編入旗者卽陳蒙古也至後投入旗之新蒙古喀勒喀則台吉阿玉喜之裔也至喀勒喀全部之八十札薩克卽今之蒙古外八十旗也巴爾虎台吉阿玉喜之屬下人阿玉喜家譜內初編佐領阿玉喜之姪綽斯克爲巴爾虎世襲佐領可證也錫伯瓜勒察則

太祖時歸服之遺分屬蒙古各王公旗下後投入旗二項人最眾伯都訥本其舊部故康熙三十一年將吉林副都統移駐伯都訥

除吉林編設錫伯人等十六佐領外伯都訥編設錫伯佐領三十瓜勒察佐領十至康熙三十八年伯都訥錫伯瓜勒察移駐盛京乃將佐領裁汰今伯都訥所居錫伯乃京王公包衣人有包衣達管之不入旗當差至伯都訥瓜勒察其人相傳

聖祖巡幸吉林時念其隸於蒙古每戶賞銀八十兩贖歸入旗檔案殊無證據

漢軍編入滿洲鑲黃正白兩旗者皆爲陳漢軍其後安置之新漢軍自

國初卽有十官莊二十六駟站二十七邊台官莊當種地打樺皮差使稱曰莊丁駟站當馳送文報差使稱曰站丁邊台當查邊設立柵壕差使稱曰台丁皆另設官治之非如滿洲蒙古卽於

本旗本翼內揀選也官莊台站三項設立年分檔案已失順治十五年造戰船康熙二十二年造運糧船設立水手營稱曰水手其官卽於官莊台站水手之入會稽司者揀選水手營入會稽者八百五十六戶官莊台站無攷雍正十一年揀選台站水手營閒散官莊打樺皮壯丁一千名設立烏槍營與滿洲蒙古陳漢軍一體當差

建置沿革

吉林古肅慎氏遺墟漢晉挹婁國南北朝勿吉地唐燕州黑水府渤海大氏龍泉府遼長春州金恤品路元合蘭府水達達路明設衛所

順治元年悉裁諸衛設內大臣副都統及每旗駐防十年原設

寧古塔昂邦章京一員副都統一員十八年添設佐領八員驍騎校八員十三年添設防禦四員十八年添設佐領十員防禦二員驍騎校康熙元年將昂邦章京改爲鎮守寧古塔將軍三年添設駙站監督六品官一員佐領一員七年添設協領二員十年由寧古塔移駐吉林副都統一員佐領十一員驍騎校十一員吉林添滿洲協領八員防禦八員庫雅喇佐領十二員驍騎校十二員十三年添設防禦十五員管戰船運糧船四品官二員五品官二員十五年寧古塔將軍移駐吉林吉林副都統一員移駐寧古塔吉林另放副都統一員十六年添設新滿洲佐領二十六員驍騎校二十六員管戰船運糧船驍騎校二員十七年添設新滿洲佐領三員驍騎校三員二十年添設巴彥鄂佛

囉伊通黑爾蘇佈爾圖庫等四邊門防禦四員筆帖式各一員
二十三年管戰船四品官五品官驍騎校移駐黑龍江二十五
年添設吉林運糧船四品官二員五品官二員六品官二員添
設驛站監督六品官一員二十九年移駐黑龍江佐領二十五
員防禦十四員驍騎校二十五員吉林添設滿洲佐領五員錫
伯漢軍佐領二員防禦十四員驍騎校七員漢軍佐領一缺由
京補放添設醫官一員三十一年添設倉官一員由本處補放
添設伯都訥印房左右司筆帖式四員吉林副都統移駐伯都
訥添設滿洲佐領六員驍騎校六員錫伯佐領十六員驍騎校
十六員喀勒喀巴爾虎佐領八員驍騎校八員又添設錫伯佐
領三十員瓜勒察佐領十員添設協領二員防禦八員驍騎校

三十本夕言卷二
四十員二十三年添設左右翼助教官二員蒙古繙譯筆帖式
二員俱由

盛京八品筆帖式內補放三十三年添設管檔主事一員由吉林
本處選放添設蒙古繙譯筆帖式一員三十四年添設伯都訥
倉官一員三十八年添設滿洲佐領一員驍騎校一員錫伯移
京裁汰佐領十六員驍騎校十六員錫伯瓜勒察等移

盛京裁汰佐領四十員驍騎校四十員四十年裁汰協領六員添
設蒙古佐領二員驍騎校二員四十五年添設靈古塔佐領三
員防禦三員驍騎校三員添設滿洲瓜勒察佐領十員驍騎校
十員五十三年設立三姓協領一員防禦四員新滿洲佐領四
員驍騎校四員筆帖式二員琿春協領一員防禦二員庫爾喀

氣佐領三員驍騎校三員庫爾喀朝鮮附近居住滿洲三姓筆帖式二員雍

正三年添設吉林副都統一員阿勒楚喀協領二員佐領五員

防禦二員驍騎校五員筆帖式二員四年添設伯都訥教習官

一員裁汰巴爾虎佐領一員驍騎校一員添設陳漢軍佐領一

員驍騎校一員五年添設永吉州知州一員吏目一員寧古塔

教習官二員伯都訥長寧縣知縣一員典史一員三姓副都統

一員教習官二員琿春協領一員吉林管檔主事一員改為由

京補放添設阿勒楚喀教習官一員六年移駐伊通河佐領二

員驍騎校二員由開原移駐防禦二員驍騎校二員八年添設

吉林獄官一員九年改吉林左右翼助教官二員由本處選放

十年添設三姓副都統一員協領一打牲人佐領六員防禦四

員驍騎校六員裁汰副協領一員添設八姓打牲人佐領十員
驍騎校十員左右司筆帖式二員教習官二員由烏拉包衣閒
散人等挑選兵一千名添設滿洲協領二員佐領十員防禦八
員驍騎校十員在吉林當差添設阿勒楚喀佐領三員驍騎校
三員十一年添設三姓防禦八員十二年添設永吉州學正一
員乾隆元年添設烏鎗營參領一員佐領八員驍騎校八員參
領佐領缺由京補放裁汰琿春副協領一員阿勒楚喀副協領
一員二年添設吉林刑司主事一員九品筆帖式二員理事通
判一員三年添設額穆赫索囉佐領一員防禦一員驍騎校一
員四年由筆帖式四員內改緝譯筆帖式二員添設三姓倉
一員倉筆帖式二員五年移協領二員佐領十員防禦八員驍

騎校十員並原挑選打牲兵一千名於烏拉地方當差九年添設拉林倉官一員倉筆帖式二員阿勒楚喀筆帖式二員移駐拉林添設拉林副都統一員協領一員十二年裁汰永吉州知州改設吉林理事同知裁汰吏目改設巡檢裁汰州同典史改設巡檢一員十三年裁汰刑司主事一員九品筆帖式一員二十一年添設阿勒楚喀倉官一員筆帖式二員拉林教習官一員由三姓移駐拉林佐領五員防禦八員驍騎校五員添設阿勒楚喀副都統一員二十五年由繙譯筆帖式內改設蒙古繙譯筆帖式一員添設拉林筆帖式二員由烏拉移駐靈古塔佐領二員驍騎校二員二十六年裁汰巡檢改設辦理蒙古事務委署主事一員二十七年由拉林筆帖式四員內移駐阿勒楚

喀二員添設吉林委官六十員拉林四員阿勒楚喀四員烏拉
四員伊通河六員額穆赫索囉四員寧古塔三十員琿春九員
三姓十五員伯都訥十二員由三姓移駐阿勒楚喀拉林佐領
五員二十八年裁汰理事通判一員烏鎗營佐領缺改爲本處
陳新漢軍驍騎校內選放三十年編巴爾虎錫伯人等入蒙古
旗添設蒙古協領一員裁汰烏拉協領一員防禦四員移駐寧
古塔三十四年裁汰拉林副都統歸阿勒楚喀管轄由拉林移
駐阿勒楚喀防禦四員筆帖式二員三十九年由阿勒楚喀移
駐拉林防禦一員四十二年烏鎗營參領缺改由本處陳新漢
軍佐領內選放改漢軍佐領一缺由本處新陳漢軍驍騎校內
選放三十四年由拉林移駐阿勒楚喀筆帖式二員四十年添

設烏拉

檔主事

員巡檢

員添設

檢一員

三年裁

姓驍馬

實任由

盛京義州

滿洲正

領烏拉

設雙城堡委官六員二十五年添設阿勒楚喀繙譯筆帖式二員雙城堡協領處筆帖式二員中左右三屯六佐領處各添筆帖式一員添設雙城堡協領處委官二員中左右三屯六佐領處添設委官各一員道光六年寧古塔防禦十二員內移駐拉林四員添設關防無品級筆帖式二員卽由拉林領催內選放

以上裁添文職俱與現額相符其餘武職不符額數歷年已遠冊檔不全一時難攷然因革損益爲記載之所不可闕姑照造報志書館舊冊開列以俟後之詳查

驛站

吉林共三十八站分兩路監督統轄城內各設關防公所一處

關防筆帖式一員關防領催一名每站設筆帖式領催各一名
東路意氣松他拉二小站未設筆帖式歸鄰站筆帖式兼屬大
站設壯丁五十名至二十五名小站壯丁十五名至十名共壯
丁八百五十名大小站額設牛馬亦如壯丁之數

東路自省城小東門外烏拉站起

舊名呢什哈站在城
外十里松花江岸北

九十里

曰額赫穆站八十里曰拉發站六十五里曰退博站八十里曰

意氣松站四十里曰鄂摩霍站八十里曰他拉站六十里曰必

爾罕站六十里曰沙蘭站八十里曰寧古台站

在寧古塔
城東門外

凡十

站大站一小站九計程六百三十五里

烏拉站通東
西北三路

西路自省城起七十里曰蒐登站七十里曰伊勒門站五十五

里曰蘇瓦延站六十里曰伊巴丹站

即駙馬站

六十里曰阿勒灘額

墨勒站即大孤山站六十里日黑爾蘇站八十里日葉赫站四十里

日蒙古霍洛站凡八大站計程五百五十五里以上大小十八

站統歸烏拉額赫穆站監督管轄

北路自省城東北六十五里金珠鄂佛囉站起即哲松站六十里日

舒蘭站四十五里日法特哈站四十五里日登伊勒哲庫站即秀

水司自此分道正北八十里至蒙古卡倫站小站又西北四十五

里白盟温站五十里日陶賚照站四十五里日孫扎保站即五家子

站三十五里日浩色站六十五里日社哩站七十里日伯德訥

站八十里至齊齊哈爾界茂興站凡十大站計程五百二十五

里自蒙古卡倫站起七十里日多歡站七十里日薩庫哩站六

十五里日蜚克圖站八十二里日色勒佛特庫站六十一里日

大四百八十五
小六十三

佛斯亨站七十三里日富拉琿站七十五里日崇古爾庫站七十二里日鄂爾國木索站六十八里日妙嘎山站至三姓城五里凡十小站計程七百二十二里以上大小二十站統歸金珠鄂佛囉站監督管轄西北路站各支廩給銀五百兩凡馳駟差員照勘合應付官員一品至九品每站發廩給銀自一錢二分至一錢八分爲止兵每站給口糧銀六分一年應付之數約不過五百兩六月題銷又例於馬十匹內歲補三匹牛十頭內歲補四頭每馬給銀九兩牛給銀七兩統歸六月題銷馬一匹歲領草豆銀十八兩牛一頭歲領草豆銀十二兩秋季報銷
寧古塔至琿春無站亦無旅店有卡倫六處傳遞公文寧古塔西九十里日瑪勒呼哩一百二十里日薩奇庫八十里日噶哈

哩四十里日哈順八十里日穆克德和七十里日密占往來行
旅自裹餼糧借宿卡倫輜重車輛閒有露宿者俗謂之打野盤
雙城堡初設無站兵力遞送公文道光五年將軍富俊奏請於
西北兩路三十八站內抽撤官馬十匹牛十頭倒斃草豆銀兩
一併撥給由北路各站閑散丁內就近移駐七戶養馬當差每
戶官蓋房三間添設筆帖式一員委領催一名仍歸北路監督
管理

吉林卡倫

二道河

額赫穆

得恩潭

輝發

以上四卡倫官兵每月更換一年不撤謂之恩特赫

撤謂佈赫卡倫以下各處恩特赫謀特佈赫卡倫俱每月更換不撤同此

三個頂子

拉法

烏里

蛟哈

舒爾哈

平頂山

荒溝

額赫穆屯

推搏荒地

綏音 瓜勒察 羅圈溝 倒木溝 色勒薩木溪 海清

溝道光元年奏裁依吉斯渾改設以上十六卡倫官兵兩月更換三月朔一日創夫入山以前出派十月初一日創夫出山以後撤回謂之雅克什謨特佈赫卡倫以下各處雅克什謨特佈赫卡倫俱春設冬撤同此國語恩特赫謨特佈赫常設也雅克什謨特佈赫間設也

圍場

恩格木阿林 薩倫 依勒們 蘇瓦延 伊通 庫爾訥窩

集 呢雅哈氣 依巴丹 瑪法塔嘎爾罕 汪色 古拉庫

以上十一卡倫官兵兩月更換一年不撤亦謂之恩特赫謨特佈赫卡倫

烏拉

喀薩哩 那穆唐阿以上恩特赫謨特佈赫卡倫二 四道梁子 長嶺子

朴家屯 老少屯以上雅克什謨特佈赫卡倫四

額穆赫索囉

壇頻 英額達巴罕

以上恩特赫謨特佈赫卡倫二

通溝

又名和什赫雅克什謨特佈赫卡倫

寧古塔

德林

依徹

穆勒恩

霍貞河

嗎勒呼哩

薩奇庫

以上恩特

赫謨特佈赫卡倫六

昂阿拉岳

呼西喀哩

尼葉赫

佛訥

倭勒

恩

嘎思哈

花蘭

尙西

松根

沃羅霍恩嘎爾罕

多

勇武

呼耶吉

塔克通吉

烏勒呼霍洛

以上雅克什謨特佈赫卡倫十四

琿春

磨盤山

達爾歡霍洛

蒙古

嘎哈哩

哈順

穆克德赫

密占

以上恩特赫謨特佈赫卡倫七

朱倫

阿密達

佛多西

法依達庫

哈達馬 西圖 呼拉穆 圖拉穆 以上雅克什謨特佈赫卡倫人

伯都訥

當吉 團山子 五道河 古井子 二道河 以上恩特赫謨特佈赫卡倫五

哈駁 雅克什謨特佈赫卡倫一

三姓

烏思琿河 薩哈連昂阿 音達穆額克沁 鍋伯河口 以上恩特

赫謨特佈赫卡倫四 瑪延昂阿 瓦里雅哈霍屯 費岳吞河 佛勒

霍烏珠 瑪泥蘭 法勒圖琿河 圖雅齊 音達木畢爾罕

西福恩河 郭普奇西 吞河 温肯昂阿 以上雅克什謨特佈赫卡倫十

阿勒楚喀

多歡

謨勒

費克圖

以上恩特赫謨特佈赫卡倫三

費克圖昂阿佛多霍

海溝

夾信子

馬鞍山

以上雅克什謨特佈赫卡倫五

吉林通省恩特

赫謨特佈赫卡倫四十四雅克什謨特佈赫卡倫六十一共卡

倫一百零五處各駐隘要以杜飛颺人參並查偷打牲畜私估

禁山流民等事各卡倫俱派旗下當差散官惟二道河卡倫由

將軍衙門印房四司官員內保送簽掣出派得恩潭輝發平頂

山三卡倫每年冰凍封江專派協領一員佐領防禦三員往查

攬頭刨夫送米耙犁呈報參局計米增減票張並查禁偷砍木

植運送口糧次年二月初一日撤回

船艦

吉林

大三百●四
小八十八

御船四隻

內龍船一隻花船一隻如意船一隻輕船一隻俱係乾隆十九年工部匠役承造無歲修拆造

糧船三十隻

原設八十隻康熙二十八年裁去五十隻今存三十隻六年大修十二年拆造

槳船二十隻

康熙三十一年設立備用烏拉採捕東珠及本城打樺皮用五年大修十年拆造

渡船七隻

在城大門外烏拉站屬尼什哈渡口康熙十一年二十五年等年設立四隻編列如字一二三四十號三年小

修粘補六年拆造郭爾羅斯札薩克巴達瑪漢口康熙三十五年設立三隻此項船每六年由吉林水手營重造運去舊船燒燬報部並無小修

以上三項船木俱係水手砍伐營造

康熙二十二年二月內

聖祖仁皇帝念烏喇水陸重鎮輸輓維艱

特命盛京刑部侍郎噶爾圖防守協領殷達渾相視可達混同江河

道繪圖進呈復遣噶爾圖等乘小舟自遼河遣烏拉副都統瓦

力虎等自易屯口測其水道淺深覆奏奉

旨設倉四處內地設於巨流河之開城邊外設於鄧子村烏拉設於

易屯門及易屯河卽伊通河農隙之時運米貯於開城倉內以
春秋二季舟運至鄧子村交卸自鄧子村至易屯門百里無水
路車運至易屯門倉內由易屯河舟運出易屯口竟達混同江
其遼河易屯河俱造運船百隻以瀛台白煎油船爲式每隻載
米二百石爲率其混同江用大船八十隻接運每船載米二百
石爲率其遼河運丁滿兵三百名奉天所屬各州縣分派水手
六百名每名月給銀一兩仍免其丁地易屯河及混同江水手
俱由寧古塔將軍分派歲以爲常此後各鎮開墾旣廣儲峙有
素無事輸輓之勞運船積於無用已多拆毀今仍載其始末以

大三百七十二
小一百九十七

見經理之事隨時異宜有如此云

三姓

渡船四隻

在妙嘎山站佛斯亨站渡口各二隻乾隆二十五年設立三年粘補小修七年拆造

伯都訥

渡船六隻

在嫩江渡口康熙二十五年設立三年小修粘補七年拆毀

拉林

渡船二隻

在喀薩哩渡口雍正五年設立三年小修粘補七年拆造

以上三項船木俱係本城兵丁砍伐由吉林水手營造

橋梁

吉林

遵法板橋一座

在城內將軍公署南宮項修建

吉木卜巴三

板橋二座

一在城小東門內糧米行街東南隅
一在城小東門外雍正九年官項修建

茶棚菴橋一座

在城北門外十二里民力修建

伯都訥

珠魯多渾河橋一座

在城東二百九十里民力修建

寧古塔

后甸子橋一座

在城西一百里黑后甸子石空處民力修建

吉林外記卷三

大一百〇七
小二百六十四

吉林外記卷四

職官

兵額

職官

歷任將軍

巴

海 滿洲鑲藍旗人康熙元年在陞駐防昂邦章京為寧古塔將軍十五年移駐吉林

音圖

滿洲正紅旗人康熙二十二年任

佟保

滿洲正黃旗人康熙二十八年任

沙納海

滿洲鑲黃旗人康熙三十五年任

宗室揚福

滿洲正藍旗人康熙三十九年任

覺羅蒙古洛

滿洲鑲藍旗人康熙四十八年任

吉林外記卷四

穆森 滿洲鑲白旗人 康熙五十四年任

宗室巴賽 滿洲鑲藍旗人 奉恩輔 國公 康熙五十七年任

哈達 滿洲正藍旗人 雍正五年任

常德 滿洲鑲黃旗人 雍正八年任

都賚 滿洲正藍旗人 雍正十年由副都統署任

吉當阿 滿洲正白旗人 乾隆六年任

鄂爾達 滿洲正白旗人 乾隆八年任

博第 滿洲正藍旗人 乾隆八年任

巴靈阿 漢洲正黃旗人 乾隆九年任

阿蘭泰 蒙古正白旗人 乾隆十一年任

永興 蒙古正白旗人 乾隆十一年任

大六十九
小二百三十七

新

柱

滿洲鑲黃旗人
乾隆十五年任

卓

奈

滿洲正藍旗人
乾隆十五年任

覺羅

額勒登

滿洲正紅旗人
乾隆二十年任

傅

森

滿洲鑲黃旗人
乾隆二十一年任

宗室薩爾善

滿洲正白旗人
乾隆二十五年任

宗室恆魯

滿洲鑲藍旗人
奉恩轉國公
乾隆二十五年任

富良

滿洲鑲黃旗人
頭等叅事
惠伯
乾隆三十四年任

富椿

滿洲鑲紅旗人
奉恩輔國公
乾隆三十五年任

福康安

滿洲鑲黃旗人
御前侍衛
內大臣
三等嘉勇男
乾隆四十二年任
後陞大學士
授川陝楚大將軍
追封郡

王

霍隆武

滿洲正黃旗人
御前侍衛
果勇侯
乾隆四十三年任

与木小已長可

宗室永璋

滿洲鑲藍旗人乾隆四十七年任

慶

桂

滿洲鑲黃旗人乾隆四十七年任

都爾嘉

滿洲正白旗人乾隆四十九年任

慶

桂

滿洲鑲黃旗人乾隆五十三年二任由兵部尙書來署後陞大學士

宗室恆秀

滿洲正白旗人乾隆五十四年任

宗室琳

滿洲鑲藍旗人乾隆五十四年任後陞大學士

宗室恆秀

滿洲正白旗人乾隆五十六年二任

保琳

滿洲正黃旗人乾隆五十九年任

秀林

滿洲鑲白旗人乾隆六十年任

富俊

蒙古正黃旗人嘉慶八年任

秀林

滿洲鑲白旗人嘉慶八年二任後陞吏部尙書

大六十七
小三百四十五

賽冲阿

滿洲正黃旗人。世襲一等輕車都尉。嘉慶十五年任。後陞御前大臣。

嘉明

滿洲正藍旗人。嘉慶十八年任。

富俊

蒙古正黃旗人。嘉慶十九年任。

松綵

蒙古正藍旗人。嘉慶二十二年任。

富俊

蒙古正黃旗人。嘉慶二十三年任。

松綵

蒙古正藍旗人。道光三年任。

松筠

蒙古正藍旗人。前任大學士。道光三年任。

富俊

蒙古正黃旗人。太子太保。己亥年進士。世襲騎都尉。道光四年任。由理藩院尚書調補。後陞協辦大學士。

吉林副都統

安珠瑚

滿洲正黃旗人。康熙十年任。由盛古塔調補。後陞將軍。

西山

滿洲正白旗人。康熙十五年任。

幹里瑚

滿洲鑲白旗人
康熙二十年任

巴爾達

滿洲正白旗人
康熙二十八年任
三十三年缺裁雍正三年復設

威色

滿洲正藍旗人
雍正三年任

武扎拉

滿洲鑲藍旗人
乾隆四年任

宗室松阿里

滿洲正藍旗人
乾隆十四年任

額勒登額

滿洲正藍旗人
乾隆十九年任

普慶

滿洲鑲黃旗人
乾隆二十二年任

宗室增海

滿洲正藍旗人
乾隆二十二年任

富良

滿洲鑲黃旗人
乾隆二十八年任
後陞將軍

富珠哩

滿洲鑲黃旗人
乾隆二十八年任

永安

滿洲鑲紅旗人
乾隆三十一年任

大六十七
小三百三十

明 亮 滿洲鑲黃旗人乾隆三十一年任後陞大學士

編 柱 滿洲鑲白旗人乾隆三十三年任

曾 保 滿洲正黃旗人乾隆三十七年任

富僧額 滿洲正黃旗人乾隆三十八年任

明 英 滿洲正紅旗人乾隆三十八年任

克興額 滿洲鑲藍旗人乾隆四十四年任

烏靈阿 滿洲正紅旗人乾隆四十六年任

索 柱 滿洲正黃旗人兼烏拉總管乾隆五十一年任

巴林木達 滿洲正黃旗人乾隆五十三年任

索 喜 滿洲鑲白旗人乾隆五十三年任

秀 林 滿洲鑲白旗人乾隆五十八年任後陞吏部尚書

賽冲阿 滿洲正黃旗人 乾隆五十九年任後陞 御前大臣

吉祿 滿洲正黃旗人 兼烏拉總管 嘉慶二年任

達祿 滿洲鑲紅旗人 嘉慶七年任

宗室伊鏗額 滿洲鑲藍旗人 鎮國將軍 嘉慶十三年任

額勒琿 滿洲正黃旗人 嘉慶十五年任

宗室玉衡 滿洲鑲藍旗人 嘉慶十五年任

德寧阿 滿洲鑲藍旗人 嘉慶十五年任 後陞將軍

松綵 蒙古正藍旗人 嘉慶十五年任 後陞將軍

祿成 蒙古正紅旗人 嘉慶二十一年任 後陞將軍

富登阿 索倫鑲黃旗人 嘉慶二十四年任

倭楞泰 滿洲鑲藍旗人 年班入覲 賞換花翎 道光四年任

大六十六
小一百三十一

盛古塔副都統

海塔

滿洲正白旗人
順治十五年任

尼喀立

滿洲正白旗人
順治十五年任

滿貴

滿洲鑲藍旗人
順治十八年任

滿丕

滿洲正藍旗人
康熙六年任

瑚巴克泰

滿洲正白旗人
康熙六年任

安珠瑚

滿洲正黃旗人
六年任後陞將軍
康熙

蒯齊

滿洲正白旗人
康熙十年任

錫三

滿洲正藍旗人
康熙十五年任

薩布素

滿洲鑲黃旗人
十七年任後陞將軍
康熙

雅泰

滿洲正紅旗人
康熙二十二年任
康熙

根

額

滿洲鑲紅旗人
康熙三十三年任

保

定

滿洲正白旗人
康熙三十八年任

噶爾圖

滿洲正黃旗人
康熙四十二年任

瑪

奇

滿洲正白旗人
康熙四十六年任

阿

岱

滿洲正藍旗人
雍正元年任

常

德

滿洲鑲黃旗人
雍正五年任

巴爾岱

滿洲正白旗人
雍正十一年任

長

生

滿洲鑲藍旗人
乾隆元年任

圖

納

滿洲鑲白旗人
乾隆七年任

伊倫泰

滿洲鑲紅旗人
乾隆十年任

覺羅額勒登

滿洲正紅旗人
乾隆十七年任

大六十六
小二百六十一

宗室和綳額 滿洲正藍旗人 乾隆二十一年任

富僧額 滿洲正黃旗人 乾隆二十四年任

宗室增海 滿洲正監旗人 乾隆二十八年任

明亮 滿洲鑲黃旗人 乾隆三十三年任 後陞大學士

編柱 滿洲鑲白旗人 乾隆三十七年任

富珠哩 滿洲鑲黃旗人 乾隆三十七年任

達松阿 蒙古正黃旗人 乾隆四十二年任

安臨 蒙古正白旗人 乾隆四十八年任

那奇泰 滿洲正藍旗人 乾隆五十四年任 後陞將軍

慶霖 滿洲鑲黃旗人 乾隆六十年任 後陞將軍

雷尼善 滿洲鑲黃旗人 由布政使補放嘉慶三年任

郭勒明阿 滿洲鑲藍旗人
嘉慶六年任

富登阿 索倫鑲黃旗人
嘉慶九年任

德盛阿 滿洲鑲藍旗人
嘉慶十五年任
後陞將軍

達斯呼勒岱 滿洲正黃旗人
嘉慶十九年任

和福 滿洲正白旗人
道光三年任

伯都訥副都統

扎隆阿 滿洲正黃旗人
乾隆二十八年任

覺羅佟福柱 滿洲正藍旗人
乾隆三十二年任

克興額 滿洲鑲藍旗人
乾隆三十八年任

宗室普正 滿洲正紅旗人
乾隆四十四年任

烏雅勒達 滿洲正白旗人
乾隆四十四年任
後陞參贊大臣

大八十一
小三百九十五

保 滿洲正黃旗人 乾隆五十二年任

索喜 滿洲鑲白旗人 乾隆五十八年任

宗室斌 滿洲鑲紅旗人 輔國將軍 嘉慶七年任

宗室伊鏗額 滿洲鑲藍旗人 嘉慶七年任

達斯胡勒岱 滿洲正黃旗人 嘉慶九年任 賞都統銜

宗室伊鏗額 滿洲鑲藍旗人 嘉慶十三年任

恆福 滿洲鑲黃旗人 嘉慶十三年任

色爾滾 打姓正黃旗人 都統 嘉慶十五年任

宗室玉衡 滿洲鑲黃旗人 嘉慶十五年任

和福 滿洲正白旗人 嘉慶二十四年任

蘇倫保 滿洲正黃旗人 道光三年任 賞都統銜

碩德 滿洲鑲紅旗人
道光四年任

三姓副都統

阿米納 滿洲正白旗人
康熙五

錫巴立 滿洲鑲藍旗人
康熙

松特 滿洲正黃旗人
雍正

花賴 滿洲鑲紅旗人
雍正

重替 滿洲正黃旗人
雍正六年以協領駐防
以上俱副都統職銜
自雍正七年改實任

覺羅七十五 滿洲鑲黃旗人
雍正七年任

重替 滿洲正黃旗人
乾隆元年二任

清葆 滿洲鑲紅旗人
乾隆九年任

德寧 滿洲鑲黃旗人
乾隆十八年任

大七十四
小三百〇三

三格 滿洲正白旗人
乾隆十九年任

傅爾松阿 滿洲正藍旗人
乾隆十九年任

富僧額 滿洲正黃旗人
乾隆二十三年任

敦柱 蒙古鑲黃旗人
乾隆二十四年任

巴岱 滿洲鑲白旗人
乾隆二十四年任

額爾齊木 蒙古鑲藍旗人
乾隆二十六年任

敦柱 蒙古鑲黃旗人
乾隆二十七年任

舒通阿 滿洲正白旗人
乾隆三十一年任

富珠哩 滿洲鑲黃旗人
乾隆三十一年任

郭木布 滿洲正紅旗人
乾隆三十五年任

舒通阿 滿洲鑲紅旗人
乾隆三十九年任

与木下記卷四

宗室雅朗阿

滿洲正黃旗人
乾隆四十年任

穆爾泰

滿洲正黃旗人
乾隆四十年任

宗室普正

滿洲正紅旗人
乾隆四十四年任

明英

滿洲正紅旗人
乾隆四十五年任

富珠哩

乾隆四十九年二任

那奇泰

乾隆五十年任
後陞將軍

額勒伯克

乾隆五十四年任

賽冲阿

嘉慶二年任
後陞御前大臣

慶保

嘉慶六年任

額勒恆額

嘉慶七年任

額勒輝

嘉慶九年任

大七十四
小二百五十四

達松阿

嘉慶十二年任

果勒明阿

嘉慶十六年任

扎担保

道光二年任

吉勒通阿

道光五年任

阿勒楚喀副都統

巴

岱

滿洲鑲白旗人
乾隆二十三年任

敦

柱

滿洲鑲黃旗人
乾隆二十五年任

舒通阿

滿洲正白旗人
乾隆二十七年任

耀

成

滿洲正藍旗人
乾隆二十八年任

托

雲

滿洲鑲黃旗人
乾隆四十年任

富珠哩

滿洲鑲黃旗人
乾隆四十九年任

額勒伯克

蒙古旗人乾隆五十年任

德清阿

宗室乾隆五十四年任

烏雅勒達

滿洲正白旗人嘉慶七年任後陞參贊大臣

佈蘭泰

滿洲正紅旗人嘉慶十一年任

色爾滾

達呼哩正黃旗人嘉慶十五年任

穆騰額

滿洲正白旗人嘉慶二十五年任

精欽保

滿洲正白旗人乾隆光緒五年任

附拉林副都統

乾隆九年設三十四年裁

巴爾品

滿洲正黃旗人乾隆九年任

瑪爾拜

滿洲正白旗人乾隆十二年任

滿

福滿洲鑲藍旗人乾隆十三年任

大七十九

三才夕言卷四

九

國多歡 滿洲鑲紅旗人 乾隆二十二年任

綽克托 滿洲正紅旗人 乾隆二十七年任

特克慎 滿洲正藍旗人 乾隆二十九年任

堂主事

永安 吉林滿洲正藍旗 凌泰佐領下人 乾隆五十五年任 後陞盛京工部員外郎

順安 吉林滿洲正紅旗 和欽保佐領下人 嘉慶二年任 後陞盛京刑部員外郎

興 吉林滿洲鑲白旗 烏雲泰佐領下人 嘉慶十年任 現任工部都水司員外郎

富珠禮 吉林滿洲正白旗 圖勒斌佐領下人 嘉慶二十年任 現任歸綏道

薩英額 吉林滿洲正黃旗 蘇勒芳阿

永安以前補放京員

同知

圖善 正白旗滿洲都統常安佐
領下人乾隆二十七年任

灶神保 正白旗滿洲王保佐領
下人乾隆三十四年任

達哈布 鑲紅旗滿洲貴保佐領
下人乾隆三十五年任

那昌阿 鑲黃旗滿洲達福佐領
下人乾隆四十年任

玉柱 正白旗滿洲噶爾炳阿佐
領下人乾隆四十四年任

常齡 正藍旗滿洲國祥佐領
下人乾隆五十三年任

瑚唐阿 鑲白旗滿洲都統永和佐
領下人乾隆五十三年任

富綸 鑲黃旗滿洲孚蘭泰佐領
下人乾隆五十八年任

碩隆武 正白旗滿洲索渾佐
領下人嘉慶三年任

舒成 鑲紅旗滿洲瑚圖哩佐
領下人嘉慶七年任

白瑛 鑲紅旗滿洲吉爾通阿
佐領下人嘉慶九年任

富元 正黃旗蒙古烏爾德尼佐領下人嘉慶十一年任

富爾松阿 鑲藍旗蒙古富釀阿佐領下人嘉慶十九年任

錦珠勒 覺羅鑲藍旗滿洲奇爾薩佐領下人嘉慶二十五年任

學正

張瑜 直隸廣平府磁州人乾隆二十六年任

安學元 正定府贊皇縣人乾隆三十八年任

宋開元 順天府宛平縣人乾隆四十一年任

胡惺 天津府慶雲縣人乾隆四十三年任

柴梅 河間府故城縣人乾隆五十年任

孟文人 宣化府延慶州人乾隆五十一年任

董啟祥 天津府天津縣人乾隆五十八年任

王丕振

正定府唐縣人
乾隆六十年任

董啟祥

天津府天津縣人
嘉慶六年二任

孫 鈺

天津府天津縣人
嘉慶二十三年任

楊 灝

順天府昌平州人
嘉慶二十五年任

楊 柟

河南府臨縣人
道光五年任

巡檢

潘宏德

四川成都府成都縣人
乾隆十四年任

金以權

浙江紹興府會稽縣人
乾隆二十三年任

陳宗儒

浙江紹興府諸暨縣人
乾隆四十年任

趙萬清

順天府大興縣人
乾隆四十七年任

丁鳳梧

順天府大興縣人
乾隆五十年任

大六十七
小二八

陶家賓

順天府大興縣人
乾隆五十九年任

柴斗佑

順天府大興縣人
乾隆六十年任

丁榮祖

順天府大興縣人
嘉慶八年任

張繼武

湖北武昌府江夏縣人
嘉慶十六年任

汪治

順天府大興縣人
籍浙江道光四年任

伊通巡檢

張雲鵬

直隸永平府灤州人
嘉慶十九年任

吳介禧

順天府宛平縣人
嘉慶二十五年任

胡承先

道光二年任

李瑛

浙江紹興府山陰縣人
道光二年任

賀選

直隸保定府清苑縣人
道光六年任

長春廳通判

六雅圖 蒙古鑲黃旗色布興額
佐領下人嘉慶六年任

阿成 正藍旗滿洲鄂爾弼圖佐
領下人嘉慶十二年任

六雅圖 病痊仍補原缺
嘉慶十六年任

福納 鑲黃旗滿洲公喜倫佐領
下人嘉慶二十一年任

那靈泰 正白旗滿洲富安泰佐領
下人嘉慶二十五年任

常喜 正紅旗滿洲托恩多布佐
領下人貢生道光四年任

巡檢

潘玉振 嘉慶五年任

吳介禧 嘉慶十年任

周鎮 嘉慶二十年任

大六十九
小二百六十一

張家務
道光四年任

伯都訥同知

慶臣
嘉慶十年任

施蒙額
嘉慶十年任

富寧阿
嘉慶二十年任

文慶
道光元年任

松奎
道光五年任

伯都訥巡檢

茅鎮
嘉慶十年任

左宜
道光四年任

孤榆樹屯巡檢

譚仁溥 嘉慶十年任

易開泰 嘉慶二十四年任

以上

將軍副都統主事同知通判學正巡檢俱查明歷任列敘其協領以下文武各官僅開額數不便按年悉載以省煩贅

官兵

吉林

八旗滿洲協領八員佐領四十員騎都尉三員防禦二十二員
雲騎尉十員驍騎校四十員恩騎尉十三員七品監生二員八
品監生八員兵二千五百一十一名弓鐵匠九十八名
蒙古旗協領一員佐領八員雲騎尉三員驍騎校八員八品監

大一百九十三
小六十三

生一員兵四百零一名弓鐵匠十三名

烏鎗營漢軍參領一員佐領八員驍騎校八員兵六百零八名
弓鐵匠十六名

水手營四品官二員五品官二員六品官二員領催八名水手
二百五十名木艚繩匠四十五名

管站監督各站筆帖式領催壯丁數目已詳驛站類

左右翼助教官二員倉官一員倉筆帖式二員領催二名

將軍公署理刑九品筆帖式一員滿洲筆帖式六員繙繹筆帖
式四員蒙古繙譯筆帖式一員書吏二名衙役十四名番役二
十名件作二名學習件作二名獄官一員禁卒三十名

烏拉協領一員佐領八員防禦四員雲騎尉三員驍騎校七員

七品監生一員筆帖式二員教習一員兵六百九十七名弓鐵匠二十名

伊通佐領二員防禦二員驍騎校四員兵二百名

額穆赫索囉佐領一員防禦一員雲騎尉一員驍騎校一員兵一百二十名

四邊門防禦各一員兵各二十名總領催各一名台領催各七名台丁各一百五十名

寧古塔

協領二員佐領十二員騎都尉二員防禦八員雲騎尉十員驍騎校十二員恩騎尉四員八品監生二員倉官一員倉筆帖式二員

副都統公署筆帖式四員教習二員兵一千三百二十名番役
十名件作二名弓鐵匠二十四名

琿春

協領一員佐領三員防禦二員雲騎尉六員驍騎校三員恩騎
尉一員八品監生二員筆帖式二員教習一員兵四百三十名

伯都訥

協領二員佐領十二員防禦八員雲騎尉四員驍騎校十二員
恩騎尉一員八品監生一員

副都統公署筆帖式四員倉官一員倉筆帖式二員教習二員
兵一千名弓鐵匠三十五名擺渡領催二名水手五十八名番
役十名件作一名學習件作一名

三姓

協領二員佐領十五員騎都尉一員防禦八員雲騎尉三員驍
騎校十四員八品監生三員倉官一員倉筆帖式二員
副都統公署筆帖式四員教習二員兵一千三百七十名番役
十名弓鐵匠四十名件作一名學習件作一名

阿勒楚喀

協領一員佐領七員委佐領一員防禦八員雲騎尉二員驍騎
校六員八品監生一員倉官一員倉筆帖式二員

副都統公署筆帖式六員教習一員兵六百四名水手六名弓
鐵匠五名番役十名件作一名學習件作一名由京移駐閑散
滿洲一千三百七十六名

拉林

協領一員佐領六員委佐領二員防禦四員雲騎尉一員驍騎校七員倉官一員倉筆帖式三員關防筆帖式二員教習一員兵六百四名弓鐵匠五名水手十四名件作一名學習件作一名由京移駐閑散滿洲一千三百三十九名

雙城堡

協領一員佐領六員驍騎校八員由

盛京移駐墾地閑散二千名由吉林烏拉伯都訥阿勒楚喀拉林移駐墾地閑散二千名兵一百五十三名內有無品級筆帖式九員委官八員

以上文武官四百八十四員世襲官八十九員兵一萬零九十

八名弓鐵匠二百五十六名木船繩匠四十五名水手領催八名擺渡領催二名水手三百二十八名

吉林伯都訥廳署門子各二名阜隸各十名馬快各四名民壯各三十名捕役各八名庫丁各一名禁卒各二名傘扇轎夫各七名

件作各一名六房各有經制一名

吉林伯都訥廳署巡檢公署攢典各一名阜隸各四名馬快各一名門子各一名

吉林外記卷四

大三百二十五
小二十六

吉林外記卷五

俸餉倉儲

事宜

俸餉銀

將軍俸銀一百八十兩養廉銀一千五百兩人役工食銀二百七十六兩

副都統俸銀一百五十兩養廉銀五百二十兩人役工食銀一百八十兩

協領參領俸銀一百三十兩

騎都尉兼雲騎尉俸銀一百二十五兩

佐領四品官俸銀一百五兩

騎都尉俸銀一百十兩

防禦兼雲騎尉俸銀八十五兩

防禦五品官俸銀八十兩

主事俸銀六十兩米三十倉石

理事同知俸銀八十兩養廉銀五百二十七兩六錢

理事通判俸銀六十兩養廉銀三百兩

學正俸銀四十兩

巡檢俸銀三十一兩五錢二分養廉銀三十一兩五錢

驍騎校六品官俸銀六十兩

七品管站監督助教官俸銀四十五兩米二十二倉石五斗由無

品級筆帖式補放者作爲八品俸銀四十兩米二十倉石

大二百五十六
少二十七

恩騎尉俸銀四十五兩

癯生俸銀四十兩

生監補放筆帖式者作為八品俸銀二十八兩米十四倉后領

前鋒補放無品級筆帖式者俸銀三十六兩米十五倉后一斗披甲補放無品級筆帖式者俸銀二十四兩米十五倉后一斗

理刑九品筆帖式俸銀二十一兩一錢一分四釐米十一倉后一斗一升四合以上各筆帖式補放倉官仍食原俸米

獄官俸銀三十一兩五錢二分

醫官藥資銀四十兩每日支日糧九升九合六勺

領催前鋒餉銀三十六兩甲兵驛站邊門官莊領催俱二十四兩水手邊台領催俱十八兩養育兵

看守

山拜唐阿弓鐵木臉匠水手番役作皆十二兩

以上官兵一年共應領俸餉銀三十一萬六千七百有奇

庫貯備用銀

吉林八萬兩

靈古塔二萬兩

伯都訥一萬兩

三姓一萬五千兩

阿勒楚喀五千兩

以上共銀十三萬兩內每年各城官參局辦示動支接濟創夫並發給各站一年買補倒斃牛隻草豆暨往返馳驛等差供應廩糧支給新放官員俸餉及官兵孀婦應領春秋二季半俸餉又節婦建坊銀俱年終造冊由盛京戶部領取歸款

官差支借銀

吉林一萬七千兩

寧古塔六千兩

三姓五千兩

伯都訥三千三百兩

阿勒楚喀一萬二千七百兩

以上共銀三萬四千兩俱在各城存貯借給出差兵丁按四季扣還每年仍將已未扣完數日報部核銷

牛具銀

吉林二萬兩

寧古塔七千兩

伯都訥四千兩

三姓六千兩

阿勒楚喀三千兩

以上共銀四萬兩俱在各城存貯借給無牛種地兵丁按八季扣還每年仍將已未扣完數日報部核銷

賞銀

吉林四千兩

寧古塔二千兩

伯都訥一千三百兩

三姓一千六百兩

阿勒楚喀一萬七千一百兩

大二百一十五
小五

以上共銀二萬六千兩俱在各城存貯

賞給官兵紅白事暨發給養贍殘疾閑散滿洲每年題銷年終仍
由

盛京戶部領取歸款

倉儲

吉林公倉額存糧七萬石

義倉額存糧三萬四千石

寧古塔公倉額存糧二萬五千石

義倉額存糧一萬一千石

琿春義倉額存糧二千五百石

伯都訥公倉額存糧二萬五千石

義倉額存糧一萬石

三姓公倉額存糧三萬石

義倉額存糧一萬二千石

阿勒楚喀公倉額存糧二萬五千石

義倉額存糧五千石

拉林公倉額存糧二萬五千石

義倉額存糧五千石

每年印房四司官參局理事廳例應

題
奏
咨
部
事
宜

印房

一
四
月
內
應

大二百一十五
小七

奏烏拉採捕東珠官兵起程摺

一六月內應

奏慶賀

萬壽正副

表文二分

一七月內應

奏恭叩

萬壽摺

將軍副都統及各城副都統同列銜

一八月內應

奏慶賀

皇太后萬壽正副

表文二分

一九月內應

奏慶賀長至正副

表文四分

一應

奏採捕東珠數目摺

一十月內應

奏由圍場進鮮貢單

一十一月內應

奏慶賀

元旦正副

大一百〇九
小十九

表文四分

初次恭

進鱒鯉魚摺

二次恭

進鱒鯉魚摺

一十二月內應

奏恭叩

元旦摺一分

將軍副都統及各城副都統同列銜

聖駕謁

陵 巡幸各地方計起 鑾回蹕之日先行奏接送

駕請

安摺 將軍副都統及各城副都統同列銜

一四司參局理事廳應奏本摺俱各屆期具稿呈畫後送印房

恭繕拜發

一每年

奏摺內欽奉

硃批於年終查明次數敬謹包封呈交軍機處

戶司

一公倉額存糧七萬石除額存外其餘糧石每年支給文員俸米等項之用備存四千石又餘者照例比時價減銀一錢糶賣與旗人仍將支給存贖存糧數於六月內造冊咨送戶部核銷

大二百一十二
小三十三

一吉林各處公倉除額存外餘糧糶賣銀兩作爲一年各項官工之用用贖銀兩每年於四月內造冊咨送戶部核銷

一吉林各處每牛象立牛具一具撥兵三名耕種義倉地畝吉林共牛具一百四具每具每年四十八倉石核計應交義倉糧四千九百九十二石除額存八萬石外餘糧糶賣仍將交納糶賣糧數於三四月內造冊咨送戶部核銷

一吉林各處義倉除額存外餘糧糶與兵等所得銀兩作爲買補義倉耕牛修理義倉並買補農器之用用剩銀兩每年於四月內造冊咨送戶部核銷

一吉林各處官兵俸餉造冊每年於十一月內派員赴

盛京戶部領取

一每年於同知解交稅銀內撥出銀一千兩支給衙門公用硃墨紙筆並書役工食之費用過銀兩照例每年於三月內

題銷外仍造冊咨送戶刑二部

一致祭

長白山照定額應備養黑牛二十條豬二十口羊二十隻每年將用剩數目於四月內造冊咨送

盛京禮部核銷

一吉林各處監犯及起解人犯等口米供應之數每年於二三月內

題銷外仍造冊咨送戶刑二部

一吉林官莊莊丁每年應交糧一萬五千石寧古塔官莊壯丁

題
應交糧三千九百石伯都訥官莊壯丁應交糧一千八百石
三姓官莊壯丁應交糧四千五百石阿勒楚喀拉林官莊壯
丁應交糧一千八百石共徵收糧二萬七千石貯倉每年於
四月內具

一各處應行

旌表守節孀婦每年於七月內具

題外仍將守節孀婦年歲造冊咨送禮部

一各處雨雪調勻二麥滋長大田播種之處每年於四月內恭
摺具

奏

一各處二麥收成分數大田秀穗之處於七月內恭摺具

奏奉到

硃批行文知會戶部

盛京黑龍江

一各處大田收成分數每年於十月內恭摺具

奏奉到

硃批行文知會戶部

盛京黑龍江

一各處公倉陳穀照例出糶應先期查明市價咨報戶部後將每石比時價減銀一錢糶賣取結咨送戶部

一各處管倉監督二年更換二年任滿撥放新監督年終具

大二百五十六
小五

題

一各處新舊任管倉監督交代接收糧石數目據實具

題外仍造冊咨送戶部

一各處三年比丁一次所造細冊咨送戶部並各該旗籍

一准承祭衙門奏准咨覆

長白山之神每月朔望

將軍副都統輪替拈香一次每年春秋二季致祭

一吉林八旗修建兵丁官房空閒餘地應得菜園租銀每年於
秋季徵收貯庫支給收補八旗官房之用用剩銀數每年二
月內造冊咨送戶部

一各處大小官員應頒時憲書數目每年於五月內將各官職

名造冊咨送

欽天監

一吉林各處旗民襍處屯堡民人有無私墾地畝專派官十員分界稽查並派總理協領一員年終取結咨報戶部協領等官二年更換

一吉林每月市值糧價查明三月一次咨報戶部

一吉林各處有無由京買來奴僕販賣之處每年年終咨報戶部

一庫貯備用官差牛具紅白事 賞銀額徵稅銀動存用項

題咨核銷已詳庫貯類

兵司

一新將軍到任照例具

奏並咨報兵部外查驗官員兵丁軍裝器械於三月限內結報具

奏

一新將軍接任將舊存

敕書恭送該科衙門改換領取

一吉林所屬歷年額設領催前鋒甲兵匠役分別造具漢冊每
年按兩季咨送兵部

一三月九月將吉林所屬各處大小官員履歷造冊二本咨送
兵部

題過本章數目每年按四季造冊咨送通政司

一六月內將各站一年應付過公費銀兩並買補倒斃牛馬銀兩數目

題銷外仍造冊咨送兵科

一年終將官員兵丁軍裝器械查驗結保具

題仍將軍器數目彙總造冊咨送兵部

一年終將吉林所屬各處官員兵丁額數咨報兵部

一年終將吉林所屬庫貯炮位鳥鎗數目咨報兵部

一年終將吉林所屬各處發到安插人犯數目彙總咨報軍機

處刑部

一十月內應恭

進風乾鹿肉貢單

一十一月內應蒸

進鹿尾各色土物貢單

一遵照勘合火牌應付過各項差使站馬廩拾數目每年按四季造冊咨送兵部

一勘合火牌視動用將完卽往兵部領取以足二十張之數

一蒙古道路票視動用將完卽往理藩院領取以足五張之數

一吉林所屬各處出差等項官員之缺揀派兼管之員月日每年按四季造冊咨送兵部

一秋季出派員烙補各站牛馬印記並查驗草豆年終咨報兵部

一文職堂主事管站監督助教官倉官等缺如有陞故所遺之

缺隨時行文查取應揀人員擬定正陪咨送吏部帶領引

見候

旨補放

一衙門無品級繙譯等項筆帖式及各站筆帖式缺出將應揀人員選放咨報吏部註冊

一武職官員如有陞故所遺之缺隨時行文查取應揀人員挑選咨送兵部該旗帶領引

見候

旨補放

刑司

一監禁斬絞重犯歷年於四月內秋審具

大三百九十七
小五

題

一免死發遣爲奴盜犯脫逃彼

奏報並於各處咨緝拏獲時審明一面正法一面

間

一吉林所屬歷年發到太監內已死若干脫逃若干現有若干
數目查明歷年二月內咨報內務府

一一年內軍流徒等犯咨報刑部於年終彙

題

一一年內正法人犯數目正法月日於年終彙

題

一僱人偷創人獲財主不分旗民俱發雲南等省充軍並無財主隻身潛往偷創得獲一兩以下杖六十徒一年至五十兩杖一百流三千里為從及未得參各減一等購買販賣飛參等犯照偷創已得獲人犯減一等治罪一年內所辦總數於年終彙

題

一吉林所屬發遣為奴及當差人犯脫逃者每月造冊報部掣獲自行投首者若干未獲者若干數目年終分別咨報軍機處刑部應行查議為奴之家長旗分佐領該管各官職名送部查議

一一年內掣私參數目於年終彙

題參劾解送內務府

一 一年內入官贓罰銀兩數目於年終彙

題將銀抵充本處官兵俸餉

一 一年內發遣安插人犯內因不守分有無改發者年終咨報

軍機刑部

一 各副都統衙門審送徒罪以上賊盜等案以及人命事件俱

照例咨報刑部

一 吉林地方旗民交涉賊盜案件及旗人鬪毆人命事件俱係

刑司辦理徒罪以上者俱咨報刑部旗民交涉鬪毆人命及

單民案件理事同知衙門辦理

一 一年內吉林所屬命案事件限內審辦已結未結之處年終

咨報軍機處刑部

一吉林所屬各處節年發遣爲奴及當差人犯內病故脫逃數目現在實有數目年終咨報軍機處刑部外未獲者咨行各省嚴緝

一私入圍場偷打牲畜十隻以上者杖一百流三千里二十隻以上者發烏魯木齊等處種地三十隻以上者發烏魯木齊等處給兵丁爲奴其零星偷打隨時破案者一隻至五隻杖一百徒三年至五隻以上者再枷號一箇月其偷砍樹木五百斤以上者杖一百流三千里八百斤以上者發烏魯木齊等處種地一千斤以上者發烏魯木齊等處給兵丁爲奴其零星偷砍隨時破案數十斤至一百斤者杖一百徒三年一

百斤以上者再加號一箇月爲從各減一等均無論初犯再犯而刺盜團場字樣

工司

長白山殿宇五間原係由

盛京工部派員修理工竣時由

盛京工部

題銷如有滲漏損壞由吉林粘補修理入於歲修核銷道光五年

五月二十八日將軍富俊

奏准就近由吉林派員動用正項修理工竣後

題銷並咨工部

一松花江神廟貯龍船房以及公署倉庫監獄城牆等項並各處工程如在二百五十兩以下先行料估報部俟部覆到日動用糶穀銀修理工竣時造具細冊並取查驗官等結報部核銷二百五十兩以上先行料估具

題五百兩以上先行料估恭摺

奏

聞均俟部文到日動項修理工竣後造具細冊並取查驗官員甘結

題銷

一吉林各處渡船並運糧捕珠等項船隻如屆應修年分分別小修粘補拆造限期應需油蔴釘鐵等物恭摺

奏

聞派員赴部請領 用木植派水手人等砍運以備興修

一碾造火藥動用銀兩數目年終彙總

題銷

一碾造火藥應用硫磺派員赴

盛京工部交送價銀將磺領來鉛塊亦由

盛京購買備用

官棧局

一吉林寧古塔散放參票數目每年於五月內

奏

聞

一十一月內具

題參務公費銀兩數目

一吉林寧古塔二處應散放參票每年於十一月內

奏

閩後派員赴戶部請領

一吉林寧古塔二處散放餘贖參票並接濟刨夫銀兩

奏

閩後餘剩參票派員繳回戶部

一每年所收官棧派員解送於十二月內恭摺

奏

閩

理事廳

大二百〇一
小五

一徵收地丁錢糧數目每年於正月內先行

奏

聞

一徵收木稅銀兩數目每年於四月內具

題

一徵收地丁雜稅銀兩數目每年於四月內具

題

一單民及旗民交涉人命盜竊詞訟等案犯該徒罪以上者俱具稿呈請分別咨部

吉林外記卷五

大八十四
小五

吉林外記卷六

學校

學額

儒林文苑

祠祀

學校

吉林儒學在城內東南隅乾隆七年永吉州知州魏士敏建廟
宇巽宮諸制略備三十年同知圖善於廟內東南隅隙地起奎
星樓一間上奉奎宿下祀

文昌帝君其前修櫺星門三楹五十五年城內火災廟學俱燬惟
奎星樓存將軍琳盛奏請官銀重新修葺殿廡門堂煥然一

新嘉慶十一年齋房又燬十四年奉天學政茹棻 奏請頒

內板經籍於奉省各學飭建尊經閣同知富元學正孫斌白將軍

秀林副都統達祿率所屬官員紳士捐資修建尊經閣於齋房

故址此吉林廟學興建之源流也

廟在學之東中為聖殿三間東西兩廡各三間啟聖祠三間在

殿後大成門三間在廡前又前為泮水池池北東西兩角門東

曰聖域西曰賢關正殿有

仁宗睿皇帝御書集聖大成扁額池南為靈星門門牆外左右下馬

坊各一其南照壁一座明倫堂三間在廟之西堂西廡為齋房

三間東向今改為尊經閣三間學正廡宇在明倫堂後繚以牆

垣長四十丈寬八丈

大三百五十五
小五

聖殿中奉大成至聖先師位兩旁

西向宗聖曾子亞聖孟子東向

端木子賜仲子由卜子商有子

子求言子偃顓孫子師朱子熹

聖祖御書萬世師表扁額

東廡祀先賢遽子瑗澹臺子滅明

子開司馬子耕梁子鱣冉子孺

子開子哆公西子赤任子不齊公

黑國原子亢廉子潔叔仲子會公

子張步叔子乘秦子非顏子噲

章周子敦頤程子顓邵子雍先儒

后子蒼杜子子春諸葛子亮王子通范子仲淹歐陽子修楊子
時羅子從彥李子侗呂子祖謙蔡子沈陳子淳魏子了翁王子
柏趙子復許子謙吳子澄胡子居仁王子守仁羅子欽順

西廡祀先賢林子放宓子不齊公冶子長公皙子哀高子柴樊子
須商子澤巫馬子施顏子辛曹子卹公孫子龍秦子商顏子高
壤駟子赤右作子蜀公夏子首后子處奚容子蒧顏子祖句井
子疆秦子祖縣子成公祖子句茲燕子伋樂子刻狄子黑孔子
忠公西子蒧顏子之僕施子之常申子根左子邱明秦子冉牧
子皮公都子

公孫子丑張子載程子頤先儒毅梁子赤高堂子生孔子安國
毛子萇鄭子康成范子盩韓子愈胡子瑗司馬子光尹子焯胡

子安國張子栻陸子九淵黃子幹真子德秀何子基陳子澔金
子履祥許子衡薛子瑄陳子獻章蔡子清陸子隴其

啟聖祠在

聖殿後祀

肇聖王木金父

裕聖王祈父

詒聖王防叔

昌聖王伯夏

啟聖王叔梁紇東配先賢顏氏無繇孔氏鯉西配先賢曾氏點孟
孫氏激東從祀先儒程氏珦周氏輔成蔡氏元定西從祀先儒
張氏迪朱氏松

道光二年二月

諭明臣劉宗周植品莅官致命遂志實爲明季完人其講學論心著書立說粹然一出於正洵能倡明正學扶持名教劉宗周著從祀

文廟西廡列於明臣蔡清之次從御史馬步蟾請也公籍隸山陰自壯登仕歷官至左都御史明季時清標介節冠於同朝忠言讜論形諸奏牘以及殉難捐軀致命遂志載在史傳我

朝乾隆四十一年

賜謚忠介著有劉子全書百餘卷其學專以誠意爲主而歸於慎獨發明聖賢宗旨

道光三年二月

大三百〇七
小五

論原任尚書湯斌學術精醇順治年間有

旨褒其品行清端康熙年間有

旨稱其老成端謹至其政績卓著則禁侈靡興教化舉善懲貪興利除弊官嶺北時擒獲巨寇以靖地方巡撫江蘇時燬不經之祀化鬪很之風奏豁民欠議減賦額還京之日部民送者十餘萬人其他奏議忠言讜論剴切詳明正色立朝始終一節所學主於堅苦自持事事講求實用著書立說深醇篤實中正和平洵能倡明正學遠契心傳湯斌著從祀

文廟東廡列於明臣羅欽順之次從通政司參議盧漸請也乾隆元年

賜諡文正公籍隸河南授職詞垣歷官至尚書學術深醇事業昭著

不減前賢四庫全書公遺書十卷謂其堅苦自持事事講求實
用

奏議規畫周密條析詳明不同迂論

道光五年二月

諭明臣黃道周著從祀

文廟東廡明臣之次從浙閩總督趙慎畛請也公籍隸漳浦歷官
少詹忠言讜論守正不阿中遭貶黜矢志不移卒能致命成仁
完名全節明史傳贊乾隆四十一年

賜謚忠端錄其生平著述尤富四庫採錄其書多至十種皆闡明經
旨推治道而最深於易經孝經雖在獄中猶草易圖六十四象
寫孝經一百二十本可謂信道成仁以誠意爲主而歸於慎獨

以致知爲宗而止於至善守朱子之道脈而獨遡宗傳

尊經閣存貯書籍目錄

聖諭廣訓一部一套

御製周易折中一部一套

欽定書經傳說彙纂一部四套

欽定詩經傳說彙纂一部四套

欽定春秋傳說彙纂一部四套

欽定周官義疏一部七套

欽定儀禮義疏一部八套

欽定禮記義疏一部十套

御注孝經一部一套

御定孝經集注一部一套

御纂周易述義一部一套

御纂詩義折中一部一套

御纂春秋直解一部一套

御纂朱子全書一部四套

御纂性理精義一部一套

御定康熙字典一部六套

御批資治通鑑綱目一部八套

御定子史精華一部四套

御定佩文韻府一部二十套

御選古文淵鑑一部四套

大二百四十二
小五

御選唐宋文醕一部二套

御定四書文一部三套

周易注疏一部一套

尙書注疏一部一套

毛詩注疏一部二套

左傳注疏一部二套

公羊注疏一部一套

穀梁注疏一部一套

周禮注疏一部二套

儀禮注疏一部二套

禮記注疏一部二套

論語注疏一部一套

孟子注疏一部一套

孝經注疏一部一套

爾雅注疏一部一套

共三十六部計一百一十六套

御論一本

道光三年頒發

欽定學政全書一部十六本

道光五年將軍富俊以八旗世僕於

國語騎射而外當教以清漢文義

奏請頒發書籍

存貯印庫目錄

大一百九十五
小十一

開國方略一部四套十六本

八旗世族通譜一部六套二十六本

盛京通志一部八套六十四本

清文戶部則例一部殿本無存

清文大清律例一部六套四十八本

清文工部則例一部殿本無存

清文禮部則例一部殿本無存

康濟錄一部一套六本

耕織圖一部四套二十四本卽授時通考

淵鑑類函一部二十套一百四十本

清字四書一部一套六本

清字五經一部十一套五十二本

蒙古

聖諭廣訓一部一套二本

學額歲試入文童四名武童四名科試入文童四名廩額二增額二五年一貢吉林民籍由盛古塔移駐立學之始年遠無考學政官由雍正十二年添設嘉慶五年奉

旨添滿合二號文童每五六名取入一名十三年學政茹棻

奏定滿字號廩額一增額一合字號廩額一增額一十年一貢道光六年將軍富俊會同學政陳 奏添長春廳學額三名伯都訥一名初定未設廩增仍隸吉林儒學

儒林文苑

大三百〇六
小二十二

進士 民籍

田麟 順治壬辰科歷官內宏文院編修

馬維馭 乾隆庚子科歷官湖北施南府知府

舉人 民籍

吳三元 順治乙酉科歷官貴州遵義府知府

李錦 乾隆甲子科知縣銜未仕

劉銓 乾隆戊申科知縣銜未仕

馬維馭 乾隆乙卯科

恩貢生 民籍

寧廷璧 乾隆三十九年

王光裕 乾隆四十九年

宋桂芳

乾隆五十四年

武青選

乾隆五十九年

宣麟

嘉慶四年現任
臨汾縣知縣

劉福生

嘉慶九年

經元

嘉慶十四年

吳黃金

嘉慶二十四年

武全義

道光四年

拔貢生

民籍

李麟

乾隆三十年

王傑

乾隆四十一年

寧天祿

乾隆五十三年

馬維驄 嘉慶五年河
南試用知府

陳澤英 嘉慶十七年

王錫 道光四年

歲貢生 民籍

楊清久 乾隆三十四年

劉偉 乾隆三十九年

王懷溫 乾隆四十四年

陳志星 乾隆四十九年

張恭 乾隆五十四年

齊尙懿 乾隆五十九年雲
南大姚縣知縣

楊寶 嘉慶四年

顧懷良

嘉慶九年

韓謙

嘉慶十四年

張文蔚

嘉慶十九年

勾功

嘉慶二十四年

馬光第

道光四年

優貢生

合字號漢軍

沈承瑞

嘉慶十五年

沈志樸

嘉慶十八年

歲貢生

滿字號

七車布

嘉慶二十三年

歲貢生

合字號漢軍

田烈功 道光三年

白山書院在棧局街嘉慶十九年將軍富俊買民居爲學舍有房五間十九年原任吏部尙書鐵保謫戍吉林榜以今名將軍富俊以其地近市譁囂改修賓館卽舍後修學舍五間榜以故額其跋曰

此邦人士重武備而略文事將軍富俊副都統松霖首創書院延前歸德守熊西山之書前經歷朱慎崖宇泰前福建令朱堂履中主講席彬彬絃誦文教日興余喜其創始之難而樂觀其成也於是乎書

滿學十三

吉林二在

聖廟西南半里許學舍十四間康熙三十二年公捐營建乾隆七年

奏請官銀修葺八旗每佐領每歲額送學生四名

藍古塔二在城內東南隅學舍六間雍正六年公捐營建乾隆五十七年

奏請官銀修葺八旗每佐領每歲額送學生六名伯都訥二在城內正南學舍六間雍正六年公捐營建乾隆四十八年

奏請官銀修葺八旗每佐領每歲額送學生四名

三姓二在城內東南隅學舍六間雍正十二年公捐營建乾隆十七年

奏請官銀修葺八旗每佐領每歲額送學生四名以上八學俱分

左右翼

阿勒楚喀一在城內東南隅學舍三間雍正五年公捐營建乾隆三十三年

奏請官銀修葺八旗每佐領每歲額送學生三名

拉林一在堡內東北隅學舍三間乾隆二十一年公捐營建三十五年

奏請官銀修葺八旗每佐領每歲額送學生三名烏拉二學舍六間公捐營建嘉慶二年

奏請官銀修葺每歲額送學生四名乾隆三十年總管索柱捐建漢義學於城內

額穆赫索囉一學舍三間公捐生徒無額

廟式各由本處領催披甲內挑選通曉清漢文義者充作教習

祠祀

吉林

先農壇

在城小東門外一里正殿三楹壇高三尺面闊二丈四尺雍正十年建

社稷壇

在先農壇側高闊尺丈與先農壇同時建

風雲雷雨山川壇

在社稷壇側高闊尺丈與先農壇同時建

城隍廟

在城內將軍公署東前殿三楹左右配廡各三楹寢殿三楹鐘鼓樓二大門三楹里民修建

長白山望祭殿

在城西門外九里溫得赫恩山正殿五楹祭器樓二楹牌樓二座養祭鹿圈一雍正十一年建

松花江神廟

在城小東門外一里江北岸正殿五楹牌樓二座大門三楹東西門各一乾隆四十三年建

至聖先師廟

文昌閣

三才少言方

三

魁星樓 以上三廟已詳學校類

關帝廟 二一在城小東門外一里正殿三楹享殿三楹左右配廡各八楹鐘鼓戲樓各一大門三楹東西角門二乾隆

九年建一在城北門外二里北山正殿三楹鐘戲樓各一配廡三楹禪房二楹正殿恭懸乾隆十九年

御書靈著幽岐匾額

觀音堂 二一在城東北隅正殿三楹左右配廡各三楹鐘樓一大門一楹乾隆四十八年建一在城東門外十二里龍

潭山正殿三楹祭祀房三楹禪堂三楹乾隆十九年建正殿恭懸乾隆十九年

御書福佑大東匾額

崇禮龍王廟 三一在城小東門外一里江北岸正殿三楹配房三楹大門一楹乾隆二十五年重修一在江南岸

正殿三楹配房三楹門宇四楹乾隆五十七年增建一在城東門十二里龍潭山正殿三楹山坡牌樓一座乾隆十九年

建

西方寺 在城西門外一里正殿三楹左右配廡各三楹耳房三楹又彌勒殿一楹鐘鼓樓二大門三楹東西角門各一

六一百三三

乾隆二十五年里民重修

瘟神廟 在城內東南隅正殿三楹配廡大門共六楹康熙三十三年建

八蜡廟 在瘟神廟內即蟲王廟正殿三楹同時建

三義廟 在城西北隅正殿三楹配廡三楹大門一楹東西角門二乾隆二十年建

祖師廟 二一在城大東門內路南正殿六楹配廡六楹禪房三楹大門二楹嘉慶十二年重建一在城外北山藥王廟

側殿三楹

財神廟 在城西北隅正殿三楹左右配廡各三楹禪房三楹牌樓一座戲樓一座大門三楹東西角門二嘉慶十二年

里民重修

藥王廟 在城北山關帝廟後正殿三楹左右配廡各三楹大門二楹乾隆三年建

三官廟 在城隍廟東北隅正殿三楹左右配廡各三楹大門三楹乾隆四十四年建

東嶽廟 在城大東門外即天齊廟正殿三楹左右配廡各六楹禪房三楹鐘鼓樓二大門三康熙二十五年建

火神廟 在城西門外正殿三楹左右配廡各三楹大門三楹嘉慶十三年里民修建

馬神廟 在城西門外正殿三楹左右配廡各五楹大門三楹康熙三十四年建

山神廟 二一在城西門外正殿三楹左右配廡各三楹大門三楹戲樓一座雍正元年建一在城東地藏庵側正殿三楹

喜慶寺 在城西門外九里歡喜嶺正殿三楹配廡三楹耳房大門共四楹

北極廟 在城巴爾虎門外二里元天嶺正殿三楹配廡三楹耳房三楹大門二楹乾隆三十年建

大雄閣 即玉皇閣在城外北山藥王廟後山高閣三楹乾隆四十年建

地藏庵 在城大東門外一里正殿三楹配廡五楹禪房二楹耳房二楹鐘樓一座大門一間東西角門二乾隆五十二年

建年

鬼王廟 在城西門外一里正殿三楹大門一楹

毓麟堂 在城西北隅正殿三楹禪房一楹大門一楹乾隆十一年建

大五十九
小五百三十五

圓通寺

在城西隅正殿三楹耳房二楹大門二楹

娘娘廟

在城東關帝廟後正殿三楹大雄閣一座

酒仙祠

在娘娘廟側正殿三楹

土地祠

在城內城隍廟側正殿一楹

功德院

在城北隅正殿三楹後殿五楹左右配廡各三楹大門三楹

賢良祠

在城內功德院側正殿一楹

昭忠祠

在城內城隍廟側正殿三楹嘉慶八年建

靈古塔

至聖先師廟

在城東南隅康熙三十二年建

文昌廟

二一在城東南隅一在城外關帝廟側正殿三楹嘉慶二十三年建

魁星樓

同時建

城隍廟

在城外東南一里正殿三楹東西配廡各三楹大門一楹

關帝廟

各一在城外正西里許正殿三楹配廡各五楹鐘鼓樓各一在大門三楹一在城外東南三里正殿三楹享殿三

楹大門三楹一在城西南十里正殿三楹配廡各五楹大門三楹

山神廟

二一在城西門外里許正殿三楹東西配廡各五楹大門一楹一在城外東南一里正殿三楹東西配廡各五

楹大門三楹

地藏寺

二一在城西門外三里正殿三楹一在城外東北隅二里殿宇三楹

觀音閣

在城西門外三里正殿三楹大門三楹

茶棚菴

城南門外殿宇四楹

古佛寺

在城外東南里許

土地祠

在城外東南里許正殿一楹

七聖祠

在城東南一里正殿三楹左右配廡各三楹大門三楹

大七十
小三百七十三

藥王廟 在城外東南一里正殿三楹
左右配廡各三楹大門三楹

三官廟 在城外東北里許正殿三楹
左右配廡各五楹大門三楹

娘娘廟 在城外東北里許正殿三楹
左右配廡各五楹大門三楹

天齊廟 在城外東北一里正殿三楹
左右配廡各五楹大門三楹

財神廟 在城外東北一里正殿三楹
左右配廡各五楹大門三楹

祖師廟 在城外東北一里正殿三楹
左右配廡各五楹大門三楹

龍王火神廟 在城外東北一里正殿三楹
左右配廡各五楹山門三楹

馬神廟 在城外東南隅正殿三楹

伯都訥

至聖先師廟 在城東南隅道光二年建

先農壇 在城南門外雍正五年建

社稷壇 在城南門外 雍正十年建

風雲雷雨山川壇 在城南門外 雍正十年建

城隍廟 在城西南隅正殿三楹旁廡 三楹大門三楹雍正六年建

江神廟 在城南門外 嘉慶五年建

藥王廟 在城東南隅正殿三楹左右配廡 各三楹大門六楹乾隆十六年建

真武廟 在城西北隅正殿三楹左右配廡各 三楹大門一楹乾隆二十九年建

娘娘廟 在城南門外一里正殿三楹西廡 三楹山門一楹乾隆十六年建

關帝廟 在城外一里東南河口正殿三楹左右配廡 各三楹鐘鼓樓各一山門三楹康熙四年建

祖師廟 在城外東南一里正殿三楹 大門一楹乾隆十六年建

龍王廟 在城外東南一里正殿三楹 大門一楹乾隆四十九年建

山神廟 在城西北隅正殿三 楹乾隆二十九年建

大八十二
小四百●四

財神廟 在城西街乾隆

二十九年建

瘟神廟 在城南乾隆

五十九年建

魯班神 在城南道光

三年建

鬼王廟 在城南乾隆

五十七年建

昭忠祠 在城南嘉慶

九年建

石佛寺 在城外舊東京城東南隅相傳金時慈聖太后所建石

佛高二丈餘後石首墜有石工人欲鑿為碾甫舉錘頭

涿涿痛置之是夕里人同感異夢於是舉石首

湊諸像治鐵固之即古址建刹至今香煙尤盛

觀音寺 在吉林峯下

三姓

至聖先師廟 在城內

在城內

文昌閣 在城內

在城內

魁星樓 在城內

關帝廟 二一在西北隅正殿三楹左右配廡各五楹鐘鼓樓各一大門三楹一在南門外正殿三楹左右配廡各五楹

鐘鼓樓各一
大門二楹

馬神廟 在城西北隅正殿三楹山門三楹

城隍廟 在城西北隅正殿三楹左右配廡各三楹

龍王廟 在城北四里正殿三楹左右配廡各三楹鐘樓一大門三楹

三皇廟 在城外西南三里正殿三楹左右配廡各三楹鐘鼓樓各一大門三楹

娘娘廟 在城外東北隅五里正殿三楹西廡三楹大門一楹

財神廟 近城西北隅正殿三楹東西配廡各五楹鐘鼓樓各一大門三楹

火神廟 在城外西北隅正殿三楹東西配廡各三楹大門三楹

昭忠祠 在城外

大六十九
小三百四十八

阿勒楚喀

至聖先師廟 在城內

文昌廟 在城內

關帝廟 二一在城南門外正殿三楹東廡五楹大門三楹一在城外西南隅正殿三楹東西配廡各五楹鐘鼓樓各一

大門三楹

城隍廟 在城西北隅正殿三楹東配廡各三楹大門三楹

龍王廟 在城東北隅正殿三楹東配廡各三楹大門三楹

三皇廟 在城內

娘娘廟 在城外東南隅正殿三楹大門三楹

蟲王廟 在城外東南隅正殿三楹大門一楹

財神廟 在城外西南隅正殿三楹

昭忠祠 在城內

山神廟 在城外西南隅正殿三楹東
西配廡各三楹大門一楹

烏拉

關帝廟 二一在城內東北隅正殿三楹一
在城北四里正殿三楹後廡二楹

藥王廟 在城外西南隅正
殿三楹後殿三楹

財神廟 在城外西北半
里正殿三楹

娘娘廟 在城外西北隅二里
正殿三楹後殿三楹

山神廟 在城外西北四
里正殿三楹

拉林

關帝廟 在街內東北隅正殿三楹東
西配廡各五楹大門二楹

娘娘廟 正殿
三楹

大七十二
小二百六十五

藥王廟

正殿
三楹

山神廟

正殿
一楹

以上三廟俱在

關帝廟內

雙城堡

關帝廟

中左右屯各一右屯未建廟之先佐領武倫保忽感異
夢晨起出門遙望正東里許有大廟宇一座策馬追尋

愈遠無蹟回至初見之所焚香許
愿建廟破土興工時得古磬焉

吉林外記卷六

六三十一
小八十一

吉林外記卷七

田賦

公署

物產

人物

田賦

吉林陳民地七十一萬零二百四十一畝分別三則銀米各半徵收應徵銀米地各三十五萬五千一百二十畝零五分內上則地各十六萬九千六百二十四畝五分每畝徵銀三分米六升六合中則地各九萬三千三百六十三畝每畝徵銀二分米四升四合下則地各九萬二千一百三十三畝每畝徵銀一分

米二升二合乾隆四十二年以後續增陳民墾地三十二萬五千八百九十八畝不分等則每畝徵銀八分米四合四勺二抄五撮米一石折徵銀一兩行差人丁二萬五千一百七十丁每丁徵銀一錢五分以上其徵地畝丁銀五萬六千四百九十六兩八錢七分九釐

靈古塔陳民地五萬二千七百三十八畝分別三則銀米各半徵收應徵銀米地各二萬六千八百六十九畝內上則地各九千五百十九畝五分每畝徵銀三分米六升六合中則地各八千六百八十二畝五分每畝徵銀二分米四升四合下則地各八千六百六十七畝每畝徵銀一分米二升二合乾隆四十六年續增流民墾地一千三百二十一畝不分等則每畝徵銀

八分米四合四勺二抄五撮行差人丁一千三百五十丁每丁徵銀一錢五分以上共徵地畝丁銀二千零六十兩零九錢二分二釐

伯都訥陳民地十萬零四十九畝八分五釐分別三則銀米各半徵收應徵銀米地各五萬零二十四畝九分二釐五毫內上則地各二萬零二百九十六畝九分二釐五毫每畝徵銀三分米六升六合中則地各一萬五千零四十畝每畝徵銀二分米四升四合下則地各一萬四千六百八十八畝每畝徵銀一分米二升三合乾隆四十二年以後續增陳民流民及婁王氏孫悅明各控地案內並查出黑林子拉林河西岸等處民人各墾地畝二十四萬五千六百八十三畝不分等則每畝徵銀八分

米四合四勺二抄五撮行差人丁一萬四千三百七十五丁每
丁徵銀一錢五分以上其徵地畝丁銀二萬六千二百七十九
兩一錢一分九釐

三姓陳民地一百二十畝分別二則銀米各半徵收應徵銀米
地各六十畝內上則地各二十畝每畝徵銀三分米六升六合
中則地二十畝每畝徵銀二分米四升四合下則地二十畝每
畝徵銀一分米二升二合乾隆四十六七年續增流民墾地六
十六畝不分等則每畝徵銀八分米四合四勺二抄五撮行差
人丁四百十一丁每丁徵銀一錢五分以上其徵地畝丁銀七
十一兩零六分二釐

阿勒楚喀行差人丁三千零七十四丁每丁徵銀一錢五分其

徵丁銀四百六十一兩一錢無地畝糧

以上通省共徵地丁銀八萬五千三百六十九兩零八分二釐

稅課

吉林額徵牲畜菸麻牙當燒酒木稅銀共二千九百八十兩

寧古塔額徵牲畜菸麻牙當燒酒木稅銀共二千一百五十六兩九錢

伯都訥額徵牲畜菸麻牙當燒酒魚網稅銀共一千零四十九兩三錢

三姓額徵牲畜菸麻牙當燒酒貂皮稅銀共四百四十三兩二錢五分二釐

阿勒楚喀拉林額徵牲畜菸麻牙當燒酒稅銀共四百九十九兩

長春廳額徵牲畜牙當燒酒稅銀共四百三十三兩九錢六分
官莊

吉林官莊五十處壯丁五百名每壯丁地十二晌共地六千晌
每壯丁交倉石糧三十石共交糧一萬五千石官牛三百條內
歲應倒斃牛六十條買補倒斃每牛價銀各六兩七錢共應領
銀四百零二兩嗣因連年被灾收成歉薄每年應交糧石不足
額嘉慶十七年將軍賽沖阿

奏准將應徵丁糧以一萬六百八十石作為正額交納嘉慶二十
一年將軍富俊

奏准官莊五十處壯丁五百名內除逃故丁一百五十四名現有
丁三百四十六名實缺丁一百五十四名共計官地及旗民私
開毗連之地一萬五千二百四十八晌三畝按地之肥瘠統令
各按上中下等則徵收共計得糧一萬一千一百九十七石四
斗五升令各丁赴倉交納較前定額一萬六百八十石之數多
增糧五百一十七石四斗五升現定租糧較前甚輕以後每年
只領一半倒斃牛價銀已足敷用每年可節省銀二百零一兩
查出法特哈邊門外三道卡薩哩閑荒招佃開墾取租以補缺
額俟有認領之人卽行陞科起租俟能敷原額一萬五千石之
時再行具

奏

寧古塔官莊十三處壯丁一百三十名每壯丁地十二晌共地
一千五百六十晌每壯丁交倉石糧三十石共交糧三千九百
石官牛七十八條內歲應倒斃牛十六條買補倒斃每牛價銀
各六兩七錢共應領銀一百零七兩二錢

伯都訥官莊六處壯丁六十名每壯丁地十二晌共地七百二
十晌每壯丁交倉石糧三十石共交糧一千八百石官牛三十
六條內歲應倒斃牛七條買補倒斃每牛價銀各六兩七錢共
應領銀四十六兩九錢

三姓官莊十五處壯丁一百五十名每壯丁地十二晌共地一
千八百晌每壯丁交倉石糧三十石共交糧四千五百石官牛
九十條內歲應倒斃牛十八條買補倒斃每牛價銀各六兩七

錢共應領銀一百二十兩六錢阿勒楚喀拉林官莊六處壯丁六十名每壯丁地十二晌共地七百二十晌每壯丁交倉石糧三十石共交糧一千八百石官牛三十六條內歲應倒斃牛七條買補倒斃每牛價銀各六兩七錢共應領銀四十六兩九錢以上共原額地一萬零二百晌共徵倉穀二萬五千五百石

旗田

吉林八旗及蒙古烏鎗營旗地共九萬五千一百三十四晌

水手營地共二千二百二十六晌

各驛站地共四萬九千九百九十七晌

圍邊門地共二萬六千六百五十二晌

寧古塔旗地共六萬五千二百九十晌

伯都訥旗地共六萬九千零十一晌

三姓旗地共八千一百十六晌

阿勒楚喀拉林旗地共三萬六千二百七十八晌

瑋春旗地共一萬二千零五十晌

烏拉旗地共四萬零三百二十八晌

以上旗地共三十六萬五千零九十二晌無賦額

公署

吉林

將軍公署

正面大堂七間穿堂五間儀門三間大門三間乾隆十九年

高宗純皇帝巡幸吉林御書

天江鎮鑰匾額恭懸穿堂內大堂後印房辦本摺滿檔房五間漢檔房二間偏東督催所辦事房三間堂前西廂工司辦事房三間檔房二間戶司辦事房五間檔房三間同知辦事房

九百三十二

二間東廂兵司辦事房五間檔房三間刑司辦事房五間檔房三間儀門外東前鋒營房三間前鋒該班房二間鳥鎗營辦事房三間土地祠一間西水手營辦事房三間虎鎗營房二間管圍場辦事房二間番役聽差房一間署外左右八旗聽差房十六間鹿角木全照壁一牌樓二

倉

在城內東北隅康熙二十八年建太平倉六十間永盛倉房六十四間嘉慶二十三年均改修厥倉看倉巡更堆房共六

間倉上辦事房三間乾隆八年增修八旗義倉房九十六間又在西門外西南隅建水手營義倉房七間

庫

在公署內印庫樓二間銀庫樓二間康熙十五年建棉甲庫樓三間鎗庫樓二間雍正十年修看庫巡更堆房共四間

監

獄在公署內大獄房十五間神廟一間看獄巡更堆房四間獄官住房三間行獄房五間看獄巡更堆房三間

演武廳

在北門外正廳五間捲棚三間操演亭三間堆房二間十旂聽差房十間嘉慶三年重修

街道廳

兩翼游桶房八間查街辦事房四間

果樓

存貯樓三間晒晾樓三間看守堆房五間

鷹房

六間在巴爾虎門內東南隅

黑牛房

六間牛圈五間羊圈二間
看守堆房三間在北門外

官參局

大堂五間東庫三間西庫三間穿堂五
間大門五間照壁一座在糧米行街北

火藥局

庫三間看庫巡更堆房二間
造火藥房六間在北門外

八旗弓匠房

十六間在河
南街路南

八旗鐵匠房

十七間在西
門內路北

船營庫

在西門外西南隅火藥庫三間顏
料庫三十間看巡更堆房三間

龍船房

十二間造船房二間看船
巡更堆房二間在西門外

公館

在官參局東隔壁嘉慶二十二年捐建正房五間東西
廂房各三間二門一間東西廂房各五間大門五間

將軍署

共住房六十四間東西轅門二間柵欄改暨板
塙照壁一座旗桿二根在尙義街南臨江岸

副都統署

共住房四十二間轅門二間
照壁一座在糧米行街路南

理事同知公署

共房三十間在
城內西北隅

五十三
小六百四十一

巡檢公署

其房八間在同知公署東隔壁

學正公署

在聖廟西院其住房八間明倫堂三間尊經閣三間

民倉

永豐倉房三十六間看倉巡更堆房三間嘉慶十九年修在同知公署西南隅

獄房

六間看獄巡更堆房三間在同知公署西隅

稅房

三間在牛馬行街西

十旗官房

共二百零八間

八旗堆房

共二十三間按五街五門分設西門外江岸擺渡房二間

烏拉

協領公署

正房五間東西廂房各三間二門一間大門一間左右聽差房二間

八旗義倉

十三間乾隆二十一年修在東門外看倉堆房三間

八旗堆房

共二十四間在城內

演武廳 三間堆房二間在東門外

總管公署 大堂五間二堂五間檔房三間八旗辦事房十間

倉 在城內東北隅共八十三間康熙四十六年建現實存五十間看倉堆房三間

銀庫 一間

貯魚房 三間

貯蜜房 三間

伊通

佐領公署 正房三間東西廂房各三間大門一間

演武廳 三間

義倉 鑲黃旗正黃旗各三間

巡檢公署 大堂三間住房三間書吏房一間二門一間大門一間照壁一座

大七十六
小一百七十四

額穆和索囉

佐領公署 正房三間聽差房三間大門一間

演武廳三間

邊門各台站

義倉 巴彥鄂佛囉邊七台每台倉房二間共二十一間黑爾蘇邊八台每台倉房七台每台倉房三間共二十一間烏拉額赫穆等十八站每站倉房三間烏拉站水手倉房三間共五十七間金珠鄂佛囉等十站每站倉房三間共三十三間統計一百七十四間

長春廳

通判公署 大堂三間二堂三間穿堂三間書吏房六間檔房三間住房三間二門三間大門一間左右聽差房二間

照壁一座

巡檢公署 大堂三間書吏房一間住房三間二門一間大門一間照壁一座

監獄

房六間禁卒房二間獄神廟一間看獄巡更堆房一間

靈古塔

副都統公署

大堂五間穿堂五間左右司辦事房各三間櫥房各三間印房三間前鋒營虎鎗房共六間儀門三

間大門三間櫥欄全照壁一座

倉

公倉四十間倉櫥房二間看倉巡更堆房二間康熙三十五年建又雍正五年增建義倉三十二間

庫

在公署內印庫一間銀庫三間看庫巡更堆房二間雍正四年建

演武廳

三間看守堆房三間

監獄

在公署內五間看獄巡更堆房三間

官參局

共二十九間乾隆二十八年建

八旗弓鐵匠房

六間

火藥庫

一間看庫巡更堆房二間

六六十七

公署百二十二

果樓三間

稅房三間

激桶房八間

鷹房三間

副都統署住房三十七間照壁一座

琿春

協領公署大堂五間辦事房三間檔房三間儀門一間大門三間

義倉十五間看倉巡更堆房三間雍正五年建

庫在公署內銀庫二間

演武廳三間

三旗堆房三間

伯都訥

副都統公署 大堂五間穿堂三間印房二間左右司辦事房各三間前鋒營房三間虎鎗營房三間土地祠

一開儀門一間大門三間八旗辦事房四間欄台照壁一座

倉 中倉十間康熙三十二年建後倉十間雍正六年建前倉十二間乾隆十年建看倉巡吏堆房二間又雍正五年建義倉二

十六間看倉巡吏堆房二間

庫 在公署內印庫二間銀庫二間看庫巡吏堆房各二間康熙三十二年建

監獄 三間看獄巡吏堆房三間

演武廳 三間看守堆房二間

果樓 二間看守堆房二間

激桶房 二間

八旗弓鐵匠房 共六間

大六十八
小二百五十六

火藥庫

一間看庫巡更堆房二間

副都統署

共住房二十五間照壁一座

同知公署

共房二十一間照壁一座

巡檢公署

共房七間照壁一座

獄房

六間獄神廟一間看獄巡更堆房三間

民倉

二十四間看倉巡更堆房二間嘉慶二十一年建

稅房

二間

孤榆樹屯

巡檢公署

大堂三間住房三間書吏房一間二門一間大門一間照壁一座

三姓

副都統公署

大堂五間穿堂五間大門三間儀門三間印房三間左右司辦事房各三間檔房六間前鋒營荒營

与木小記卷七

房共六間八旗聽差房八間鹿角木全照壁一座

倉 永豐倉五十間康熙三十二年建乾隆五十五年增建二十間倉檔房三間看倉巡更堆房四間又義倉二十間雍正六年

建

庫 印庫一間銀庫二間棉甲庫一間看庫巡更堆房六間

監獄 五間看獄巡更堆房三間

演武廳 三間看守堆房三間

賞需樓 三間

果樓 二間看樓堆房二間

查街辦事房 三間

八旗弓鐵匠房 六間

稅房 三間

卷七十一
二百六十八

火藥庫一間

鷹房五間

船房三間

副都統署 共住房二十二間 照壁一座

阿勒楚喀

副都統公署 大堂五間 穿堂三間 儀門一間 大門三間 左右司辦事房各三間 前鋒營房三間 八旗聽差房十間

柵欄全照 壁一座

倉 公倉六十間 乾隆三十二年修看倉 巡更堆房三間 又雍正六年建義倉二十間 乾隆三十九年奉撥七間 現實存倉房

六十間 義倉十三間

庫 印庫二間 銀庫二間 看庫巡更堆房各二間

監獄 九間 看獄巡更堆房三間

演武廳 二間看守 堆房二間

果樓 二間看守 堆房三間

查街辦事房 三間

稅房 三間

副都統署 共住房三十六 間照壁一座

拉林

協領公署 大堂五間穿堂三間 儀門一間大門三間

倉 公倉六十間乾隆三十年建看倉巡更堆房三間又乾隆三十九年建義倉十三間

棉甲庫 二間看庫巡更堆房三間

演武廳 二間看守 堆房三間

果樓 二間看守 堆房三間

大六十一
小二百四十六

查街辦事房三間

稅房二間

協領署其住房三十六間

雙城堡

中屯協領公署正堂三間東廂房三間西廂房三間大門一間

義倉九間看倉巡更堆房一間

左屯佐領公署正堂三間廂房三間大門一間

右屯佐領公署正堂三間廂房三間大門一間

左右屯義倉各九間看倉巡更堆房各一間

物產

貂鼠吉林寧古塔三姓阿勒楚喀諸山林多有之甚輕煖英俄嶺以南者色黃嶺北者色紫黑三姓下江黑津皮極高除

貢皮二千六百張
外餘准通商貿易

白貂鼠

另有一種稱千年白者非
但不能似黑黃色者多耳

捨狢猯

類野狸而大耳有長毫白
花色明一統志謂之土豹

狐

色赤而大夜擊之火星遊出
毛極溫煖集腋為裘尤貴重

元狐

出乍江大於火狐色黑毛煖最
貴又次黑毛稍微黃者名倭刀

沙狐

生沙磧中身小色白腹下皮集
為裘名天馬皮頰皮名烏雲豹

貂熊

大如狗紫色出藍古塔
者頭紫黑兩肋微白

銀鼠

吉林省諸山中有之
毛色潔白皮禦輕寒

灰鼠

吉林省諸山中有之
白為上灰黑者次之

東珠

盛京以東各河蛤蚌皆產珠惟吉林黑龍江界內松花江
嫩江艾琿各江河產者最佳每年烏拉總管分派官兵乘

船裹糧湖流尋採遇水深處用大桿插入水底採者抱桿面
下入小搜取蛤蚌擲出眼同採官剝開或百十內得一顆包

裏用印花封記至秋後方回將軍何總管挑選如形體不足分數或不光亮仍棄之於河以示嚴禁不敢自私亦漢時鐘離意委地之廉潔也至冬底入貢驗收按成色給

賞綢緞布疋近來折發銀兩牲丁更沽實惠矣

樺皮

樹皮似山桃有紫黑黃花紋可裹弓及鞍轡諸物吉林諸山皆有之烏拉向有樺皮屯世管佐領帶領兵丁剝取入

貢雍正年間裁去世管佐領將兵丁撥給官地交糧改爲吉林八旗官兵剝取除額貢之外有以樺皮作船大者能容數人小者挾之而行遇水輒渡游行便捷又以

樺皮蓋窩棚並有剝薄皮縫聯作油單大雨不漏

菸

東三省俱產惟吉林省者極佳名色不一吉林城南一帶名爲南山菸味豔而香江東一帶名爲東山香味豔而醞城北邊台菸爲次寧古塔菸名爲台片獨湯頭溝有地四五晌所生菸葉止有一掌與別處所產不同味濃而厚清香入鼻人多爭買此南山東山台片湯

頭溝之所分也通名黃菸

麻

有線麻蕪麻之別線麻堅實凡城堡一切繩套細縛需用無窮吉林城北一帶種麻者居多每歲所收不減於菸秋後入店售賣販者菸麻並買轉運內地名爲菸麻客此吉林出產

松塔

吉林烏拉寧古塔諸山皆產而窩集中所產更勝其形下豐上銳層瓣鱗砌望之如宰堵每瓣各藏一粒既熟則瓣

開而
子落

松子

生松塔中烏拉總
管每歲入貢

安春香

生於山巖潔淨處高一尺許葉似柳葉而小味香可
供祭祀生於長白山者尤異常俗呼為安息香

七里香

枝葉似安春香葉大而厚惟
產於長白山別處無所見

烏拉草

俗語云關東有三寶人參貂皮烏拉草夫草而與人僂
貂皮並立為三則草之珍異可知吉林山內所產尤為

細軟北地嚴寒冰雪深厚凡穿烏拉或穿塔塔馬者必將烏
拉草錘熟墊於其內冬夏溫涼得當即嚴寒而足不覺凍此

所以居三寶之一也戊辰奉天學政茹棻考古命題烏拉草
吉林優貢沈承瑞有任他冰雪侵鞋冷到處陽春與腳隨之

句學使賞識
拔為尤焉

渠麻菜

城外各地邊外之地多有之忽東忽西時有時
無諺云有撥家之說其滋生多在鹽旺之地

小蒜

稱為小根菜吉林田原向陽處開凍時百草未萌小根菜
先見青芽味辛清香可供廚饌性消火毒洵野蔬之異品

歲以入
貢

大三十一
小八百一十六

山蔥

爾雅謂之茗俗稱爲寒蔥產於法城一帶諸山中最爲肥嫩有寒蔥嶺採取時必就寒蔥之水洗淨卽時用鹽盛

罐方不能壞易水未能良也其味深長炎熱時青蠅不能沾落係潔淨之品歲以入貢

山蕒

莖一葉爾雅謂之蕒詩六月食鬱卽此出輝法城一帶者尤佳

蕨菜

卽詩云言采其蕨美其名吉祥菜產於吉林山中莖色青紫肥潤每歲晒乾入貢

蘑菇

諸山中皆有之種類不一生榆者爲榆蘑生榛者爲榛蘑生樟者爲香樟蘑而榆蘑生榆樹窟中尤鮮美卽古所謂

樹雞是也

紫皮蘿蔔

蘿蔔皮色帶紫者間亦有之獨三姓所產紫皮蘿蔔不但皮紫內肉亦紫味逾冰梨爽脆適口

托盤

產於吉林山中類似楊梅名曰托盤取象形焉色紅鮮豔味更甜美惜採摘逾夜卽化爲紅水清晨吸飲香美尤爲

獨絕

海參

形如蟲有肉刺環春出者尤佳

海紅

形似海參能滋補出環春

海茄

形似團哈皮肉似海參無刺
滋陰勝品功同海參出暹春

海藻

出東海黑色亂如髮葉似藻葉因名海藻本草云有二種
生於淺水黑色短如馬尾一種生於深海中葉大如菜唐

書渤海傳生於南海者亦細名為昆布
其名雖殊其實一類今暹春所出頗盛

海帶

似海藻而粗柔勁而長紫赤色
今採者並海藻通呼為海菜

海蘊

葉似亂絲亦
海藻之類

鱣鯉

即尋鯉也長丈餘鼻
長有鬚口近頷下

細鱗魚

頭尖而
色白

哲鱸魚

似鱸魚色黑
味美不腥

鮑魚

似小鰻花出靈古
塔南湖者極佳

鰕魚

大口細鱗有斑
彩即鰕花魚也

魴魚

縮項背脊細
鱗即鰻花也

大四百七十六
小四百七十六

鱈魚

細鱗形容腹扁頭尾向上即白魚以上同諸色魚歲以入貢

人參

俗稱棒錘有巴掌燈台二夾子四披葉五披葉六披葉之名產於吉省烏蘇哩綏芬英俄嶺等處深山樹木叢林之地秉東方生發之氣得地脈瀄精之靈生成神草為藥之屬上上品人參贊云三柎五葉肯陽向陰欲來求我根樹相尋鹿茸乃仙獸能別良草述異記云鹿千歲為蒼又五百歲為白又五百歲為玄遼東山闔草壯鹿得以蕃息其茸角膠

鹿茸

血力精足入藥自為上品

虎骨膠

虎之一身筋節氣力皆出前足脛骨帶脛骨用全虎骨熬膏膠治一切風寒溼潮腿疾虛虧之症亦有專用脛

骨熬膏膠者其效如神

牛黃

經疏云牛食百草其精華凝結成黃或云牛病乃生黃者非也牛有黃必多吼喚以盆水承之伺其吐出迫鳴即墮水名曰生黃揭折輕虛而氣香者良殺死角中得者名角黃心中者名心黃肝膽中者名肝膽黃或塊或粒總不及生得者但磨指甲上黃

透指甲者為真

熊膽

本草稱為上品本不易得吉省深山密林中樵採者時常遇之獵戶捕之易得也

臘朐臍

即海狗腎綱目云出西番壯似狐而尾長大臍似麝香黃赤色按臨海志云出東海水中狀若鹿頭似狗尾長

又出登萊州其狀非獸非魚但前足似獸而尾似魚觀此似狐鹿者其毛色也似狗者其足形也似魚者其尾形也今瑋春三姓地近海邊亦有之

醫家以滋補藥多用之

五味子

性溫五味皆備皮甘肉酸核中苦辛都有鹹味爾雅謂之葶猪子少肉厚者為勝出吉林者最佳

細辛

一名少辛管子云五沃之土羣藥生小辛是也醫家以吉省細辛為佳通行各省

黃精

處處山谷皆有之服食上品以其得坤土之精久服益壽吉林山土肥壯自然甘美勝他處博物志云太陽之草名

黃精食之可以長年太陰之草名鉤吻食之立死黃精鉤吻形植之別詳見綱目

菱蕤

根似黃精小異莖幹強直似竹箭有節葉狹而長表白裏青性柔多鬚

赤芍

即芍藥根亦有白者此處所產尤勝他處

黃芩

有枯芩條芩之別中虛者名枯芩肉實者名條芩其用自異此處所產俱備惟深色堅實者良

柴胡

北產者如前胡而輒入藥亦良南產者不似前胡如蒿根硬不堪用

大二十九
小六百九十九

升麻

其葉似麻其氣上升故名綱目云形細而黑極堅者為佳今則通取裏白外黑而堅實者去鬚蘆用之俗名為鬼臉

升麻其苗呼

為崩隆芽

紫草

根花俱紫可以染紫草山產粗而色紫入藥紫梗園產細而色鮮只染物不入藥

北山查

有大小二種北者小肉堅去核用亦有力

益母草

綱目云小暑端午或六月六日採益母莖葉花實用治百病尤良

王牟牛

生於深山密林朽木上性溫其形長有寸許細如花莖色黑肉白能下乳不易得產於綏芬烏蘇哩諸山中創

參人有認識者採來售

賣此藥本草綱目所無

防風

黃潤者良

麝

形如麝一名香麝喜食柏脂血入藥名麝香出三姓

通草

有細細孔兩頭皆通故云通草即今所謂木通

桔梗

此草之根結實而梗直故名根如指黃白色春生苗莖高尺餘葉似杏葉而長味苦辛者真

与木小已紫七

上

威靈仙

威言性猛靈仙言其功神生先於眾草方莖數葉相對其根稠密多鬚年深旁達一根叢鬚數百條長者二尺許初時黃黑色乾則深黑色人稱鐵腳威靈仙但色或黃或白者不可用

火麻仁

即線麻子

薏苡仁

形如珠稍長青白色味甘咬粘人齒如糯米可作粥飯本地多種之又本草云一種粘牙者尖而殼薄即薏苡也一種圓而殼厚堅硬者即菩提子其米少可穿作念珠

馬齒莧

葉有大小之別大葉者為狗耳草不堪用小葉並比如馬齒而性滑利似莧柔莖布地細細對生者為是入藥須去莖其莖無效本地多採以煮曬為蔬

翻白草

高不盈尺一莖三葉尖長而厚有皺紋鋸齒面青背白開小黃花結子皮赤肉白如雞肉故又名雞腿根生食皆宜

卷柏

叢生多出石間苗似柏葉而細拳攣如雞足青黃色高三五寸無花子宿根紫色多鬚其性耐久故又名長生不死草

大四十七
小六百二十四

穀精草 穀田餘氣所出葉似嫩穀秧
白花如辟星故名此處尤多

狼毒 葉似商陸及大黃莖葉上有毛
根皮黃肉白以實重者為良

旋覆花 多生水旁長二尺許細莖葉似柳
花如菊大如銅錢故又名金錢花

鼠尾草 以穗形命名野田平澤中甚
多紫花莖葉俱可採滋染阜

瞿麥 莖纖細有節高尺餘一莖生細葉有尖花開紫赤色
者居多子頗似麥爾雅謂之大菊俗呼為落陽花

猪苓 多生楓樹下塊色黑如猪屎皮黑肉白而實者良
本草謂之木之餘氣所結亦如松之結茯苓之義

以上物產藥材有志內未載載而未詳者今擇其著名貴重
者攷查增錄以補志之未詳備也

人物

賚保 大學士軍機大臣
吉林鑲藍旗滿洲

舒赫德 大學士平定圖爾古特新
疆山東臨清州瑋春滿洲

慎泰 戶部侍郎吉林正黃旗滿洲

順海 都察院左都御史吉林鑲黃旗滿洲

穆克德恩 領侍衛內大臣西安將軍出師巴里坤烏拉滿洲

富德 御前大臣領侍衛內大臣議政大臣理藩院尙書方略館副總裁管理繕書房左翼右官學新舊營房事務正黃旗蒙古都統出師巴里坤金川雲南一等威勇侯吉林正黃旗滿洲

額勒登保 御前大臣太子太保領侍衛內大臣出師緬甸后峯堡金川臺灣廓爾哈苗疆又授川陝楚經略大臣賞戴雙眼花翎晉封威勇公世襲一等威勇侯霍隆武巴圖魯烏拉滿洲

哈朗阿 御前侍衛前鋒統領世襲一等威勇侯出師出南喀什噶爾西朗阿巴圖魯額勒登保之子烏拉滿洲

博崇武 福建副將出師蘭州山東金川馮桑巴圖魯吉林正黃旗滿洲

朱爾杭阿 御前侍衛都統前引大臣兼管上駟院武備院出師廓爾哈山東蘭州七達勒巴圖魯吉林正黃旗滿洲

滿洲 崇武胞弟

大八十九 小四百九十一

巴達瑪 正白旗都統出師金川奇爾特

多隆武 四川提督出師川陝楚巴

尼瑪善 成都將軍出師川陝楚吉林

特依順保 黑龍江將軍出師川陝楚

格布舍 寧夏將軍出師川陝楚

僧保 吉林副都統

靈泰 盛京副都統

武靈阿 吉林副都統出師雲南金川

佟悔 熊岳副都統

烏雅勒達 署齊齊哈爾將軍伯都訥副都統塔爾巴哈台參贊

達嵩阿 三姓副都統出師金川獎賞花翎烏雅勒達胞弟

与木小己卷七

蘇倫保

伯都訥副都統加都統銜出師川陝楚
喀什噶爾爾哈布台巴圖魯正黃旗滿洲

常在

山東青州副都統出師川陝
楚博奇巴圖魯三姓滿洲

索住

吉林副都統兼烏拉總
管獎賞花翎烏拉滿洲

吉祿

吉林副都統兼烏拉總管
烏拉滿洲 索住之子

烏陵阿

喀什噶爾辦事大臣前引大臣出師川陝
喀什噶爾獎賞花翎吉林鑲白旗滿洲

舒爾哈善

呼倫貝爾總管喀什噶爾辦事大臣出師川陝楚
河南喀什噶爾舒瑪海巴圖魯吉林鑲白旗滿洲

穆騰額

阿勒楚喀副都統出師川陝楚吉
利杭阿巴圖魯吉林正白旗滿洲

明德

黑爾根副都統出師川陝楚
嘎爾薩巴圖魯烏拉滿洲

武登額

熊岳副都統出師雲南金川臺灣川陝楚嘎爾薩巴圖
魯八十歲五世同堂奉 旨賞恩榮介壽匾額吉林

鑲白旗

滿洲

德海

愛琿副都統出師川陝楚河南喀什噶
爾騰奇特依巴圖魯阿勒楚喀滿洲

大六十四
小四百八十一

和福 寧古塔副都統出師河南獎賞

精欽保 乾清門行走阿勒楚喀副都統
出師川陝楚獎賞花翎春滿洲

倭楞泰 吉林副都統出師川陝楚喀什噶
爾賞換花翎吉林鑲藍旗滿洲

安福 乾清門行走前鋒統領出師川陝楚
喀什噶爾巴圖魯吉林鑲藍旗滿洲

富永 熊岳副都統出師金川川陝楚
獎賞花翎吉林鑲藍旗滿洲

富僧德 乾清門行走護軍統領出
師川陝楚巴圖魯春滿洲

阿勒罕保 乾清門行走副都統出師川陝
楚喀什噶爾巴圖魯春滿洲

富蘭 察哈爾都統護軍統領出師川陝
楚獎賞花翎吉林正黃旗滿洲

我

朝發祥

長白國初佐命貔貅之士皆出自吉林省載在史冊今自乾隆年

間關錄補志之未載也

吉林外記卷七終

六七十六
小二百二十七

吉林外記卷八

時令

風俗

貞節

雜記

時令

吉林太陽出入時刻大抵春分六日後視京師出漸早入漸遲
此晝之所以長於京師也秋分六日後視京師出漸遲入漸早
此晝之所以短於京師也至一歲節氣視黑龍江時刻較早視
奉天時刻較遲如道光元年歲正二日立春吉林巳正初刻十
四分黑龍江巳正一刻一分奉天巳正初刻一分觀此可以驗

天時矣

吉林通省琿春獨煖地近海隅日出早見得陽氣之先也伯都訥半屬沙漠四時多風春風尤甚或竟日不息軍民不燃竈火爐爨爲食三姓最北至寒其餘各城風景相同琿春之煖亦不似內地酷熱當風交扇猶然而雨汗淋漓也不過較煖於諸城而已

松花江每歲十月堅冰可行重車然雖極寒向陽處終有冰孔立春後冰孔乃全實故刨參人於正月內方沿冰用扒犁送米入山至清明節前後冰泮但二月清明則冰解反在節前三月清明則冰解反在後歷驗不爽其理殊不可解

風俗

吉林

性直樸習禮讓務農敦本以

國語騎射爲先兵挽八力鎗有準頭驍勇聞天下自嘉慶五年添設滿合考試文風丕振

烏拉

尙勤儉明禮讓總管衙門管下人採捕優長協領管下人精於騎射

寧古塔

尙淳實耕作之餘尤好射獵近年漢字事件日增競談文墨

琿春

舊無丁民亦無外來民戶皆熟

國語捕打海參海菜爲生少耕作春夏秋冬射獵無虛日尤嫻於

鎗

伯都訥

風氣醕古人樸厚好騎射常於馬上擲木棒捕野兔山猫百發

百中

木棒長一尺徑寸餘

三姓

好直爽善騎射鎗技嫻習數年前曾有協領福珠隆阿射虎項

骨後第三斑點處一箭倒臥不動

虎項骨後第三斑點通心

阿勒楚喀

尙耕釣素稱魚米之鄉習禮讓嫻騎射務本而不逐末

拉林

九五百四十二
小二十三

道樸相尙務農之餘熟嫻騎射

雙城堡

習尙勤儉旗丁熟嫻耕作地利大興

貞節

貞女姚氏吉林正藍旗滿洲閑散德得未婚妻年二十九夫歿于歸矢志柏舟誓死靡他守節終身乾隆三十九年

旌表

貞女鄔扎氏琿春正黃旗三等侍衛訥依松額未婚妻本名門望族父吉林協領僧保兄福建副將博崇武弟

御前侍衛都統珠爾杭阿識字通文熟讀綱目常與弟兄論及治政悉獲至正之要宗戚稱爲女中丈夫年二十八夫陣亡金川剪

髮痛哭徒步于歸撫養夫先妻之子多倫保成立後陞協領長孫富尼雅杭阿陞佐領教以居官清正之道不事貪墨多倫保事母至孝凡家中事無巨細皆奉母命而行雖日用常餐未嘗先食氏偶病必親侍湯藥終夜不寢盛暑衣不解帶貞節格天得此孝子奉養鄉人稱之守節五十一年嘉慶三年

旌表

查城

東三省向例五年

星使按臨各城查閱錢糧倉庫點驗軍裝器械馬匹總在各季往返跋涉不勝其累不但驛站疲於奔命而各城供給竟至一二年不能彌縫其闕嘉慶二十三年將軍富俊條奏以各城卽有

虧空計值巡閱之年早爲借備齊全盤查成爲故套勞兵傷財
於公事無益請停止責成三省將軍隨時稽查不拘年限出其
不意

欽派盤查庶得實濟奉

旨向例每屆五年派京卿一員巡查奉天由盛京五部侍郎內奏派
二員巡查吉林黑龍江因思派員巡閱原以慎重官守稽查懈
怠然定例年限則期可預知卽有弊端不難先期掩飾於事仍
無裨益嗣後該三省屆期巡查之例俱著停止奏派朕酌量應
查閱之處特旨派員前往以昭核實欽此

年班

吉林省副都統年班進京例應二員如遇將軍年班副都統亦

去一員道光六年將軍富俊條奏長途往返耽延時日署缺之員未免意存五日京兆於公事無益奉

論 嘉雅自本年爲始應值將軍年班副都統卽無庸進京如值副

都統年班亦祇須輪替一員進京無庸二員年班以重職守

黑津

黑津名目不一瑣春東南濱臨南海一帶者謂之恰喀爾三姓城東北三千餘里松花江下游齊集以上至烏蘇哩江東西兩岸者謂之赫哲齊集以下至東北海島者謂之費惟喀又東南謂之庫葉齊集地名也恰喀爾隔年一次至烏蘇哩莽牛河三姓派員收納

貢皮九十張頒給

大四百零四
小五

賞物齊集以上者俱赴三姓城交納

貢皮領取

賞物齊集以下者俱在三姓城東北三千里德勒恩地方三姓派員收納

貢皮頒給

賞物此三項黑津每年共納貂皮二千六百餘張所有賞賚蟒袍妝緞紬緞布疋諸物例由三姓每年派員赴

盛京領來分賞又烏蘇哩江口松花江下游黑津私下貿易常於冰凍後以數狗駕車而來捷如奔馬性嗜酒貪小利奸商能懂黑津話者交易換貨其利倍蓰每以辣椒水攪燒酒換去盛瓶攜於狗車或瓶破而酒凍不灑喜出望外猶感奸商之情其豈

蠻之性如此其餘更可知也

查山

黑津捕打爲食夏衣魚皮冬衣犬鹿皮未嘗食粟山內產參不知創探有偷挖人參者稱爲黑人十百成羣馱負糧布竄入其中呼朋引類約有千餘人搭蓋窩棚招集黑津丁勇與之衣食令其認採參枝安享漁利據其家室姦盜耶淫無惡不作嘉慶十六年將軍賽沖阿

奏派副都統松霖色爾滾帶領官兵一由寧古塔磨刀石長嶺子一由三姓烏蘇哩江呢滿口分路入山搜查焚燬窩棚拔棄窖糧將偷挖人獲之黑人窮搜盡逐趕至距寧古塔二千五百八十五里蘇城一帶出山時適逢大雪竟至八九尺黑人無處躲

避雪埋過半凍斃多人姦邪之報其應如響

領票交參

領票曰攬頭挖參曰刨夫市稱爲烏金行所住曰票房子領票進山謂把兒頭每票一張發給一腰牌四個卡倫驗明放行帶領十餘人爲一棚從前放票千有餘張漸因出參較少採取愈難歷任將軍以次

奏減至數百張放票有定額放不足數官有處分票有出山票規燒鍋票臥票之分每領出山票一張例給接濟銀二百兩秋後交參二兩併原領接濟銀一併交官不准塌欠燒鍋票每張亦交參二兩出於燒鍋商人每票一張交京錢五百吊包給攬頭刨夫代爲交參又有未經放出之票謂之臥票用餘參銀兩分

派攬頭買補臥票額參交官每年十月間將軍副都統督率局員挑揀四等參五等參裝箱派參局協佐領進

貢謂之頭幫參挑賸餘參准攬頭刨夫掛號變賣有蘇州山西參商來買者亦有攬頭刨夫自赴蘇州去賣者將軍當堂過秤給票派員送至山海關驗票進關謂之二幫參無票曰黑參拏獲照例治罪吉林向無收取參餘名目因乾隆五十九年刨夫搨欠虧空庫項數十萬兩經

欽差大學士福康安等審明奏定餘參一兩抽收號銀不得過二十兩彌補虧空謂之參餘相沿至今遂爲定例除買補臥票額票之外盈餘銀兩抵充兵餉

放票論分數

例載參票如十分之中承放官員短放不及一分者罰俸六個月一分以上者罰俸一年二分以上者降一級畱任三分以上者降二級畱任四分以上者降三級畱任五分以上者實降一級調用若該管大臣不行查催各城有短放參票三分以上者將軍副都統等罰俸六個月四分以上者罰俸一年五分以上者降一級畱任例載私養參秧照私創人參例辦理又例載一時烏合各出資本及受雇偷採或隻身潛往得參者俱按其得參數目一兩以下杖六十徒一年一兩以上至五兩杖七十徒一年半一十兩杖八十徒二年爲從及未得參者各減一等

活剝牛皮

吉林西至威遠堡邊門有外來回民每勾結本處窩竊者坐地

分贓烏拉城西北一帶深密林中向有窩竊地穴偷竊牛馬事
主找認須以錢贖或因緝捕緊急盜牛不遠將牛束縛用利刀
在牛膝以上挑開畫線以通腹下卽放起以鐵鈎鈎其背繫於
樹下牛負痛狂奔皮豁剝落賊語謂活脫衣鮮血淋漓牛仍奔
回越日始斃最爲可慘將軍富俊二任吉林購線緝獲毀其賊
巢盡法懲辦盜賊慘竊之風遂息

查閱高麗

例由京禮部派通官二員行文吉林寧古塔每年輪派佐領防
禦筆帖式各一員吉林寧古塔每旗派領催各一名甲兵各二
名官莊派領催一名壯丁十五名每年蜡月初旬帶同通官赴
額穆赫索囉會齊前往到高麗地方會寧城其城在東山坡主

鎮官郊迎至鰲山公館設宴款待極爲恭敬例應進牛一百三十四頭分給吉林寧古塔協領十員各一頭吉林官莊二十三頭寧古塔官莊二十頭吉林八旗每旗各三頭奉差之佐領四頭防禦三頭筆帖式二頭通官二頭每牛一頭應賞布七疋均於得牛名下出給又三年一次赴清元地方會同琿春官員查閱貿易例應開市五日通商貿易以其所有易其所無向來駕兒馬一匹易牛二頭走馬一匹易牛二三至四五頭不等其利倍焉偶遇天災倒斃亦多折本又高麗清心丸極爲靈驗近亦有通官自京帶來充售者也

整飭驛站

郵驛之設所以通

星輅而行文報也向來吉林駙站濫支濫應丁疲馬瘦以致將站丁原有地畝典賣殆盡丁逃逋欠不一而足由來已久歷任將軍查閱總以積重難返無從調劑嘉慶二十三年將軍富俊請查四路駙站典賣地畝其一萬五千餘晌示諭典賣官產例禁綦嚴分別年限查典賣十年以後卽行收回如未滿十年者自種減租二成倘有拖欠逐佃另招該典賣民人赴京控告

星使定讞奏

聞部議將此項地畝入官納糧復經將軍富俊條奏作爲八百五十站丁隨缺之地每丁得隨缺地十五晌零九畝以次津貼當差又伯都訥圍場沿邊隙地荒蕪可惜自登依勒庫站至五家子站沿邊餘荒計有二萬晌給北路站丁招佃試墾所得租價

分給三十八站充公丁力饒裕駟務日增起色矣

粥廠

吉林土著民人甚少而外來者謂之跑腿兒大抵永平府屬暨山東人居多非挖蕩爲業卽砍木營生近年人民稠密五方雜處內中遊手好閑以及老幼廢疾者遇冬不免饑寒常有凍斃倒臥街衢者將軍富俊查知此情於城隍廟施設粥廠勸諭五街各舖商捐資共襄善舉每年自十一月初一日起至開年二月十五止賑施粥廠活人無數

功德院

吉林城內雍正年間有壽婦石熊氏年九十餘家道殷實好善樂施無子嗣將住宅改爲功德院遇冬貧民老幼廢疾無衣食

者往功德院依歸晚間熱炕日餉粥飯至四月初一日爲止石熊氏壽至百齡生前將家有良田盡施於功德院招德行僧經管永遠奉行迨石熊氏身後僧與貧民咸感其德卽於功德院殿之西隅另建一間塑象奉事香火相沿至今遇冬貧民赴同知衙掛號送功德院收養又相傳乾隆五十六年四月二十日城內火災甚熾逼近功德院人力不能撲救該僧與隣人彷徨失措忽院內有一老嫗白髮蕭蕭曳杖迎火而前顧謂救火人曰功德濟人天所佑也言訖遂不見頃刻間反風火滅功德院無恙噫一婦人之善念周濟貧民感動人天雖無子嗣香火不絕石熊氏宜乎有靈死且不朽矣

木有軟硬

每年官處給票欣運修造船隻及八旗官兵蓋房燒柴承領票頭謂之木頭老鴉欣存過冬謂之打凍乘冰雪拉運及開河至江口謂之趕洋總由拉發河蛟河趕至拉發口登廠寫排入松花江到城江邊如桤木柞木紅紉勁子女兒木青岡柳等謂之硬木煉火成炭至沙松黃果木松紫椴木榆木秋木楊木皆謂之軟木可作器具蓋房之用燒無火勁各隨木性利用咸宜

採煤

吉林爲產木之區家家柴薪堆積成垛不但蓋房所用梁柱椽檁炕沿窗櫺一切大小木植卽街道圍牆無不悉資板片近來生齒日繁庶民雲集產木山場愈伐愈遠將軍富俊念及旗民日用柴價昂貴生計拮据前後

奏請於營盤溝荒山子道溝二台及西南山坡等處開採煤窑以濟旗民炊爨價廉於柴

圍獸

打牲獵戶稱爲炮手虎稱爲老媽子熊名曰黑瞎子此村民語也能虎吉林諸山中皆有之虎嘯風從熊出爭鬪山鳴谷應兇不可當炮手潛放冷箭攫取先斃其虎熊不知遁蓋虎靈而熊傻也能亦入蟄或鑽土穴或藏空樹稱爲坐洞氣炎薰蒸霜雪中一望而知炮手知其在洞擲柴塊於洞口熊掌接入填塞洞門旁鑽小孔刺斃之頗不費力至野猪大者有六七百觔齒如象齒外出而又灣捲利逾鋒刃護領羣豕出山覓食虎狼不能犯且週身日襯松油厚有寸許名曰掛甲鎗箭不能入炮手能

以鎗箭取中其七竅者始斃

耙犁用兩轅木作底立插四柱高三寸許上穿二橫木或鋪板或搪木坐人拉運貨物皆可前轅上彎穿以繩套二馬服駕輕捷於車若馳驅更換馬匹冰雪之地可以日行三四百里並有作車上棚於耙犁底上設剪門套鹿皮圍謂之煖耙犁

操練

道光二年將軍富俊

奏吉林與京城暨各省駐防綠營兵弁情形皆不相同吉林兵丁散處各屯率以務農打牲爲業惟春秋二季調省垣先令本管協領督率各佐領演練步射騎射鎗陣各技藝又復專派協領輪看後乃擇日分旗於教場大操分別獎賞責革其春季有差

使外出者駐冊
不勁不能及遠
則以八力爲上
旗爲烏鎗營尤
五十六佐領兵
一併分別記功
一千名行圍採
貢鮮卽以比較
藝等再較軍功
歷年操練之舊
熟商務農習勞

年春秋以仲月望調操至季月杪罷操嗣後以仲月朔調操每季加展半月俾資肄習將軍副都統跟班兵丁向係輪班當差暇時卽令在門前演射以期造就等因具奏奉

旨吉林乃我朝根本重地本處兵丁素稱驍健朕所深知然必當安不忘危培養人材爲要我滿洲舊俗總在弓箭鳥鎗馬上此三項允宜並式樣架勢終無實用也汝可遵照定章畱心訓練日久不可稍形廢弛勉之欽此

吉林外記卷八終

大一百六十六
小五

吉林外記卷九

古蹟

古蹟

吉林

大金得勝陀

卽額特赫噶珊金太祖誓師之地
國語額特赫勝也噶珊鄉村也

得勝陀頌

奉政大夫充翰林修撰同知 制誥兼太常博士驍騎尉賜緋

魚袋臣趙可奉

敕撰

儒林郎咸平府清安縣令武騎尉賜緋魚袋臣孫侯奉

敕書丹

承直郎應奉翰林文字同知 制誥兼充 國史院編修官
雲騎尉賜緋魚袋臣黨懷英奉

敕篆額

得勝陀

太祖武元皇帝誓師之地也臣謹按 實錄及

睿德神功碑云

太祖率軍渡滾流水命諸路軍畢會

太祖先據高阜國相撒改與眾仰望

聖質如喬松之高所乘赭白馬亦如岡阜之大

太祖顧撒改等人馬高大亦悉異常

太祖曰此殆天地協應吾軍勝敵之驗也諸君觀此正當戮力

同心若大事克成復會於此當醑而名之後以是名 其
兆云時又以禳禱之法行於軍中諸軍介而序立戰士光
浮萬里之程勝敵刻日

其兆復見焉大定甲辰歲

鑾輅東巡

駐蹕上都思

武元締構之難盡

孝孫光昭之道始也命新

神御以嚴穆穆之容既又俾刊貞石以贊暉暉之業而

孝思不忘念張闕休而揚偉蹟者益有加而無已也明年夏四
月詔以得勝陀事訪於相府謂宜如何相府訂於禮官以爲

昔唐玄宗幸太原嘗有起義堂頌過上黨有舊宮述聖頌今
若做此刻頌建字以彰

聖迹於義爲允相府以

聞制曰可臣可方以文字待罪禁林然則頌成功美形容臣之
職也敢再拜稽首而獻文曰

遼季失道

腥聞於天

迺眷東顧

寶生

武元

皇矣我祖

受天之祐

恭行天罰

布昭聖武

有卷者阿

望之陂陀

爰整其旅

各稱爾戈

諸道之兵

亦集其下

大巡六師

告以福禍

明明之令

如霆如雷

桓桓之士

如熊如羆

先是太祖

首登高阜

靈祝自天

事駭觀覩

大二百三十七
小五

人仰聖質

凜如喬松

其所乘馬

岡阜穹宗

帝視左右

人馬亦異

曰此美徵

勝敵之瑞

往無不利

諸君勉之

師勝而還

當名此地

神道設教

易經著辭

厭勝之法

自古有之

我軍如雲

戈甲相屬

神火燄燄

光浮萬口

厥類惟彰

天有顯道

國家將興

必有禎祥

周武戎衣

火流王屋

漢高奮劍

素靈夜哭

受命之符

孰云非真

口彼宗元

遂誣口明

得勝之祥

如日杲杲

至今遺老

疇弗樂道

聖金天子

元碑
提行

武元神孫

上空
四格

化被湖南

德侔羲軒

眷言舊邦

六飛戾止

六飛戾止

江山口是

念我列祖 開創之勤 風櫛雨沐 用集大勳

聖容既新 元碑 提行 聖功既口 上空 四格 永口厥志 以為未也

惟此得勝 下空 四格 我祖所名 詔以其事 載諸頌聲

文王有聲 適駿有聲 潤色 祖業

惟時 帝王之符 聖明 千載孝治

配姬與劉 詔於萬世

大定二十五年七月二十八日立后

背面

羊羊美羊

天永並甲也尚空車

天不尚並美羊伴矣反

六一百九十九
小一十五

天不支卒反也庄米米太吞去序天

太宛甲也斐亩秀更考卒司

史來求无

早七是太乱兩卒史片卒米

夾史反△米支特太季米字斗考斐

益△△米床床庠庠父父峇父圭弓里

米尖支由夙兵夙戈用米△史不

禾夫羊挖脊更息虫仕由太

季太月失价字足更方阜支岗舌季

金太祖攻黃龍府次混同江無舟以渡金主使一騎前道乘赭
白馬徑涉日視吾鞭所指而行諸軍隨之以濟遂克黃龍府後

使人視其渡處深不可測故老相傳渡處即今五家子站門前
松花江未足憑信五年春將軍富俊奏

准伯都訥閑荒招佃認墾取租勘丈至五家子站北荒見此得勝
陀碑頌今鈔錄入記始知故老遺傳有所本矣

坎卦圖

乾隆十六年理事廳幕友王姓自言識地理在北門外元天嶺上建坎卦石鎮壓火災嘉慶十一年城

內又被回祿延燒旗民房屋八十餘間鎮壓無驗千載而下見此圖石不知何所取義惑人不淺

芍藥池

在吉林西南四百餘里有芍藥一本春暮花開爛漫相傳乃國初時舊植花池費磚依稀可辨

顯德府

在吉林城東南新唐書渤海傳上京南為中京曰顯德府領盧顯鐵湯榮興六州地理志自鴨綠江口舟行百

餘里乃小舫泝流二百里至神州又陸行四百里至顯州天寶中王所都按顯州即顯德府唐先天二年賜名呼爾罕

州是也遼史謂即平壤城又以遼所置東京之顯州為本顯德府地皆誤

長嶺府

在吉林城西南新唐書長嶺營州道又渤海長嶺府領遐河二州遼史地理志東京長嶺府遼史本紀太祖天

大一百九十七
小一百七十六

顯元年遣康默記韓延徽攻長嶺府八月下長嶺府 按長嶺府遼志不詳沿革或仍渤海之舊長嶺亦作長嶺古字相通今吉林西南五百里有長嶺子國語謂之果勒敏珠敦南納嚕窩集北接庫勒訥窩集自長白山南一嶺環繞至此爲眾水分流之地東北流爲雅吉善輝發等河入混同江西北流爲英蕤哈達葉赫黑爾蘇等河長嶺府之名當取諸此錦州復州雖亦有長嶺皆不如此之最著則渤海長嶺府地爲吉林長嶺子無疑

雞林州 舊唐書龍朔三年詔以其國爲雞林州都督府授其王其國爲雞林州大都督府咸亨五年王金法敏畧百濟地守之上元二年劉仁軌破其眾於七重城以靺鞨兵浮海畧南境吉林烏拉四字國語今以古雞林作證從漢字音也

寧江州 在吉林城北混同江東岸遼史地理志寧江州混同軍清寧中置統縣一混同縣金廢金史本紀太祖進軍寧江州十月朔克其城次來流城來流卽今拉林河大金國志太祖十三年起兵攻混同之東寧江州遼高仙壽敗失寧江州遼再遣蕭嗣先屯珠赫店臨白江與寧江州女真兵對壘女真潛渡混同江掩擊之嗣先兵潰松漠紀聞寧江州去冷山百七十里地苦寒每春冰泮遼主必至其地爲樂金祖起兵首破此州 按遼金二史金太祖起兵先攻寧江州遼守

將蕭烏納戰敗棄城渡混同江而西是州在江以東矣高士奇扈從錄云大烏拉去船廠八十餘里即遼之寧江州也

河州 在吉林境遼史地理志河州德化軍置軍器坊 接明人地志云廢河州在黃龍府北遼置河州有軍器坊又引一

統志開元東北五百里有溫登河源出坊州北山北流入松花江所謂坊州疑即河州矣攷遼金無坊州第因河州有軍器坊而遂以坊州屬之亦恐未足為憑也又按黃龍為開原境則河州在吉林境內無疑特舊址今無攷

寧古塔

金上京宮殿 大金國志國初城郭散居呼曰皇帝寨國相寨太子莊後昇曰會寧府建為上京其遼之上京改作

北京城邑宮室無異中原州縣廡宇制度草創又云皇統六年春三月上以上京會寧舊內太狹役五路工匠撤而新之規模悉

倣汴京

嘉蔭侯廟 金大定中冊上京諸林為嘉蔭侯立廟後廢今其地大木橫然

皇武殿 金世宗打毬校射之所金史本紀大定二十五年上在會寧府謂羣臣曰上京風物朕自樂之祖宗舊邦不忍

捨去後數日宴宗室於皇武殿曰朕尋常不飲酒今日正欲沈醉此樂不易得也宗室故老以次起舞進酒上曰吾來數

大三十一
小八百三十六

月未有一人歌本曲者吾爲汝等壽之命宗室弟
子皆坐殿上聽朕自歌其辭羣臣宗戚皆稱萬歲

八角井

在舊宮東北角井欄猶存常有光自井出掘之
得鐵筋二枚古鏡二圓雍正四年井中淘得銀牌一面

錄人姓
名功績

歐孝子里

在寧古塔城東舊志明監生歐某家有妖狐爲患有
十餘人後聲言將殺歐某之母屢至危殆歐某割股以進俄
聞狐語曰此人割股孝親天已增其母壽十年矣遂去不復
爲患後十年
母以壽終

渤海

在盛古塔城西南新唐書渤海本粟末靺鞨附高麗
者姓大氏高麗滅率眾保挹婁之東牟山萬歲通天

中契丹盡忠反有舍利齊克仲象者度遼水保大白山之
東北阻鄂掄河自固武后封爲鎮國公其子祚榮建國自號

震國王地方五千里盡得扶餘沃沮并韓朝鮮海北諸國先
天中爲渤海郡王以所統爲呼爾罕州自是始去靺鞨號專

稱渤海子武義直大圖宇私改年號天寶末徙上京直舊國
三百里呼爾罕海之東建五京十五府六十二州此爲肅慎

故地曰上京龍泉府賈耽曰自安東都護府東北經古蓋牟
新城又經渤海王城城臨呼爾罕海其西南三十里有古肅

慎城其北經德里鎮至南黑水靺鞨千里又曰自神州陸行四百里至顯州又正北如東六百里至渤海王城按舊志謂渤海上京在烏拉境內今以唐書攷之當在靈古塔西南境與金上京相近明一統志云金滅遼設都於渤海上京是也

會靈府

在靈古塔城西南金史地理志上京路卽海古勒之地金之舊土也國初稱爲內地天眷元年號上京海陵貞元二年遷都於燕削上京之號止稱會靈府大定十三年復爲上京會靈府一領節鎮四防禦一縣六鎮一舊有會靈州天會二年築契丹之珠敦城也後廢又金史會靈府初爲會靈州太宗以建都升爲府天眷元年置上京留守帶本府尹兼本路兵馬都總管後置上京海蘭等路提形司戶三萬一千二百七十東至瑚爾哈六百三十里西至肇州五百五十里北至扶餘路七百里東南至率賓路一千六百里南至海蘭路一千八百里縣三松漠紀聞自上京至燕二千七百五十里三十里至會靈頭鋪四十里至第二鋪三十五里至阿薩爾鋪四十里至拉林河四十里至巴達貝勒鋪七十里至賓州渡混同江北盟會編出榆關以東第三十八程至拉林河終日之內山無寸木地不產泉又五里至矩古貝勒寨盡女真人第三十九程至館去上京尚十里許亢宗奉使行程錄過混同江四十里宿呼勒希寨第三十六程自呼勒希

寨東行五里契丹南女真舊界也八十里至拉林河行終日無寸木地不產泉人攜水以行渡河五里至矩古貝勒寨第三十七程自矩古貝勒寨七十里至達河寨第三十八程自布達寨行二十里至烏舍郎君宅又三十里至館此去北庭尙十里高士奇扈從錄沙林東南十五里日火茸城金之上京會審府也廣四十餘里中間禁城可里餘三版基址皆在辟碧瓦碁布其上禁城外有大石佛高可三丈許蓮花承之前有石塔向東小欹出大城而西則芟荷彌渚遠迤縣渺莫窮其際渚間有亭榭遺迹自沙林而東八十里爲靈古塔按金史原文云國言金曰按出虎以按出虎水源於此故曰金源建國之號蓋取諸此考國語金曰愛新金史舊解以金爲按春國語耳墜也耳墜以金爲之因誤爲金并按出虎亦誤爲金吉林境內無愛新水亦無按春水攷之當爲阿勒楚喀河蓋據松漠紀聞北盟會編及大金國志諸書金上京行程過拉林河一程卽至上京朝東至阿勒楚喀不過百餘里阿勒楚喀河源在吉林城北拉林河源在吉林城東北而金上京宮闕距混同江二百六十里去拉林河一百七十五里核之卽阿勒楚喀之明證也且金太祖實錄云契丹以鑛鐵爲國號鑛鐵雖堅終有消壞惟金一色最爲眞實自今本國可號大金亦並未云金水源也又按舊志云靈古塔西南六十里瑚爾哈河之南有古大城周三十里四面七門內城周五里東西南各一門內有宮殿舊址卽會審府之遺跡也

今案之松漠紀聞北盟會編奉使行程錄所載里數俱同可見金上京之地總在今寧古塔之西混同江之東其去混同江二百六十里以今道里案之當在塞齊窩集左右塞齊窩集嶺上有故城地相傳為金時關門蓋自船廠東十里過混同江至尼什哈站三十里至交密峯四十里至額赫穆站十里至納穆窩集三十里至山神廟五十里至拉發站七十里至推屯站三里至塞齊窩集又東三百九十里至寧古塔塞齊窩集在吉林城外混同江東二百四十餘里而拉林河源之拉林山在城東北二百四十五里阿勒楚喀河源之扎松阿山在城東北三百里俱屬相近

本朝康熙十六年寧古塔將軍薩布蘇以繩量道里兩度為丈百八十八丈為里自寧古塔西關門量至吉林東關門凡九萬八千丈為五百五十里後分八站作六百三十里雖古今里數未必盡同然正約略可見耳又按瑚爾塔路為寧古塔地今自吉林至寧古塔城凡程站里數亦約略相同正無可疑也

廢瑚爾哈路

在寧古塔城東渤海上海地金史地理志瑚爾哈路初置萬戶海陵改置節度使承安三年置節度

副使西至上京六百三十里北至邊界哈喇巴圖千戶一千五百里又金太宗天會六年徙昏德公重昏侯於韓州八年徙瑚爾哈路元史地理志瑚爾哈距上都四千二百里大都三千八百里有瑚爾哈江并混同江又有海蘭河流入于海

曲江故縣

舊志在故會寧城東北金史地理志大定七年置鎮東縣屬會寧府十三年改曰曲江又有宜春縣亦大

定七年置屬會寧府元初與府俱廢按曲江初名鎮東以在會寧之東也以其當水曲之地故名曲江今寧古塔城正當瑚爾哈河灣曲處疑卽曲江縣也

白都訥

肇州

在白都訥城南金史地理志肇州防禦使舊名珠赫店天會八年以太祖兵勝遼肇基王跡於此遂建爲州金史本

紀遼都統蕭嘉哩副都統托卜嘉將步騎十萬會於鴨子河北太祖自將擊之黎明及河遼兵方壞陵道選壯士十輩擊之大軍繼進遂登岸與敵遇於珠赫店會大風起塵埃蔽日乘風擊之遼兵潰逐至沃撈濼殺獲不可勝計遼人嘗言女真兵若滿萬則不可敵至是始滿萬云今白都訥城東南阿勒楚喀河西岸古城二十里內子城周四里南距吉林城三百四十里東去會寧城六百里與金史道里相合疑卽肇州遺址又按北盟會編遼天慶四年金太祖會集諸部全裝軍二千餘騎首破混同江之寧江州大敗渤海之眾獲甲馬三千又敗蕭嗣先於珠赫店及拉林河黃龍府咸州好草峪四路都統誅斬不可勝計據此則肇州在拉林河之東吉林之北益明矣

五本少言方

長春州 其舊地應在今白都訥地及杜爾伯特扎賴特階州之

興宗重熙八年置統縣一長春縣本混同江地戶二千金史

地理志泰州昌德軍本契丹二十部族牧地大定二十五年

罷承安二年復置於長春縣北至邊四百里南至懿州八百

里東至肇州三百五十里戶三千五百四縣一曰長春即遼

長春州天德二年降為縣隸肇州承安三年承屬大金國志

太祖十四年遼天祚帝率蕃漢兵十餘萬出長春路分五部

北出駱駝口太祖乘其未陣三面擊之天祚大敗

退保長春太祖乘勝遂平渤海遼陽等五十四州

三姓

五國部 在盛古塔城東北亦曰五國頭城遼史營衛部族志五

元一統志混同江發源在長白山北流經渤海建州西五十

里會諸水東北流上京下達五國頭城北又東北注於海明

一統志云五國頭城在三萬衛北一千里自此而東分為五

國舊傳宋徽宗葬於此高士奇扈從錄自盛古塔東行六百

里曰章圖哩噶善松花黑龍二江合流於此有大土城或云

五國城 按五國城之說不一或謂盛古塔東松花黑龍二

江合流之處有土城焉或以為在朝鮮北境近盛古塔有故

大二十四
小八百五十一

命赴邊外昌圖廳八面城查辦地畝控案得一土埋銅鏡周篆內
清斯外昭明光輝象夫日月心忽揚而顧照雖寒而不泄長
毋相忘見日之光三十一字背面楷書鑄韓州刺史四字八
面城爲金之韓州已有確據矣金太祖克遼江州次來流卽
拉林河松漠紀聞遼江州去冷山百七十里地苦寒以拉林
上下河口度之冷山去阿勒楚喀不遠五國城似在阿勒楚
喀界金太宗天會六年徙昏德公重昏侯於韓州八年徙瑯
譚哈路五國城似在遼古塔界高士奇扈從錄云大烏拉去
船廠八十餘里卽遼之遼江州五國城似又在吉林界自薩
英額高祖由京陞吉林正黃旗佐領至今五世爲吉林人
心考查無此城基常見阿勒楚喀三姓各官訪問皆云阿勒
楚喀並未聞有五國城遺址及冷山之名阿勒楚喀時令寒
暖與吉林相同惟三姓城東北一千餘里松花江南岸有五
城遺址地極寒冷不種五穀北岸有一大山疑卽松漠紀聞
所言冷山也又元一統志混同江東北流上京下達五國城
頭東注於海按松花江發源於長白山北至吉林折而

百里或謂遼古塔相近搶頭街有舊城址五疑卽是也據金
太宗本紀云天會六年徙昏德公重昏侯於韓州八年再徙
瑯爾哈路則實在遼古塔地宋史稱韓州五國城誤合爲一
地第諸書皆約略之辭未有實據今三姓地方有五國城遺
址讀宋史徽欽二宗初徙韓州後移冷山遍考不知何地
元年將軍富俊奉

命赴

東北出法特哈邊門至伯都訥又東北至三姓北受黑龍江東入於海五國城近臨松花江非寧古塔界可知矣高士奇扈從錄松花黑龍二江合流之處爲五國城與元一統志所稱之地無異攷論古今五國城在三姓無疑松漠紀聞士奇錄里數地名傳聞互異似不足爲證姑論此以俟後之博覽君子

阿勒楚喀

雲錦亭

又有臨濬亭並金世宗建爲籠鷹之所金史地理志在阿勒楚喀水側

賓州

在阿勒楚喀境本渤海城遼史地理志賓州懷化軍節度本渤海城統和十七年遷烏舍戶置刺史於鴨子混同二

水之間後升兵事隸黃龍府都部署司金史本紀太祖十二年命布呼等攻拔賓州烏舍楚古爾蘇來降遼將徹格爾戰於賓州布呼敗之鐵驪王以所部降松漠紀聞翁舍展國最小不知其始所居後爲契丹徙置黃龍府南首餘里曰賓州州近混同江卽古之粟末河部落雜處以其族之長爲千戶統之又契丹自賓州混同江北八十里建寨守禦女真契丹國志宋政和五年金太祖攻遼賊賓州元一統志上京故縣古肅慎氏地渤海大氏改爲上京金旣滅遼卽上京建邦設都後改會寧府京之南曰建州京之西曰賓州又西曰黃龍府又廢祥州在賓州西南遼祥州瑞聖軍統懷德縣屬黃龍

六十六
小九百一十二

府遼史地理志祥州瑞聖軍節度興宗以鐵驪石置兵事隸黃龍府都部署司統縣一懷德縣金史太祖十三年烏達布復敗徹格爾蕭伊蘇於祥州東斡琿等兩路降又廢威州在賓州南遼置亦曰武靈軍屬黃龍府契丹國志宋政和五年金太祖攻遼取祥威二州進薄益州按鴨綠江一名益州江則益州實與鴨綠江近當在長白山西南但遼史不言仍渤海之舊今故址無考

琿春

東海窩集部

在琿春城東南凡沿海林木叢茂處皆為窩集明時有瑚葉緩芬雅蘭西林赫錫赫鄂摩和索囉佛

訥赫那木都魯烏勒固宸穆稜
札庫塔東額赫庫稜諸部我
太祖於丁未歲至甲寅歲俱克取其部撫降之

吉林外記卷九終

吉林外記卷九終

大二十一
小二百二十一

吉林外記卷十

雙城堡

伯都訥屯田

雙城堡

嘉慶十七年四月初二日奉

旨八旗生齒日繁京城各佐領下戶口日增生計拮据雖經添設養育兵額而養贍仍未能周普朕宵旰籌思無時或釋前日舉行大閱典禮各旗營隊伍整齊在南苑先期訓練祇遵約束朕嘉旗人服習教令更念養先於教爲之謀衣食者益不可不周國家經費有常舊設甲額現已無可復增各旗閑散人等爲額缺所限不獲挑食名糧其中年輕可造之材或閒居坐廢甚或血

言本夕言卷一
氣方剛游蕩滋事尤爲可惜因思東三省原係國家根本之地而吉林土膏沃衍地廣人稀聞近來柳條邊外採參山場日漸移遠其間空曠之地不下千有餘里悉屬膏腴之壤內地流民並有私勤耕植者從前乾隆年間我

皇考高宗純皇帝軫念八旗人眾分撥拉林地方給與田畝俾資墾種迄今該旗人等甚享其利今若仰循

成憲斟酌辦理將在京閑散旗人陸續咨送前往吉林以閑曠地畝撥給管業或自行耕種或招佃取租均足以資養贍將來地利日興家計日裕旗人等在彼儘可練習騎射其材藝優嫻者仍可補挑京中差使於教養之道實爲兩得著傳諭賽沖阿松靈卽查明吉林地方自柳條邊外至採參山場其間道里共有

若干可將參場界址移近若干里自此以外所有閒曠之地悉數開墾計可分贍旗人若干戶並相度地勢如何酌蓋土銜草房俾藉棲止其應用牛具籽種每戶約需若干再該處現有閒散官員是否足資統束抑或須增設佐領驍騎校之處一併詳細妥議章程並繪圖貼說具奏候朕酌度等因欽此將軍賽沖阿松靈勘得拉林東北閒荒可墾五千餘晌東南夾信溝可墾二萬餘晌近年吉林收成不豐請俟三五年後從容籌辦等因具奏奉

旨該處收成不豐此時原不能即將旗人移駐其一切墾荒計畝章程則須預爲籌辦不必推延時日著卽檢查舊案詳細酌核先行籌議具奏欽此將軍賽沖阿未及查辦奉

旨調任將軍富俊蒞任後檢查舊案悉心妥議移駐京旗蘇拉通盤
核算先於吉林所屬無業閑散旗人內令各旗共揀丁一千名
出結保送作爲屯丁每丁由備用項下給銀二十五兩官爲置
買牛具自行搭蓋窩棚由阿勒楚喀公倉內賞給籽種穀二石
每年給補倒斃牛價銀一千三百三十六兩於前勘定拉林東
南夾信溝地方每丁撥給荒地三十晌墾種二十晌畱荒十晌
試種三年後自第四年起每晌交穀糧一石貯倉移駐京旗蘇
拉時分給京旗熟地十五晌荒五晌所餘熟地五晌荒五晌卽
給原墾之屯丁作爲恆產免其交糧亦不補給倒斃牛價將來
移駐京旗到時得種熟地與本處旗丁犬牙相錯易於學畊夥
種所有屯田章程並屯丁用款繕單呈

覽奉

旨所議試墾按年徵租及派撥官兵約束一切章程著照所議辦理
欽此遵卽剗飭各員置辦一切農器將軍富俊帶同委員前往
詳查原勘夾信溝之荒地雖沃衍大勢窪下詢係前勘時秋深
草茂未能辨別試墾創始必須詳慎隨往阿勒楚喀拉林西北
八十里之雙城子一帶東西約有一百三十餘里南北約有七
十里地土平坦洵屬沃衍可備移駐京旗閑散二三千戶之用
卽在適中之地駐劄派令各員週圍履丈分撥通計四丁四牛
之數核算成屯每旗設立五屯鑲黃正黃二旗每旗住屯丁一
百二十八戶計住二十四戶者三屯住二十八戶者二屯其正
白正紅鑲白鑲紅正藍鑲藍六旗住二十四戶者四屯住二十

八戶者一屯其屯丁一千名每戶房基東西寬二十丈南北長二十丈屯丁寬用九丈畱十一丈以備將來移駐京旗蓋房之用每屯房分三路街一道寬五丈巷一條寬三丈除房基街巷外每屯丁核給荒三十大晌按屯附近分撥八旗四十屯適中街內建蓋公所及協領左右翼官兵住房仍在公所附近畱建倉地基計共用見方三十四丈相度水道創挖井眼並派員前往邊外採買耕牛本年備齊分給屯丁先爲運木割草搭蓋窩棚卽以雙城子名爲雙城堡咨報禮部鑄給委協領關防左右兩翼委佐領鈐記二十一年春委協領等督催開墾是年雙城堡一帶於七月十四五日連降大霜將軍富俊親詣查勘收成止有四分實係成災所得穀糧儘數當年糊口次年春尙須接

濟

奏懇將二十四年起徵之糧遞緩一年在於阿勒楚喀倉貯穀內借給口糧籽種二千石責令秋收照數還倉以資接濟原議四人一具窩棚一間四人同住不能接取家眷應每人各給一間屯丁千名除前已給二百五十間仍須添蓋七百五十間每間銀四兩共用銀三千兩卽於庫貯備用銀內動支仍以計種十年糶穀價銀歸款奏蒙

允准卽咨行阿勒楚喀副都統衙門並劄飭雙城堡委協領遵照領取蓋房銀兩派員帶同屯兵赴拉林東山砍伐木植春融搭蓋窩棚屯丁各便於棲止並令於耕作之前赴阿勒楚喀拉取接濟口糧籽種將軍富俊於二十二年二月奉

旨調任盛京

奏八旗數十萬眾聚積京師不農不賈皆束手待養於官勢所不能再四籌畫惟有移駐屯田因天地自然之利使自耕種爲養方資久遠之計因查雙城堡尙有荒地二分未墾擬於

盛京吉林八旗無論滿蒙漢軍各項旗人內挑丁二千名置買牛條器具創挖井眼搭蓋窩棚於二十五年春正前往墾種名爲雙城堡左屯右屯將前墾處所名爲中屯其一丁一牛竭力耕作一年止能種地十晌必須丁力稍裕加雇牛條長工方能開足二十晌中屯所墾之地請於二十五年先徵十晌糧石其餘十晌再緩二年至二十七年升科以裕丁力新墾之地二十八年陞科先徵十晌糧石其餘十晌請於三十年一律陞科除建

蓋官兵房間外其餘一切均照初次設立章程畫一辦理共屯丁二千名每搭蓋窩棚一間應用牛隻器具等物合銀三十兩共需銀六萬兩屯田官兵住房辦事公所共計房三百二十間應需銀一萬一千二百兩每年支給補買倒斃牛價銀二千六百七十二兩外發給一年籽種倉穀四千石以上統計需銀七萬三千八百七十二兩卽在吉林庫存備用銀內動支若俟糶穀之價歸款需時較久請在吉林及奉省參餘項下先行陸續歸款至移駐京旗不必盡待糶穀價銀辦理二十八年起每年移駐二百戶爲一起每戶用蓋房銀一百二十兩由京起程

賞給治裝盤費銀三十兩雙城堡置買牛糧器具銀五十兩每起共需銀四萬兩除治裝盤費銀六千兩其餘銀三萬四千兩暫

由吉林備用銀內動支由雙城堡糶穀價銀吉林奉省參餘銀內歸款每戶給車一輛由順天府僱送至奉省照數備辦轉送至雙城堡車價均照例報銷計十五年卽能陸續移駐三千戶該蘇拉等各得田產安居樂業內可分八旗戶口之繁外可聯邊城鞏固之勢擬給官兵心紅隨缺荒地數目及每戶應給房地牛條器具分別開單呈

覽奉

旨著交松霖詳查妥議具奏俟定議後再行會同富俊辦理將軍松霖議奏每丁添給砍木衣履搬家遷費車輛並按年給與種地接濟銀兩奉

旨富俊現已調任吉林將軍著將松霖所議章程再交富俊覆加核

擬松祿所定銀數是否豐儉合宜屯丁得此是否即可養贍家
口盡心闢墾務期

國帑可以按限歸補不致多糜而於旗民生計亦實有裨益方爲
經久良策將軍富俊遵

旨細心詳核將軍松祿所議添給砍木盤費衣履並遷費銀兩前未
籌及似應增添奉天金州復州等處至吉林雙城堡將及二千
里窮丁自力前往誠有不逮每丁擬給遷費銀八兩其吉林各
處至雙城堡不過二三百里亦擬給銀八兩未免遠近漫無區
別吉林屯丁每名應給銀四兩又請添給每丁車一輛查莊農
人家多係一車二牛服駕一具四牛前已給車二輛足敷使用
似可無用再行添給至升科既請照旱地第六年征租該屯丁

等已有花利不必按年給與種地開荒接濟銀兩以重

帑項而昭核實以上每丁合計需銀四十七兩零四分五釐其奉

省撥派官四員遠赴雙城堡每員請給遷費銀十二兩領催兵

四十名每名遷費銀八兩吉林撥派官四員領催兵四十名應

照奉省減半給與前設中屯屯丁現多未攜眷請給遷費四兩

其餘無庸增減建葢新添二分屯田官兵住房辦事公所共三

百二十間應需銀一萬一千二百兩買補屯田兩分倒斃牛價

預買之年二千頭內卽間有倒斃請於開墾之年支給以十年

合計需銀二萬六千七百二十兩連前開中屯荒地屯丁遷費

一分共需銀四萬六千三百六十兩統共三分荒地以十年合

計共需銀十七萬八千九百二十六兩三分荒地自升科徵租

大五百零四
小五

起算每年得穀六萬石每石照

奏定原價減銀一錢以四錢爲準出糶計至十年可得穀價銀二十四萬兩較前動支數目有盈無絀至現動銀兩

帑項攸關不可久懸請於吉林參餘項下按年抽收先行歸補計十年所得穀價另存備用至開墾徵租年分委協領佐領等改補實任裁撥兩省官兵增給鹽菜心紅欣木蓋房等事均請照松霖所擬及富俊前議章程辦理應用各款銀數繕單呈

覽奉

硃批戶部議奏經戶部議准具奏奉

旨依議欽此於二十四年二月十六日接到卽派員先赴雙城堡分丈左右二屯地基並咨

盛京將軍將應撥派雙城堡左右二屯閑散千名並彈壓佐領二員驍騎校二員領催甲兵四十名內均照奏定章程先酌派佐領驍騎校各一員領催二名甲兵十五名帶領閑散五百名於四月內由奉省起程五月初一日以內至雙城堡飭令搭蓋窩棚安置棲止以備次年墾種其應給遷費銀兩咨行

盛京戶部就近在該處發給並咨禮部鑄給雙城堡改爲實任協領關防中左右三屯六翼佐領圖記開寫官兵住房辦事公所房間式樣派員發給銀兩購料趕緊修葺以備官兵到時棲止又發交理事同知銀兩照奏定款單置買一切器具驗妥運交雙城堡協佐領等查收以便屯丁到屯發給派員前往黑龍江採買耕牛二千頭限於九月內趕赴雙城堡收養以備次年春

融耕墾將軍富俊隨於九月間攜印親詣查勘督催查驗蓋完官兵房間屯丁窩棚收買牛隻分給各丁並發給每丁棉衣棉褲宣誦

皇恩深渥俾眾丁咸知勤勉力田查有原任署承德縣寧海縣知縣寶心傳山西人年五十二歲係嘉慶辛酉科進士由庶吉士散館改用知縣選授江西新淦縣知縣調繁豐城縣丁憂起服揀發奉省題補寧海縣知縣奏署承德縣二十三年

皇差承修道段泥濘被參革職該員有才有守請照直隸廢員辦理營田之例令寶心傳赴吉林雙城堡勸課屯丁三年期滿照例送部引

見於二十四年八月初一日具奏奉

旨准其照直隸營田之例以已革知縣寶心傳飭赴吉林勸課屯丁三年著有成效奏明送部引見等因欽此遵卽調取寶心傳到吉委令勸課屯丁籌議一切屯務於二十五年春融新立左右二屯所撥

盛京吉林旗丁二千名均已到屯派員前往同該翼佐領等按名分交地一段三十晌並令於開墾時計地二段橫直俱畱六尺荒隔一條以備開齊地畝秋收拉運禾稼毋得任其連段開墾日後致起爭競繪圖割令該管協領佐領等分交各丁遵照隨據雙城堡協領等呈報惟寧古塔撥來閑散往往潛逃詢因寧古塔地方山深林密該閑散等多藉打獵爲生彼處地亦肥美不願輕離鄉土亦係實情除將寧古塔閑散全數撤回咨明

盛京將軍於奉省願來屯種閑散內多挑二百名送屯將軍富俊
巡查各城完竣由拉林赴雙城堡按旗查勘該旗丁等比屋環
居安土樂業合具者多係一族同屯者半屬姻親犬牙錯壤鱗
次分疆頗有井田遺風男畊婦饁俱極勤勞將軍富俊皆酌加
獎犒迴環周歷千數百里分撥地段繪圖呈

覽奉

硃批滿洲故里畝田宅洵善事也欽此又查前議未備籌議

奏准三屯屯丁三千戶眷口繁庶在參餘項下動用銀一千八百
兩每屯增添井一眼以裕食用協領處添設無品級筆帖式二
員委官二員三屯佐領每處添設無品級筆帖式各一員委官
各一員以資辦公差委由領催甲兵內挑補仍食本身錢糧筆

帖式照例支給米石管理一旗五屯總屯達

賞戴金頂以資彈壓每人月給工食銀一兩遇閏加增亦於參餘項下動支報銷協領處准其支領銀三百兩存貯公所以備兵丁遇有婚喪事件照例就近給領仍令隨時呈報查核年終造送冊結彙題以杜挪用侵蝕之弊每年除去用項仍補三百兩之數奏奉

諭旨富俊於開墾屯田一事銳意辦理著有成效部議給予紀錄二次尙不足以示優獎著賞加一級欽此將軍富俊屢飭雙城堡協領佐領督催開荒種熟原任知縣竇心傳挨屯確查勸課左右二屯新撥屯丁均各安靜樂業惟中屯屯丁內間有未搬移家眷及攜帶農器脫逃者查明無眷者催令該旗派兵送屯俾

令完聚脫逃者令該旗佐領挑補有眷旗丁送屯嘉慶十九年
初奏設立諸多從簡每丁合銀二十五兩四丁窩棚一間復奏
蒙

因心賞給每丁窩棚一間遷費銀四兩器具內如缸鍋鍬等項均須
四人一分現各接取眷屬勢不敷用連年豐收糶買穀賤無力
添補查有歸補屯田項下參餘銀二萬四千餘兩請以二萬兩
分交殷實鋪商每月一分生息酌量添補中屯屯丁器具五年
歸還原款每年用項取具雙城堡協佐領等冊結印領送部核
銷以歸核實具奏奉

旨依議欽此遵查參餘銀除動用外贖銀不足二萬兩於二十五年
八月二十日分交殷實鋪商銀一萬五千兩於次年二月二十

日續行分交殷實鋪商銀五千兩其銀二萬兩每月一分生息
所得利銀酌添中屯屯丁農器之處咨報戶部人少不能多種
牛少不能多開地畝三屯屯丁雖皆攜帶家眷弟男子姪在屯
幫作均無力添買牛條仍不能多開地畝籌議於節省備存銀
內動用銀一千一百三十七兩六錢咨令伯都訥副都統派員
採買乳牛二百四十條分給三屯種地多有幫丁之屯丁喂使
俾資利耕以裕孳生小牛酌賞種地多之屯丁中屯於嘉慶二
十一年設立除因霜災展緩一年應於道光二年起徵租左右
二屯嘉慶二十五年添設應於道光五年起徵租二屯旗丁三
千名每名穀二十倉石每年共徵租六萬石來春出糶自道光
四年起每年移駐二百戶每戶除由京

賞給治裝盤費銀三十兩外其蓋房一百二十兩置買牛條器具銀五十兩暫由吉林備用銀兩項下動支以抽收參餘及糶穀價銀陸續歸款不致虛糜

帑項道光二年砍木備料三年修蓋二百戶住房八百間四年正月移送閑散二百戶每戶閑散應給房地牛條器具及添設官兵建蓋公所一切章程繕單具奏奉

旨賞後奏自道光四年爲始每年移駐京旗二百戶分爲四起送屯該處預於道光二年伐木築室按戶給與房間地畝牛具盤費等項逮及纖悉並移駐後添設官兵蓋房給地及該官兵升調挑補各事宜其計畫甚爲周備均著照所議辦理其摺單著發交八旗滿洲蒙古都統副都統等各曉諭所屬旗人使知遷移

之樂願移駐者各報明本旗屆期咨送授產力田以厚生計不
得以桀驁不馴之人充數致擾淳風各該旗仍將報名之戶咨
報戶部每屆年終先行具奏一次欽此安設左右二屯旗丁二
千戶爰立章程屯丁俱各安業所有砍木相度地勢蓋房招募
商人就近立窰燒造磚瓦及赴屯開鋪造辦器具省運費種種
一切均須籌議調度尙賴寶心傳經理懇

恩將寶心傳知縣原銜開復以示鼓勵俾有頂戴辦理一切較爲得
力俟道光四年移駐京旗安妥後送部引

見等因於道光元年正月十一日具奏奉

旨允准原擬給雙城堡官兵隨缺地畝俾資當差但地因隨缺該官
兵等無力開墾亦難強使必行至今空有隨缺之名不得地畝

之益乾隆十三年大學士公訥親等議覆

盛京將軍達爾當阿奏隨缺地畝章程每地十晌給牛一犮估銀九兩置買犁鏵等項估銀一兩共用銀七萬餘兩在生息銀兩利銀內加展扣還在案所有三屯隨缺地畝協領一員八十晌佐領六員每員五十晌驍騎校六員每員三十晌領催十六名甲兵一百二十名每名二十晌以上本地官兵一分共三千二百八十晌加京旗官兵一分共六千五百六十晌援照

盛京章程每地十晌賞給牛犁等項銀十兩其需銀六千五百六十兩暫在抵補費用參餘項下先行動支在於前次

奏准添補中屯農器動用參餘銀二萬兩加展生息三年所得利銀內歸款不動

額項並援照移駐阿勒楚喀拉林蘇拉滿洲成案每年應派欣伐
蓋房木料兵二百名按各城差務繁簡兵數多寡核計每年阿
勒楚喀拉林派兵一百名輪派吉林兵四十名伯都訥兵四十
名烏拉兵二十名以足二百名之數至道光二年冬季派靈古
塔兵五十名三姓兵五十名均與阿勒楚喀拉林二處官兵會
同核計木數欣伐運交接年以次輪派照數發給鹽菜銀兩各
城出派欣木官四員每年每員請

賞給鹽菜銀十二兩具

奏奉

旨允准移撥兵丁雖有隨缺地畝乃係隨缺交代若遇老病事故革
退便無容身餬口之處將雙城堡北面間荒東西展長一百二

大四百六十一
小五

十七里南北展寬五里挖立大封堆一百二十七個分定荒界以備日後革退兵丁作爲恆產具奏

恩准道光二年八月十五日奉

旨松祿奏查明雙城堡中屯地畝已經墾種之地共六千五百餘畝應照六年升科之例令其納糧惟此項地畝內有因屯丁殘廢病故脫逃另補以致已開復荒續挑之丁到屯未滿六年自未便令其一體完納著該將軍詳細確查其實屆六年者卽著於本年秋收後按晌納糧餘著暫行展緩至修葺京旗住房不應預備過多致有閑荒損壞著按現願移駐京旗戶數修葺住房此外均著緩辦將來京旗續有咨報由戶部知照該將軍再行興工不致遲悞松祿接奉此旨卽移知富俊遵照辦理欽此遵

卽停工詳核其實動用銀一萬六千二百六十二兩零未動用
銀二萬零八十二兩七錢七分二釐二毫飭令委員等交庫歸
款前因中屯屯丁屢經脫逃更補新丁甫經到屯口糧不接於
籌畫屯田節省項下動用修建義倉九間買穀二千石陸續支
借接濟現僅贖存穀五百餘市石遇青黃不接之時不敷三屯
接濟而左右二屯拉運還交亦屬寫遠又籌畫左右二屯每屯
添建義倉九間置買市石穀三千石中屯義倉連前舊存穀共
存市石穀一千五百石左右二屯共存市石穀一千石俾資接
濟所有設立雙城堡三屯屯丁共三千名所給窩棚牛條器具
及修葺公所倉廩倒斃牛價並修京旗住房置買器具等項原
奏內均係按照物價扣合銀數嗣因市價長落不時飭令承辦

各員籌畫妥實委員欣伐房木尺寸不敷之小木估變價值前後節省銀錢除陸續接濟中屯屯丁冬日入山欣伐房木買給皮襖三屯窮丁踰冬製給棉衣褲墾地添給鐵耗齒殘廢病故各丁添給遷費器具中屯公所添蓋檔房添挖井眼修建牌坊三屯修建義倉堆撥房置買穀石並孳生乳牛共動用銀一千一百三十七兩六錢制錢一萬三千四百三十串外共剩存銀四千一百五十兩制錢一萬二千八十七串三屯義倉現存穀八千七百五十倉石三屯屯丁分收孳生乳牛二百四十七隻小牛八十八隻此項錢糧剩存數目每月戶司立稿將軍副都統公同畫存孳生牛隻每屯分牧二隻每年孳生小牛除補足二百四十隻倒斃額數外即可賞給種地最多之丁以示鼓勵

惟銀錢一項於奏准開銷之外屯丁每有不時之需日用日少擬交吉林理事同知發給殷實鋪商每月一分生息以後儘此利息接濟屯丁毋許動用原本以上三項每任列入交代具奏一次原係籌節之項毋庸報部以歸簡易將軍富俊補授理藩院尚書臨行具奏奉

旨交新任將軍松霖查明實存數目遵照妥辦務期錢糧不致短絀屯丁永資接濟欽此將軍松霖到任後以知縣銜寶心傳辦理屯田事宜勸課屯丁認真出力已滿三年別無經手事件奏請送部引

見奉

旨寶心傳准其送部引見該部知道欽此將軍松霖籌議由樽節生

息項下奏准中屯屯丁窩棚已經八年均已歪閃每年給修費銀三兩三屯義倉各添買黑豆五百石按年春借秋還以資接濟畊牛之用並建蓋京旌住房擬於距屯附近閑荒內建蓋屯丁京旌各不相擾俾日後人丁蕃衍免生嫌隙飭令屯丁補修房間並採買黑豆至九月將軍松秣病故奉

旨簡放原任大學士松筠到任查勘三屯情形奏懇移駐閑散宗室緣宗室有月餉地方銀錢漸裕商賈自通布疋等項物價漸自低減地方饒裕而京旌聞風知爲樂土再行移駐等因具奏奉旨交軍機大臣宗人府王公議覆未准行四年各該旗咨報移駐京旌五十四戶卽照原奏給京旌器具等物預備妥協先蓋房四十所不敷棲止將已修官兵房十九所內先令居住並查前備

料物趕緊修葺房十四所以便棲止續將軍富俊奉

旨復調任吉林於道光四年四月到任赴雙城堡奏京旗閑散素未習耕初到必藉屯丁照拂指領易於學習且在在地方均係旗民雜處未見生有嫌隙今屯丁與京旗均係旗人同處更無嫌隙相擾應請仍照原奏在原文地基建葺京旗住房奉

旨如所議行將軍富俊又籌議奏請

敕下各旗將願赴雙城堡閑散務於十月內報齊戶部具奏十一月初即行知順天府尹直隸總督

盛京吉林將軍凡有應辦事件地方皆得從容料理定於次年正月月初五日以後初十日以前立爲準期凡經過地方皆於未奉咨行以前已得預知其事可以計程籌備庶辦理不致緩急失

序先後參差嗣後由戶部應發給每戶治裝銀三十兩俟抵吉林後由備用銀兩項下發給作爲雇覓工價之用各戶得以全獲其地利庶可以日冀充裕其荒地五晌各有自雇長工亦可隨時開種至彈壓護送之大臣由京

簡派必須乘郵而來年年往返動勞駟站皆關經費嗣後由東三省
年班入

觀回任之將軍副都統內

簡派二三員順帶彈壓前來伊等係回任之便無須用駟供給各有隨帶官員足敷照料仍令各該地方官隨同護送出境則途次仍是大臣彈壓可免動駟並可節省官力至京旗所需車輛此次係四五套大車所領例價不敷按站爲之津貼關內州縣不

過支應一二站奉省地方官卽有接連數站替吉林竟有應辦
十餘站者久必藉詞賠累虧空且車輛直抵雙城堡該處非商
集處所無貨可載空回小民不無艱窘凡此似應通盤籌畫務
使旗民無虧地方無累方可經久查該閑散等每戶大小不過
數口行李無多春初地未融化道路易行嗣後移駐京旗二三
口之戶給予蓆棚二套車一輛三四口之戶給予三套車一輛
由京送至山海關由關送至錦州由錦州送至奉省由奉省送
至吉林由吉林送至雙城堡分段遞送相距皆不過數百里車
可祇予例價無庸津貼換車地方俱係商賈輻輳處所車戶旋
時可以載貨不致空回賠累庶官民均有裨益再本年修葺京
旗住房一百所其工價係奏定每間用銀三十兩本係撙節估

計春夏道路泥濘運腳倍增糜費實有支絀情形所有明年應行修葺住房百所今冬備料卽於本年領銀預辦料物可以節省運費少抒工力其六年應葺房木亦於今冬派員發給鹽菜銀兩往欣以備明年河運預爲晒晾俟用又京旗沿途飯食此次係官爲預備豐嗇未定成規以後願來者眾多地方官旣難免不以賠累藉口京旗等亦難保必不借端滋事自應立定章程使旗民地方彼此有所遵循嗣後京旗每日早尖各該地方委員每人給制錢五十文晚間住宿卽喫店飲飯京旗飯食住宿仍爲得所定有章程而地方官照辦亦覺易於從事再一路村落店口無多如百戶前來每站可分二起前後行走不至擁擠店飯備辦亦易等因具奏奉

旨著照所奏辦理該部旗知道欽此又原奏每兵

賞給鹽菜銀八兩欣辦一所房木柁檁椽柱二百一十三件內有長二丈二尺五寸大柁又有鉅板之檝木以及串排挽運上岸勢不能一人欣辦必須雇募民人幫做八兩鹽菜實不敷用歷年均係各城津貼名爲以兵幫兵實扣兵餉有干例禁籌議每兵再加

賞鹽菜銀四兩每年如欣二百所房木加銀八百兩不動正項請於吉林義倉糶穀價銀內動用銀一萬兩交商一分生息每年可得利銀一千二百兩給加添砍木鹽菜銀八百兩仍剩銀四百兩歸還原款如此欣木即可從容辦理無詞推卸並不致再扣兵餉應請立勸懲章程欣木委員知懼可期不誤修葺京旗

房間欣木委員果於年前照依尺丈數目欣伐齊全次年八月內交足咨部請給紀錄二次或雖運到而尺寸不敷除將細小木植入官罰其照數補欣趕運交納功過相抵如當年不能交納遲至次年方交者罰俸一年如次年仍不全交者請降二級留仕仍罰俸一年以示懲儆奉

旨允准道光四年三月二十五日奉

旨容照等所奏每旗屯適中之地建蓋義學及嚴禁該屯丁冬令過江樵採俱著富俊妥議具奏欽此吉林奉省官兵閑散移駐未久京旗閑散初到幼丁無多暫於中左右三屯公所各建義學三間其該管官亦易於稽查除中屯前已由邊荒官租錢內動用修葺義學三間其左右二屯應建義學各三間亦由地租錢

內撥給錢四百吊以資修建於甲兵屯丁閑散內擇其通曉清漢文者作爲教習自明年起遞年撥給三屯束脩膏火等項錢各二百吊並責成該協佐領等嚴查課讀不致日久廢弛至雙城堡西北一帶松花江北爲蒙古郭爾羅斯地方可覓木柴石屯左翼四旗去江岸三二十里該屯冬令樵採難保不無滋生事端自應嚴行禁止以杜流弊如有私行過江樵採者卽照私出邊例治罪具奏奉

旨允准遵飭該屯協領等動用官租錢項修葺義學選擇教習於次年正月開印後開館課讀中屯兩翼移駐京旗閑散五十四戶每翼四旗擬於京旗閑散內各放總屯達一名副屯達一名以資約束查報滋生戶口遇事赴公所呈報仍照以前奏准三屯

設立總屯達之例

賞戴金頂每名月給工食銀一兩遇閏增給由參餘項下動支報銷副屯達不給工食等因具奏奉

旨依議將軍富俊於八月二十二日攜印親詣雙城堡挨屯查勘始到京旗秋收穫度日光景家家糧草堆積足敷用度並查原奏中左右三屯屯丁三千名每丁給地三十晌五年後徵租二十倉后中屯於道光二年起徵左右二屯於五年起徵道光二年六月原任將軍松銖遵

旨赴任黑龍江之便奏請雙城堡地畝屯丁種地實屆六年照現種晌數按晌納糧以紓丁力等因奏准道光二十三年僅徵收中屯兩翼屯丁等交納倉后穀七千七百三十餘石本年按丁種

地實屬數核計已滿五年應徵糧四千七百餘石其左右二屯明年已屆六年交糧之期若仍照原任將軍松霖調劑章程納糧是勤苦者多納懶惰者少輸未免苦樂不均似未平允該丁等竟有多種少報地數者而遞年核數加增徵糧實屬繁冗亦難稽核現在屯丁種地七八晌至二十餘晌三十晌不等連年豐收一晌地至少打糧四五市石交官一倉石合市石只用四斗已有餘資應籌議酌量丁力請於明年起除交京旗地畝之丁不納糧外將中左右三屯屯丁無論現種地畝多寡五六兩年每年每丁納倉石穀十石倉二萬八千餘石至七年按照原擬章程每丁各納倉石穀二十石以符原議而昭核實等因道
光四年十月初五日奏奉

旨允准道光五年二月

欽差黑龍江將軍祿成寧古塔副都統和福彈壓帶來京旗閑散七十四戶詢明有與上年移駐京旗係親誼者使之共居一屯歡聚照應每戶由阿勒楚喀拉林閑散內先已雇給農工二名預爲燒炕擔水京旗一到如歸將地畝牛條口糧器具俱照數按戶交領查每年欣運木植按屯建蓋京旗房間以及戶婚田土詞訟案件一切公事較前倍增文移絡繹原設兵丁無多步送公文實形竭蹶請添設一站第應設馬牛草豆銀兩

國家經費有常未便加增籌議於吉林所屬西北兩路三十八站內通融抽撤官馬十匹牛十頭連倒斃草豆銀兩一併撥給仍歸北路站監督管理並據該監督呈報週近各站窮丁內情願

移駐雙城堡者七戶照各站設筆帖式一員卽於雙城堡協領處辦事貼寫內批補僅給俸米仍食原餉由北路站外郎內揀放委領催一名外郎一名五年後遇各站領催缺出拔補站設於雙城堡南門外以便牧養於閒荒內每站丁撥給地二十晌以資養贍所有站房及站丁每戶房三間以及棚槽鞍轡器具打井等項籌款捐辦不動公項

奏奉

諭旨所辦好依議速行遵卽照辦郵政行而兵力息籌計無所不到矣移駐京旗隻身閑散內不必拘有妻室只有父母子女或有伯叔兄弟及伯叔孀母願回來者二三人以上均准算戶照原定章程應得各項全分給與自必踴躍願來奉

旨富俊等奏雙城堡移駐京旗章程請於隻身閑散內量爲變通一摺前據戶部奏移駐京旗章程隻身不准算戶前往與調劑窮苦旗人本意未協請將隻身閑散或父子兄弟均係隻身俱統作一戶分別給與房間器具等項通融辦理當交富俊覆議茲據奏隻身閑散一人到屯旣恐舉目無親易致遊蕩且每戶應得房間牛具等件亦難減半分給諸多窒礙惟隻身閑散有父母子女或伯叔兄弟伯叔父母同往者二三人以上作爲一戶尙屬可行著照所請嗣後京旗隻身閑散內不必拘定有妻室但有父母子女或伯叔兄弟伯叔父母願一同移駐者二三人以上均准算戶照原定章程給與全分地畝房間牛條器具等項其治裝銀兩仍由吉林給發以資耕種之用欽此又奏准修

蓋京旗住房派協領二員分左右翼監修派佐領防禦八員承修一旗五屯如照定式做法於八月內修竣者給予紀錄二次如泥工完竣木工於九月內完者功過相抵如修不合式或院牆未築未鎮牆頂者罰俸一年如至九月底仍修不竣者降一級留任仍罰俸一年如有偷工減料者嚴參治罪兩翼協領督修於八月內修竣三旗者給予紀錄二次如至九月尚有不齊全者罰俸一年嚴定勸懲章程委員等依限興修不致有悞戶部覆議道光六年願往移駐京旗共一百八十九戶內因該處蓋成房屋不敷居住按冊開出戶止二口現食錢糧之四十一戶歸入七年移駐外至京旗閑散咸知雙城堡安居樂業願往者日漸增多若每年限定二百戶移駐必致有裁撤阻其踴躍

之忱著該將軍多派幹練員弁將房閒一切廣爲籌備勿致臨時周章貽悞本年應添佐領驍騎校等官原議三千戶共設佐領六員驍騎校六員協領一員此時移駐不至十分之一暫毋庸添佐領著先設驍騎校二員卽於三次移駐京旗內該將軍秉公挑選充補俟移駐足五百戶後添設佐領一員卽由此次挑補之驍騎校內揀選奏請陞補所遺驍騎校員缺再由移駐內閑散挑補未設立佐領以前驍騎校仍令三屯佐領兼轄將來移駐足三千戶時再由該將軍於佐領六員內揀選奏請升補協領一員俾移駐京旗人等咸知上進有階更爲踴躍所需俸餉仍照該將軍原議在吉林備用銀內動支其應添領催二名亦著該將軍於移駐內閑散內挑選充補嗣後移駐京旗皆常

年辦理之事不必再令年班來京之將軍副都統管帶前往每年移駐屆期著直隸總督於文職道府武職副將參將內每起各遴派一員輪流沿途護送彈壓照料出關以後著

盛京將軍奉天府尹錦州副都統遞派文武員弁接管前進所有應給住房車輛及飯食錢文悉照原議章程隨時給發遵卽分飭照辦道光六年正月初二日奉

旨富俊籌辦雙城堡移駐屯田事宜妥協周詳現在移駐各戶安居樂業京旗人等聞信願往者日益增多該將軍經理其事不避嫌怨盡心宣力著有成效深堪嘉尚富俊著加恩晉加太子太保宮銜以示朕優獎蓋臣至意欽此將軍富俊謝

恩奏稱設立雙城堡移駐京旗均仰賴

聖主不惜帑項辦理有成富俊蒞任此地與京旗閑散誼關骨肉柔
梓伊等度日一切用度籌議妥備係分內之事毫無功效乃荷
聖恩賞加太子太保宮銜不勝感戴

天恩等因具奏在案二月移駐京旗閑散到吉派員護送至屯安置
委畢將軍富俊隨於四月初一日攜印赴雙城堡挨屯面諭京
旗各戶咸知感戴

皇恩勤力耕作麥苗出土寸餘禾稼耕種方完視爲樂土隨有鑲黃
等八旗閑散富珠隆阿等四十二名呈稱仰蒙

聖恩賞給房屋牛條器具周全地土肥美足可成家立業懇請行知
本旗令伊等父子兄弟戚誼明年卽來團聚共享樂土等情伏
地跪懇除咨行各該旗查辦外復至中屯公所傳集三次移駐

京旗閑散面試清漢文字馬步騎射秉公選驗有本年移來告
退刑部司獄伯勒克圖五年移來馬甲現充委官德明安均能
騎射識滿漢文補放驍騎校披甲倭克金佈領催舒成弓馬嫻
熟亦識滿漢字挑補領催青成分管左右兩翼仍歸該屯協領
佐領等兼轄同日附片奏懇京旗陸續移來二百七十戶分撥
中屯兩翼四十屯居住計一總屯屯達經管二十屯道路紆遠勢
難兼顧雖有副屯達並無頂戴工食徒有差使毫無鼓勵遇事
每多退縮不前請照原設中左右三屯每旗五屯放總屯達一
名副屯達一名之例由京旗閑散內再添總屯達六名副屯達
六名連前共各八名分管八旗其總屯達請

賞戴金頂每名月給工食銀一兩計添工八名每年共應添工食銀七

十二兩遇閏加增仍由參餘項下動支年終報銷其副屯達亦請賞戴虛銜金頂不給工食與總屯達一體稽查戶口呈報事件移來京旗閑散多係赤貧且不諳耕種初到此地基業未立不免拮据請援照拉林阿勒楚喀閑散滿洲之例每年十二月內每名

賞錢十二吊以爲粘補農器衣服之用每名只給五年以後各習

慣種地毋庸再給嗣後陸續裁減此內鰥寡孤獨尤爲堪憫亦請照拉林阿勒楚喀閑散滿洲每名月給銀五錢之例按名每月給錢一吊二百此項賞錢請由吉林稅銀項下動用銀三萬兩連前奏准粘補三屯屯丁農器交商生息參餘銀二萬兩共五萬兩交吉林同知擇殷實鋪商一分生息計每年應得利銀

六千兩足數應用再商民納利惟恐平頭銀色不便請按市價交錢具奏奉

旨允准遵卽發給同知銀兩交商生息得利備賞京旗閑散以資接濟後接准戶部知照道光七年願來京旗戶數卽派文武員弁於二月初旬赴威遠堡界接到京旗八十五戶詢明凡係父兄子弟親誼安置一屯以便互相照料耕作隨將伊等應得房地牛條一切器具數目刷印執照各給一紙到屯照數檢收發給三屯六八力弓各三張交協領佐領按季操演不廢騎射兵農並重度土開荒至此而經營大備矣

伯都訥屯田

道光四年十一月十三日將軍富俊遵

百等議復奏開墾伯都訥空間圍場既無林木又無牲畜約計地二十餘萬晌天地自然之利可資旗人萬年生計查吉林伯都訥阿勒楚喀等處現有納丁納糧民八萬九千四百餘戶此等民戶安居已久生齒日繁地不敷種亦冀認荒開墾當必爭先恐後所有認墾荒地牛具籽種農器均係自備每人准領地三十大晌四人聯名互保第六年升科每晌地徵制錢三百文小租錢三十文俟移駐京旗閑散到日交京旗地二十晌其餘十晌作爲己產仍按數納租現當認墾之始曠野之地應預鑿井蓋房請照雙城堡章程每丁

賞給蓋窩棚銀四兩三十戶爲一屯每屯打井二眼每井給銀十八兩聽其自行打井建蓋窩棚計每丁共合用銀五兩二錢在

雙城堡中屯升科穀價暨備用項下支領至起租之年每丁地三十晌合納制錢九千文一年歸款尚有數餘統計地二十餘萬晌不無稍裨

帑項卽將來移駐京旗閑散費用裕如較之辦雙城堡旗丁墾種事半功倍所有附近旗丁情願認墾者悉照民人一律辦理惟移駐京旗交地二十晌其餘十晌作爲己產免其納租此項地二十餘萬晌創墾之初陸續招認不能同時並墾所需經費辦理尙易且僅離伯都訥城百餘里所有詞訟以及升科徵租各事宜均交伯都訥副都統督率該廳理事尙知妥爲經理將來招集民墾或須添官蓋房臨時再行仿照雙城堡章程妥議具奏並咨伯都訥各城出示曉諭招墾派員丈地分屯申畫經界以

道光五年爲始其所徵小租作爲各項弁兵書役工食心紅紙張費用每年招有佃戶名數領地若干及動用銀兩數目統於每年秋成後彙

奏一次等因具

奏奉

旨均著照所議行欽此遵卽咨行伯都訥副都統等衙門出示曉諭名其地爲新城屯分八旗兩翼每旗立二十五屯每屯各設三十戶以治本於農務滋稼穡八個字爲號每一字各編爲二十五號共計二百屯初報之戶積至三十戶爲治字第一號卽令歸入鑲黃旗頭屯撥給地段墾種續報再積至三十戶爲本字第一號歸入正黃旗頭屯以後依號按旗挨撥周而復始八旗

地界可以同時並墾五年已認佃一千一百二十七戶按八旗分撥四十三屯嗣據伯都訥委員勘丈新城屯閑荒僅敷一百二十屯卽將五年所招佃戶分撥字號均改每旗十五號六年認佃九百十七戶分撥三十一屯七年認佃一千五百五十六戶分撥四十六屯前後綜計一百二十屯星羅棋布與雙城堡爲表裏旗無徵糧民有恆產將軍富俊爲生民計爲京師旗人萬世計也後之踵議屯田者得此卷以爲率由則事不難矣

吉林外記卷十終

新刊吉林外記跋

甲午夏

穆

訪重黎兵備於鳩江時兵備欲流傳古籍及近人經

世實用之書十數種先以嘉慶間長白西清研齋所撰黑龍江
外記八卷屬爲校刊是年冬完工復以道光初吉林堂主事滿
洲薩英額吉夫所撰吉林外記相授與研齋之書相輔而行其
書十卷分門別類均有條理自序有云事必徵實言皆有據實
能副之特其足跡未能全境周到所記亦不無疏略與研齋之
書亦約略相等重黎云研齋之書第二卷述城堡有云石晉末
胡嶠陷遼爲蕭翰掌書記居福州宋徽欽二宗入金居五國城
以地理考之福州五國城應在今黑龍江城境內余於光緒初
傳鈔此書卽知此說之謬比疑此城近會寧府當在吉林烏喇

寧古塔之間終以茫無實據不能確指爲今之何地彼時漫注
數語聊以存疑後乃知乾隆間有副都統綽克託築吉林伯都
訥城得紫檀匣中藏宋徽宗畫鷹一軸墨蹟如新並得古銅瓷
器多端又有碑碣錄徽宗晚年日記於天會十三年寄跡於此
曾經數載考宋史徽欽二宗入金初徙韓州後移冷山皆不出
今吉林內地終徙五國城故址卽今伯都訥城乾嘉間老輩考
求地理頗有知之者而汲修主人曾載諸嘯亭雜錄潁川逸士
亦載諸東省記聞雖互有詳略而證據無殊今吉夫之書第二
卷記阿勒楚哈城城南二里有金顯祖建都故城俗稱白城有
謂爲五國城者誤第九卷古蹟三姓條五國部下據遼史營衛
部族志考得五國頭城之名亦爲詳核蓋五國城古名五國頭

城亦曰五國城頭當時並設節度使領之又吉夫於五國部下徵引宋金諸史及元明一統志洪忠宣松漠紀聞并近代高士奇扈從錄等書參考五國頭城故址所在均未合且云自其高祖由京陞吉林正黃旗佐領至今五世爲吉林人畱心考查無此城基又曰考論古今五國城在三姓無疑松漠紀聞扈從錄里數地名傳聞互異不足爲證姑論此以俟後之博覽君子蓋吉夫著此書時汲修主人及頴川逸士之書尙未行世雖能辨阿勒楚哈城南二里白城謂爲五國頭城之誤而又以爲在三姓無疑終曰俟後之博覽君子亦尙不失古人著書慎重之體余前以研齋之書屬爲校刊未及將此段公案詳注於彼書城堡所論五國城條下今吉夫之書亦不能自明子其詳書以

彌兩書之疏漏可也重黎所述如是穆以吉夫之著此書上距
乾隆間綽克託築伯都訥城時上下不過五六十年當時故老
或有見而知之者或有聞而知之者何至如其所云自其高祖
至今五世爲吉林人留心考查無此城基而竟一無所聞邪由
此類推吉林全省故事當詳而不能詳當載而不及載且不知
凡幾矣惟東三省之地除盛京通志外記載寥寥賴有研齋
吉夫之書講求輿地之學有備經世實用者不能不深有所取
焉此則重黎校刊兩書之微愾也夫

光緒二十一年歲在乙未夏五月桐城蕭穆書於春申江上

長白西清黑龍江外紀曰甯古塔吉林屬城俗呼甯古臺楊賁柳邊紀畧曰甯古塔城舊在覺羅城北五十二里康熙五年移於覺羅城西南八里今梅勒章京所居者新城也新城建舊城廢人呼爲舊街上甯古塔四面皆山虎兒哈河繞其前公衙門及梅勒章京居在木城內

甯古塔記畧

吳江吳振臣南榮齋

長洲顧沅湘舟校

我父漢槎公遭丁酉科場冤獄遣戍甯古塔以順治戊戌八月出塞我母葛孺人日夕悲哭必欲出塞省視而以舅姑在堂兩女稚弱不敢顯言我大父燕勤公微知之以我父孤羈天末既無贖罪之資而又子身無可倚恃我母既毅然肯行哀而壯之遂爲料理出塞計以大姊許字吳郡俊三場公長子岵瞻二姊就崑山李氏姨撫育庚子冬自吳江起行遣家人吳御及沈華夫妻同送我母至甯古塔

辛丑二月初五日到戍所甲辰十月十四日寅時生子命
名曰樞臣以大父庚辰甲科而余甲辰生也小字蘇還取
往還故里之意且以蘇屬國相況字曰南榮康熙己酉十
二月二十九日生三妹甲寅十月二十四日生四妹甯古
在大漠之東過黃龍府七百里與高麗之會甯府接壤乃
金阿骨打起兵之處雖以塔名實無塔相傳昔有兄弟六
個各占一方滿洲稱六爲甯古個爲塔其言甯古塔猶華
言六個也有木城兩重係 國朝初年新遷去舊城六十
餘里內城周二里許只有東西南三門其北因有將軍衙
署故不設門內城中惟容將軍護從及守門兵丁餘悉居

外城周八里，其四門，南門臨江，漢人各居東西兩門之外。予家在東門外，有茅屋數椽，庭院寬曠，周圍皆木牆，沿街留一柴門，近窗牖處俱栽花木，餘地種瓜菜，家家如此，因無買處，必須自種。後因吳三桂造逆，調兵一空，令漢人俱徙入城中。予家因移住西門內，內有東西大街，人於此開店貿易，從此人煙稠密，貨物客商絡繹不絕，居然有華夏風景。

予父惟館穀爲業，負笈者數人，諸同患難子弟爲陳昭令、葉長民、孫毓宗、毓章、許丙、午沐、中貞、田景園及呂氏昆季。予二歲時，副都統因大將軍病發，令箭遣予父及錢德惟。

年伯立刻往烏喇地方。此時天寒地凍，雪深四尺，又無牛車帳房，賴孫許兩家協力相助，乃得起行。初六日黎明登車，山草盡爲雪揜，艱苦萬狀。一車所載，不過三百斤，牛料人糧重有百斤，人口復坐其上，除被褥之外，一物不能多帶。行至百里，人牛俱乏，又賴湖州錢方叔復借一牛車。沈華及吳御始免步行之苦。至第三日，將軍復命飛騎追回，倘再行兩日至烏雞林，雪深幾丈，人牛必皆凍死矣。

予五歲始就塾，讀毛詩。時邏車國人造反，又名老羌到烏龍江

黑斤諸處搶貂皮，鋒甚銳。其國在大洋東，相去萬里，所產多羅絨、漆器最精，人皆深眼高鼻，綠睛紅髮，其猛如虎，善

黑斤即赫哲部
有雍髮黑斤，有
不雍髮黑斤

放鳥鎗有名西瓜炮者其形如西瓜量敵營之遠近雖數里外必到敵營始裂遇者必死滿洲人皆畏之將軍上疏求救卽奉部檄流人除旗下及年逾六旬者一概當役選二百名服水性者爲水軍習水戰又立三十二官莊屯積糧草令一到將軍卽遣人請紳袍到署面諭云養汝輩幾年念汝輩俱有前程差徭不以相累今邊警出意外上命急公現有水營莊頭壯丁三件事隨汝意自任一件三日後具覆是卽我法中之情時間令諸公皆相向流涕將軍亦爲悽然將軍又云惟認工可代于是各認工命父認太常寺衙門此二月初三日事也山陰祁奕喜李兼汝楊友

聲宜與陳衛玉蘇州楊駿聲同年伍謀公皆當水手以二月十一日往烏喇二三年後子家無力認工邏車國亦講和復得部文俱以紳袍例優免往烏喇戍亦得回甯古惟官莊之苦至今仍舊每一莊共十人一人爲莊頭九人爲莊丁非種田卽隨打圍燒炭每人名下責糧十二石草三百束猪肉一百斤炭一百斤石灰三百斤蘆一百束凡家中所有悉爲官物衙門有公費皆取辦官莊余窗友陳昭令者父鍾愛之因在官莊萬無出身之日我父言于將軍稱其精通滿漢文理將軍卽用爲官莊撥什庫總三十二莊後復兼管筆帖式事辦事勤能不數年遂得實授八品

撥什庫領催也
黑龍江外紀云
例以識字者充
補

筆帖式後將軍調艾渾。隨行。又數年。陞山西太原府陽曲縣丞。蓋流人無選內地之事。部憑忽到。同流者皆以畫錦相賀。昭令喜極。轉生憂懼。乃赴部問明。時熊賜履爲家宰。以爲八品筆帖式不宜選縣丞。當得彼處驛站章京。卽留。憑不發。于是昭令叩頭固請。終不可得。大概久沈淵底。無升天之望。其可悲悼如此。子七歲。鎮守巴將軍聘吾父爲書記。兼課其二子。長名額生。次名尹生。余及固山烏打哈。隨學。巴公長子。晝則讀書。晚則騎射。各攜自製小箭。一十二枝。每人各出二枝。如聚五人。共箭十枝。豎于一簇。遠三十步。依次而射。射中者得箭。每以此爲戲。

予曾於六月中簷下遘一蛇長三四尺以小刀斷爲三四頃刻卽連又斷四五復卽如舊行更速再斷之每段用木夾擲牆外有懸於樹上者始不能連後有識者云此卽續弦膏弓弦斷處以此膏續之膠固異常雖用之積久他處斷而接處不斷乃無價寶也甚爲惜之

予十四歲我父爲聘葉氏諱之馨字明德之女葉公祖籍四川重慶府之巴縣甲午解元任雲南大理府理刑與吳三桂忤流竄甯古在徙所爲鎮府推重婦兄名愷字長民癸亥奉赦長民送兩大人骸骨歸蜀復入籍奉天有子四長名珍文丙子北闈次名珩文太學生三名璽文奉天府

學生四名潛文此係患難親戚兒輩不可忘也。

當我父初到時其地苦寒自春初至三月終日夜大風如雷鳴電激塵埃蔽天咫尺皆迷七月中有白鵝飛下便不能復飛起不數日卽有濃霜八月中卽下大雪九月中河盡凍十月地裂盈尺雪纔到地卽成堅冰雖向日照灼不消初至者必三襲裘久居則重裘可禦寒矣至三月終凍始解草木尙未萌芽近來漢官到後日向和暖大異曩時滿洲人云此暖是蠻子帶來可見天意垂憫流人回此陽和也。

南門臨鴨綠江江發源自長白山西門外三里許有石壁

北齊人譏徐陵帶熱來同此善謔。

北方無楓此未
竭

臨江長十五里高數千仞名雞林哈答古木蒼松橫生倒
插白梨紅杏參差掩映端午左右石崖下芍藥徧開至秋
深楓葉萬樹紅映滿江江中有魚極鮮肥而多有形似鱖
項鰻滿名發祿滿洲人喜食之夏間最多予少時喜釣每
于晡夕持竿垂釣頃刻便得數尾而歸又有一種生于江
邊淺水處石子下者上半身似蟹下截似蝦長二三寸亦
鮮美可食名哈什馬今上祭太廟必用此物亦有鱒鯉
魚他如青魚鯉魚鰻魚鯽魚其最多者也有僧名靜今者
亦江左人因事戍此建一觀音閣于崖下夏秋時遷客騷
人多遊焉冬則河水盡凍厚四五尺夜間鑿一隙如井以

火照之魚輒聚其下以鐵叉叉之必得大魚。

上常于冬至前後遣人取魚亦以此法因甯古魚之肥美實異於他處耳。

石壁之上別有一朗岡卽甯古鎮城進京大路一百里至沙嶺第一站有金之上京城臨馬耳河宮殿基址尙存殿前有石臺有八角井有國學碑僅存天會紀元數字餘皆剝蝕不可辨識禁城外有蓮花石塔微向東欹塔之北有石佛高二丈許又有荷花池長數里東門外三里有林名覺羅卽我朝發祥地也自東而北而西沿城俱平原曠野榛林玫瑰一望無際五月間玫瑰始開香聞數里予

家采爲玫瑰糖。土人奇而珍之。有果名衣而哈日克形似小楊梅而無核。味絕佳。草本紅藤。生雜草中。又有果名烏綠栗。似橄欖。綠皮小核。味甘而鮮。又有果名歐栗子。似櫻桃。味甘而酸。俱木本小樹。而梨子雖小。味極美。梨與葡萄。做色味俱精。此二種內地所無者也。山查大而紅。亦爲糕。予家常食榛子腐松子糕。不覺其珍也。產人參。爾時多賤。竟如吾鄉之桃李。草本方梗。對節生葉。葉似秋海棠。六七月開小白花。八月結子。似天竹子。生于深山草叢中。較他草高尺許。土性鬆。掘數尺不見泥。若朽爛樹葉。以八九月間者爲最佳。生者色白。蒸熟輒帶紅色。紅而明亮者其精。

神足爲第一等。今之醫家俱以白色者爲貴，名爲京參。又謂其土不同，故有此二種。大謬。凡掘參之人，一日所得至晚，便蒸，次早曬于日中，曬乾後，有大有小，有紅有白，並非以地之不同。總因精神之足與不足也。故土人貴紅而賤白。蒸參之水，復以參梗葉同煎，收膏，膏味亦與參味同。人參子煎湯，難產者服之，卽生。但參在本地服之，不能見效。予父初到甯古時，以參半斤煎服，反瀉半日，不可解曉也。產黃精、桔梗、五味子、及雞腿、麻菇、木耳、真經菜、蕨菜，極多而肥。

東山名商陽哈答極高峻，在對江石壁，插于江中，水極深。

呼兒喀，即虎兒哈部，非牙哈，即黃雅喀，烏橋，即窩集老林也。

魚極多。此山最深遠，向出參貂，今則取盡矣。惟松樹極多。松子采之不盡，再東三百里名衣朗哈喇，今設土城，有官守。與金時五國城相近，畧存其形而已。又東北五六百里為呼兒喀，又六百里為黑斤，又六百里為非牙哈，總名烏稽韃子，又名魚皮韃子，因其衣魚皮，食魚肉為生，故名。其人不知歲月，不知生辰，死以片緜裹尸，下棺以木架，插于野，置棺于架上，俟棺木將朽，乃入土。其地不產五穀，出魚及貂皮、元狐、黃狐、海驃、黃鼠、灰鼠、水獺。近混同江，江中出石罌，相傳松脂入水，千年所化，有紋理如木質，紺碧色，堅過于鐵。土人用以礪刃，名為昂威赫，即古肅慎氏所貢楛。

矢石弩是也。予父攜歸示諸親友。王阮亭載之。池北偶談中。水中產五色石如瑪瑙。用以取火絕佳。每歲五月間。此三處人乘查哈船。江行至甯古南關外。泊船進貂。將軍設宴。并出戶部頒賜進貂人袍帽靴鞵。挺帶汗巾扇子等物。各一捆賜之。每人名下擇貂皮一張。元狐全黑者不可多得。一歲不過數張。亦必須進上。餘聽彼貨易。所賜之扇。不知用。漢人以零星物件易之。其人最喜大紅盤金蟒袍。又各色錦片粧緞。其所衣魚皮極軟熟。可染喜五色糯米珠。并銅錢響鈴。縫於衣旁。行動有聲。彼此稱呼曰安答。黑斤人。留髮梳髻。耳垂大環。四五對。鼻穿小銀環。所產貂皮爲

第一富者多以鵬翅蓋屋貂皮爲帳爲裘元狐爲帳狐貉爲被褥非牙哈亦留髮男婦不著褲耳垂大環鼻穿小環所產貂皮畧次以樺皮爲船止容一人用兩頭槳如出海捕魚則負至海邊置水中遇風便歸呼兒喀則剃頭男人帶環者少所產貂鼠爲次惟黃狐黃鼠魚肉乾頗佳此三處俱無官長約束爲人愚而有信義有與店家賒綢緞蟒服者店主擇黑貂一張爲樣約來年照樣還若干至次年必照樣還清有他故亦必託人寄到相去千里又非舊識而不爽約如此又勇不畏死一人便能殺虎今上愛其勇賜以官爵時以減等流徙者賜之爲奴如是者數年令

黑龍江外紀云
滿洲有佛伊徹
之分國語舊曰
佛新曰伊徹轉
而爲伊齊一氣
其初多吉林產
也

從呼兒喀遷至甯古又遷至奉天又二年則令入都今名
衣扯滿洲者卽此也滿洲語謂新爲衣扯猶云新滿洲也
滿書譯爲衣扯曰義氣者漢音之訛也賜以官爵亦不知
貴將軍嘗謂有爵者曰今已有官須學禮儀一體上衙門
次日有官者約同齊到有戴笠者有負艾袋者有跣足者
見者無不大笑將軍命坐卽以艾袋墊地而坐雖衣大紅
蟒袍其艾袋仍負於背不稍去以便於買物也後命進京
有不願者聽歸本土一日數百家聚於郊外送別哭聲震
天男婦相抱親臉唧唧有聲以此作別近于都中見之大
非昔比禮貌言談亦幾與滿漢無異矣

北山離城十里重巖疊嶂古樹叢密城內人家俱于此樵
采城之西北十餘里名額富里又六十里卽舊城臨河河
內多蚌蛤出東珠極多重有二三錢者有粉紅色有天青
色有白色非奉 旨不許人取禁之極嚴有兒童浴于河
得一蚌剖之有大珠徑寸藏之歸是夕風雨大作龍繞其
廬舒爪入牖攫取其珠而去風雨頓止西則一朗岡木丹
沙嶺村莊頗多江之南有索兒河溪噶什哈必兒汀此處
水極深上有崇崖插天其地背陰日光不到雖亭午亦不
甚明爽然一至夜轉有光照石壁石壁皆紅土人甚異之
忽一日漁人捕一青魚大盈車載以入城江右徐定生以

青布一疋易之。先取魚首煮之。既熟剖得紅色珠。大如彈丸。紅光猶寸許。鬻之得百金。後聞攜至京師。復爲某王所得。償以二千金。此後石崑昏黑無光矣。江中往來俱用獨木船。名威呼。凡各村莊。滿洲居者多。漢人居者少。凡出門不齎路費。經過之處。隨意止宿。人馬俱供給。少陵所謂馬有青芻。客有粟也。如兩人遠出。年幼者服事。年長者三人同行。則最幼者服事。其稍長者亦公然坐而不動。等輩彼此稱呼曰阿哥。有呼名者。稱年高者曰馬發。朋友曰姑促。父曰阿馬。母曰葛娘。大伯曰昂邦。阿馬叔曰葛克赤。子曰濟。女曰义。而漢濟甥曰濟頒。卽哈夫曰畏根。妻曰义。而漢

男人曰哈哈女人曰赫赫兄曰阿烘弟曰多嫂曰阿什姊
曰格格妹曰那小廝曰哈哈朱子了頭曰父而漢朱子好
曰山音不好曰曷黑吃飯曰不打者夫吃肉曰烟立者夫
吃酒曰奴勒惡米吃燒酒曰阿而吃惡米讀書曰必帖黑
呼辣米射箭曰喀不他米書曰必帖黑筆曰非 墨曰百
黑紙曰花傷硯曰硯注金曰愛星銀曰蒙吾錢曰濟哈水
曰目克木曰木土曰驚烘火曰托炭曰牙哈有曰畢無曰
阿庫是曰音喏不是曰洼喀富曰拜央窮曰呀打人曰亞
馬坐曰突立曰衣立行曰弗立米走曰鴉波睡曰得多蜜
去曰根呐蜜來曰朱要曰該蜜不要曰該辣庫小曰阿卽

格大曰昂邦。買曰烏打蜜。賣曰溫嗟蜜。兩曰央錢。曰卽喀。一曰曷木。二曰朱三。曰衣朗。四曰對音。五曰孫查。六曰佞。我七曰那打。八曰甲工。九曰烏永。十曰壯。百曰貪吾。千曰銘牙。萬曰土墨。貂皮曰色克。人參曰惡而訶打。流人間有逃歸者。人遇之亦不告。有追及者。諱云自返。亦不之罪。大率信義爲重。路不拾遺。頗有古風。今則不能矣。最善于描蹤。人畜經過。視草地便知。能描至數十里。但一經雨便失之矣。有草名烏臘草。出近水處。細長溫軟。用以絮皮鞋內。雖行冰雪中。足不知冷。皮鞋名烏臘。土諺云甯古三樣寶。指人參。貂皮。烏臘也。所產之物。俱異于他處。香瓜極香甜。

柳邊記畧云甯古三樣寶人參貂皮烏臘草

夏日盡飽無破腹之患。冬日食油膩及飲冷水亦然。所以各處流客無不服水土者。我父素羸弱。到彼精神充足。其水人稱爲人參水。地極肥饒。五穀俱生。惟無稻米。四月初播種。八月內俱收穫矣。農隙俱入山采樵。以牛車載歸。足來歲終年之用。乃止。雪深冰凍。則不用車。因冰滑。故用扒犁。似車而無輪。仍駕牛。在冰地上行。速而且穩。暇則采松子。并取火絨。絨生於木癭中。取之可盈匊。微黃色。可以引火。其臭頗香。或開窖燒炭。或伐大樹作器用。無瓦器。其蓋碟盆盥澡盆之屬。俱以獨木爲之。油用蘇子油。似吾鄉之紫蘇子也。亦有麻油。稍貴。無燭。點糠燈。其製以麻梗爲本。

蘇子油渣及小米糠拌勻粘麻梗上曬乾長三四尺橫插木架上風吹不息不知養蜜蜂有采松子者或采樵者於枯樹中得蜂窩其蜜無數漢人教以煎熬之法始有蜜有蠟遇喜慶事漢人自爲蠟燭滿洲人亦效之然無賣者大小人家做黃蘗湯每飲用調羹不用箸調羹曰差非又曰匙子吃碗菜乃用箸箸曰叉不哈碗曰麼樂出門者腰帶必繫小刀匙子袋火鏈袋手帕等物小刀曰呼什火鏈曰鴉他庫袋曰法拖手帕曰封枯

鹽取給於高麗之會甯府離此七百里衣冠皆古制以江爲界甯古界雲樹參天高麗界白沙漫草相望里許無故

禁往來每於十月奉命到彼置鹽并貨易牛馬紙筆扇鐵
稻米等項稻米至甯古每升須銀二三錢惟宴客用之甯
古西南地名紅旗街與高麗接壤頗近海今亦設官府此
處出海參爲第一等

黑龍江外紀云
白土和而漫壁
稱細泥惟齊齊
哈爾有之

房屋大小不等木料極大只一進或三間五間或有兩廂
俱用草蓋草名蓋房草極長細有白泥泥牆極滑可觀牆
厚幾尺然冬間寒氣侵人視之如霜屋內南西北接繞三
炕炕上用蘆席席上鋪大紅氈炕闊六尺每一面長二丈
五六尺夜則橫臥炕上必並頭而臥卽出外亦然櫥箱被
褥之類俱靠西北牆安放有南窗西窗門在南窗之旁窗

戶俱從外閉。恐夜間虎來，易於撞進，靠東壁間以板壁隔斷。有南北二炕，有南窗卽爲內房矣。無椅杌，有炕桌俱盤膝坐。客來俱坐南炕，內眷不避，無作揖打恭之禮。相見惟執手，送客垂手畧曲腰，如久別乍晤，彼此相抱，復執手問安。如幼輩，兩手抱其腰，長者用手撫其背而已。婦女以右手撫其額，點頭爲拜，如跪而以手撫額，點頭爲行大禮。婦女輩相見，以執手爲親拜，亦偶耳。除夕幼輩必到長者家辭歲，叩首受而不答。等輩同叩，元旦城門必嚴列旌旗，弓矢以壯威武。家家必於半夜賀歲，如遲至午，便爲不恭矣。滿洲人家歌舞名曰莽式，有男莽式，女莽式，兩人相對而

舞旁人拍手而歌每行於新歲或喜慶之時。上於太廟中用男莽式禮凡大小人家門前立木一根以此爲神逢喜慶疾病則還願擇大猪不與人爭價宰割列於其下請善誦者名義馬向之念誦家主跪拜畢用零星腸肉懸於木竿頭將猪肉頭足肝腸收拾極淨大腸以血灌滿一鍋煮熟請親友列炕上炕上不用桌鋪設油單一人一盤自用小刀片食不留餘不送人如因病還願病不能愈即將此木擲於郊外以其不靈也後再逢喜慶疾病則另樹一木有跳神禮每於春秋二時行之半月前釀米兒酒如吾鄉之酒釀味極甜磨粉做糕糕有幾種皆畧用油煎必極

其潔淨猪羊雞鵝畢具以當家婦爲主衣服外繫裙裙腰上周圍繫長鐵鈴百數手執紙鼓敲之其聲鏗鏗然口誦滿語腰搖鈴響以鼓接應旁更有大皮鼓數面隨之敲和必西向西炕上設炕桌羅列食物上以線橫牽線上挂五色綢條似乎祖先依其上也自早至暮日跳三次凡滿漢相識及婦女必盡相邀三日而止以祭餘相餽遺。

清明掃墓富貴騎馬乘車貧賤者將祭品羅列炕桌上女人戴於頭上而行雖行數里不用手扶而自不傾側卽平日米糧箱籠俱以頭戴。

有疾病用草一把懸於大門名曰忌門雖親友探望只立

於門外問安而去。

遇婚喪喜慶等事無緘帖無鼓樂無男女僮相訂婚時父率子同媒往拜婦之父母次日女之父亦同媒答拜行聘名曰下茶俱用高桌如吾鄉之官桌上鋪紅氈茶果綢緞布疋仍用盤放桌上多至數十桌貧富不等羊酒必需嫁時裝奩如箱匣鏡臺被褥之類亦置高桌上兩人扛之娶親用轎車仍掛紅綠綢婦入門只拜公姑無交拜禮如漢人請親戚扶新人行禮滿洲人家喜筵宴客飲至半酣時婦女俱出敬酒以大碗滿斟跪於地奉勸俟飲盡乃起生子滿月下搖車如吾鄉之搖籃其製以篩板圈做兩頭每

頭兩孔以長皮條穿孔內外用彩畫并懸響鈴之類內墊薄板懸於梁上離地三四尺用帶縛定小兒使不得動哭則乳之不已則搖之口念巴不力如吾鄉之念頃啫啫也喪事將入殮其夕親友俱集名曰守夜終夜不睡喪家盛設相待俟殮後方散七七內必殯火化而葬棺蓋尖而無底內墊麻骨蘆柴之類仍用被褥以便下火父母之喪只一年而除以不剃頭爲重。

春秋二季將軍令兵丁於各門城上晨夕兩時吹笳聲聞數里冬至令兵於各山野燒名曰放荒如此則來年草木更盛又每歲端午後派八旗撥什庫一人率領兵丁幾名

將合甯古之馬盡放於幾百里外有水草處馬尾上繫木牌刻某人名至七月中方歸此時馬已極肥俱到衙門內各認木牌奉回

四季常出臘打圍有朝出暮歸者有兩三日而歸者謂之打小圍秋間打野雞圍仲冬打大圍接八旗排陣而行成圍時無令不得擅射二十餘日乃歸所得者虎豹猪熊獐狐鹿兔野雞鷓鴣羽等物獵犬最猛有能捉虎豹者虎豹頗畏人惟熊極猛力能拔樹擲人野雞最肥油厚寸許遼東野雞頗有名然迥不及矣每一獵車載馬駝不知其數鷹第一等名海東青能捉天鵝一日能飛二千里又有白鷹

蘆花鷹俱極貴重進上之物餘則黃鷹兔虎鷄子亦皆猛於他處有鵬極大而多但用其翎毛爲箭

每於三年後將軍出示無論滿漢其未成丁者俱到衙門比試名曰比棍以木二根高如古尺五尺上橫短木立於將軍前照冊點名於木棍下走過適如棍長者卽註冊披甲派差食糧如不願者每歲出銀六兩名曰當幫辛酉三月予於此棍已合式將派差矣予父言於將軍乃止

是歲烏喇將軍忽遣人邀予父將以爲書記兼管筆帖式及驛站事務訂於九月中合家遷往烏喇頗以爲喜會七月內還鄉詔下乃不果八月十八日爲予娶婦葉氏氏賢

而孝兩大人甚愛之遂理歸裝飲餞無虛日皆相持哭失聲不忍別至九月二十日起行將軍遣撥什庫一人兵八名護送又發勘合撥驛車二兩驛馬二匹及飲食等項按驛供給更換親戚之內眷送至一朗岡而別親友及門俱送至沙嶺聚談徹夜至曉分手我父哭不止策馬復追二十餘里再聚片時而回患難交情如此之深也次日經過石頭甸子石質相連不斷闊三十里東西長三百餘里其底嵌空玲瓏車馬行動有聲冰泮時下有流澌潺湲亦一奇也第二站名驚而漢驚臘第三日進大烏稽古名黑松林樹木參天槎衍突兀皆數千年之物縣縣延延橫亘千

里不知紀極。車馬從中穿過，且六十里。初入烏稽，若有門焉。皆大樹數抱，環列兩旁，洞洞然不見天日。惟秋冬樹葉脫落，則稍明。凡進烏稽者，各解小物懸於樹上，以贈神。子父帶有同年鎮江張升、季年伯骸骨，并其女還。姐歸鄉，車馬至此不前，鞭之亦不行。子父覺有異，乃下馬向空再拜默禱，卽行動如初，無不驚異。因念古人建立壇壝，必種松柏以爲神所憑依，今可識其非虛渺矣。其中多峻嶺巉巖，石徑高低難行，其上鳥聲呶啞不絕，鼯鼯狸鼠之類，旋繞左右，畧不畏人。微風震撼，則如波濤洶湧，颼颼颼不可名狀。子父同內眷由正路而行，子則同護送諸人由側路

打獵所獲頗多。是夕宿於嶺下。帳房臨澗。澗水淙淙然。音韻極幽闐。兵丁取大樹皮二三片。闊丈餘。放地上。卽如圈篷船。儘可坐臥。拾枯枝炊飯。并日間所得獐鹿。燒割而啖。其餘火至曉不絕。迨夜半。怪聲忽起。如山崩地裂。乃千年枯樹忽焉摧折也。至今思之。猶覺心悸。第四站名昂邦多紅。第五站名拉發。穿過小烏稽。經過三十里。情景亦相似。第六站名厄黑木。第七站名泥濕哈。十里渡松花江。源亦發自長白山。通黑龍江。墨爾根。愛琿等處。總歸於混同江。烏喇有船廠。造大船往來諸處。故又名船廠。有將軍鎮守。本甯古塔將軍調此。卽前與余父有書記之約者。留數日。

更換勘合如前護送烏喇第一站名蘇通第二站名衣而門第三站名雙羊河第四站名一巴旦第五站名大孤山第六站名黑而素第七站名野黑第八站名棉花街四十里至烏遠堡卽柳條邊柳條邊垂楊數百里係前朝所種以隔中外今仍有章京守此盤詰往來亦要害地也又十五里至開原縣又五十五里至高麗站又十五里至鐵嶺縣又六十里至驛路站又七十里至奉天府時奉天將軍卽丁酉刑部江南司問官當時極憐我父子之才聞我父將至遣人至柳條邊迎候至奉天遂留半月餘亦更換勘合照前護送奉天府第一站六十里至老邊站四十里至

澡流河四十里至白旗堡站七十里至二道井子五十里
至小河山站爲廣甯縣十五里至廣甯站三十里至閒陽
驛四十里至石山站三十里至大凌河四十里至錦州府
六十里至高橋站六十里至甯遠州六十里至東關站六
十里至涼水河站八十里至山海關山海關卽秦之長城
第一關也城高而厚南入海四十里北面大山多極其高
峻城則隨山高下而築關門向東大路有一嶺出關者稱
爲悽惶嶺入關者稱爲歡喜嶺嶺下有孟姜女廟是夕宿
於嶺下兩方人各述當日出關景况今得到此眞爲歡喜
明日進關氣象迥別又七日至京師與親友相聚執手痛

哭眞如再生也

凡甯古山川土地俱極肥饒故物產之美鮮食之外雖山
蔬野藪無不佳者皆無所屬任人自取其紳士在彼者俱
照中國一例優免與尙陽堡流徙者不同蓋

世祖皇帝念甯古苦寒特開此恩例凡流人至者或生理
耕種各就本人所長而我父惟知讀書別無所曉幸同社
諸公皆至大位時時寄與周濟乃不窘乏甯古去京四千
餘里冬則冰雪載道其深丈餘其寒令人不能受夏則有
哈湯之險數百里俱是泥淖其深不測邊人呼水在草中
如淖者曰紅鏽水人依草墩而行畧一轉側人馬俱陷所

以無商賈往來往來者惟滿洲而已音信難得歲僅一至眞所謂家書抵萬金也後來哈湯之上俱橫鋪樹木年年修理往來者始多大馮三兄壬子拔貢在京考選教習得此人南北音信乃不阻絕賜還之事固同社諸公如宋石之相國徐健庵司寇徐立齋相國顧梁汾舍人成容若侍衛不忘故舊之德而其中足趼舌敝以成茲舉者則大馮三兄之力居多焉

嗚呼余家方全盛時大父燕勤公以都憲挂冠爲一時名臣余父暨伯父宏人公聞夏公以詩文鳴江左先達稱爲延陵三鳳叔父顯令公繼起同社又比之皇甫四君丁酉

秋我父獲雋人方以爲得人慶詎知變起蕭牆以風影之
談橫被誣陷致使家門傾覆顛沛流離迫遠戍窮荒幾謂
冤沈海底斷難昭雪乃

皇天默佑荷戈二十三年百冷辟易疾疢不作所遇將軍
固山無不憐才待以殊禮窮邊子弟負耒傳經據鞍弦誦
彬彬乎冰山雪窖之鄉翻成說禮敦詩之國矣洎乎長白
賦入天心嗟歎溫詔下頒流人復歸本土玉門之關旣
入才子之名大振手加額者盈路親緒論者滿車一時足
稱盛事而余父益自韜晦虛懷待人孰意文人薄命溘焉
捐館備歷艱辛而終未克食一日之報彼蒼者天豈豐其

名者必嗇其福耶。嗚呼哀哉。余生長邊陲。入關之歲。已爲成人。其中風土人情。山川名勝。悉皆諳習。頗能記憶。今年近六旬。鬚髮漸白。回思患難時。不啻隔世。誠恐久而遺忘。子孫不復知祖父之閱歷艱危如此。長夏無事。筆之於紙。以爲甯古塔紀畧。時康熙六十年辛丑歲七月也。

康熙三十年前。沿松花江而下三千里。俱設城郭。直至烏龍江而止。烏喇七百里。至孤兒。卻又名新城。有梅勒章京駐扎。徧地皆沙。與蒙古接壤。最多牛馬羊駱駝。又二百六十里。至墨爾根。木城沙地。都統鎮守。又一千里。至圍魁。木城沙地。都統鎮守。離城東北五十里。有水蕩。周圍三十里。

圍魁卽卜魁齊齊哈爾城

愛葦龍沙紀畧
作艾渾

於康熙五十九年六七月間忽煙火冲天其聲如雷晝夜不絕聲聞五六十里其飛出者皆黑石硫黃之類經年不斷竟成一山兼有城郭熱氣逼人三十餘里只可登遠山而望今熱氣漸衰然隔數里人仍不能近天使到彼查看亦只遠望而已嗅之惟硫黃氣至今如此亦無有識之者又八百里至愛葦木城四周皆山城臨烏龍江有將軍鎮守與老搶連界近索龍出人參貂皮此處貂皮毛粗不及黑斤矣孤兒卻至愛葦一帶俱極寒冷六月收成七月卽霜雪又非甯古烏喇可比也此皆烏喇諸友所述者

